

李潤海 監印 杜潔祥 主編



中國佛寺史志彙刊

第二輯

第15冊

221

雲居山志

明文書局印行

佛曆2542年（1980）10月

臺灣・臺北

58663

491372
263
12.15

雲

居

山

志

二十卷

〔民國〕岑學呂編
民國年間香港排印本

書背題字：王懷

蝴蝶頁題字：釋晚雲



王懷書於蝶

蝶頁題字

雲居山志詳目

明文書局編輯部 編

圖

真如寺大雄寶殿	三
天王殿虛懷樓雲海樓全景	四
大雄寶殿中三尊大佛之一——釋迦牟尼如來	五
藏經樓銅鑄千華佛繞毘盧像	六
藏經樓木雕西方三聖像	七
大雄寶殿後海島觀世音菩薩像	八
大雄寶殿內兩側供奉十八尊者	九
海會塔	一〇
雲居茅蓬全景	一一
藏經樓外貌	一二
鐘樓及客堂全景	一三
晦山戒顯和尚全身塔	一四

趙州關碑石景緻
佛印橋畔之談心石及石牀

一四

明月湖畔壁巖石刻飛虹橋及詩

一五

明月湖飛虹橋後水景

一六

雲居山全圖

一七

雲居山志重修流通序

三七

舊序一

李道泰 三九

舊序二

熊維典 四〇

舊序三

釋戒顯 四一

緣起

元 鵬 四三

卷一

山水

〔山〕

歐山 雲居山 雲居第一山

四六

鉢孟山	龜山	蛇山	鷄籠山	四六
橫架山	香花山			四六
〔湖〕				
明月湖				四七
〔峯〕				
五老峯	龍珠峯	象王峯		四七
袈裟峯	石鼓峯	碧雲峯		四七
五龍潭				四七
〔城〕				
蓮華城				四八
碧溪	改溪	九溪		四八
〔嶺〕				
到嶺	鵝公嶺	走馬嶺		四八
荷葉嶺	廣家嶺			四九
〔坳〕				
龍昌塢				五一
月明坳	關房坳	陽坳		四九
馬頸坳	豐源坳	出寺坳		四九
佛頂坳				四九
〔石〕				
磬石	木魚石	仙人脚石		五〇
龜石	蛇石	歡喜石	石船	五〇
鷄石	頭中石	馬嘴石		五〇
五墮石	鷹嘴石			五〇
〔泉〕				
慧泉	馬尾水	白水	溫泉	五一
〔塘〕				
仰天塘	聖水塘			
〔窩〕				
仰天窩	九龍窩			五一
〔塢〕				

〔坑〕

井頭坑	禪風坑	打石坑	五
釣橋坑	野豬坑		五一

〔街〕

石街			五
----	--	--	---

〔坪〕

大湖坪	小湖坪		五
-----	-----	--	---

〔洞〕

雷門洞			五
-----	--	--	---

卷二
創建

〔殿〕

大雄殿	藏經殿	天王殿	五
方丈			三

〔堂〕

禪堂	千在堂	祖師堂	五
毗尼堂	伽藍堂	雲水堂	四

明月堂 應供堂

香積堂	雲農寮	耆宿寮	五
浴堂	田寮	米寮	五
糟廠			五

〔樓閣〕

鐘樓	鼓樓		五
----	----	--	---

〔牆〕

羅漢牆	山門		五
-----	----	--	---

〔橋〕

佛印橋	安樂橋	呼童橋	五
獨石橋	高橋	撞山橋	六

〔坊〕

石坊			五
----	--	--	---

〔關〕

趙州關			五
-----	--	--	---

〔亭〕

到天亭	葛公亭	更衣亭	五
三高亭	孤雲亭		七

〔寺院〕

瑤田寺	雲門寺	龍溪寺	五八	
西泉寺	仰天窩	石屋	五八	
臥龍庵	關房	祇樹堂	五八	
姜庵	休庵	金鈴寺	寶蓋寺	五八
茶庵	圓通庵	惠泉庵	五八	
蘿蔔菴	樂牧菴	上方菴	五八	
顓菴	慧雲菴	斗田菴	五八	
山塘菴	蛟頭菴	光隱寺	五八	
花菴	龍護菴	鄧家寺	五八	
上菴	下菴	青蘿菴	雲居菴	五九
地藏菴	冷水菴	壽樟菴	五九	
維摩菴	果樹菴	梅子菴	五九	
石湖菴	聽雲菴	須彌菴	五九	
佛祖菴	百福菴	興隆菴	五九	
觀音菴	剃頭菴	九溪院	五九	
崇福菴	木坑菴	遊龍寺	五九	

方廣舍 觀音菴

〔壇廟〕

龍王廟	歐山將軍廟	安樂殿	五九
樹神村	雲居庫		五九

卷三

住持

道膺禪師		六二
道簡禪師	昌禪師	六四
懷嶽禪師	清錫禪師	六四
道齊禪師	契瓊禪師	六五
曉舜禪師	了元佛印禪師	六六
自寶禪師	守億禪師	六八
文慶海印禪師	元祐禪師	六九
高庵善悟禪師		六九
克勤佛果禪師		七〇
宗杲大慧禪師		七一
宗振禪師	法如禪師	七四

頑菴德昇禪師	普雲自圓禪師	七五
蓬菴德會禪師	率菴梵琮禪師	七六
一翁慶如禪師	卽菴慈覺禪師	七六
掩室善開禪師	呆菴普莊禪師	七七
小隱師大禪師		七七
慈舟方念禪師	諸緣洪斷和尚	七八
顯愚衡和尚		八〇
方融如璽禪師		八一
晦山顯和尚		八二
燕雷鵬禪師		八五

卷四

過化

趙州從諗禪師	佛日本空禪師	九三
雲門文偃禪師	雲門承古禪師	九三
洞山曉聰禪師	圓通法秀禪師	九四
泐潭洪英禪師		九四
瑞光圓照宗本禪師		九四

卷五

事蹟

無心杏	羅漢塔	一一〇
安樂殿	黃荊樹	一二〇
雪堂行禪師		一二〇
山堂	自寶禪師	一〇一
佛印禪師		一〇三

靈源清禪師	寶峰真淨文禪師	九五
覺範惠洪禪師		九五
鼓山竹菴珪禪師	塗毒智策禪師	九六
龍翔肱禪師	妙覺慧悟禪師	九七
丹霞佛智端裕禪師		九七
昭覺道元禪師		九七
薦福曹源道生禪師		九八
寶峯元白音可尊宿		九八
壽椿福永禪宿師		九八
無盡闍黎		九九
雙峰起高和尚		九九

雲居山志

六

佛印禪師二	李商老	一〇四
高菴二	弘覺道場	一〇五
卽菴慈覺禪師	復合神鐘	一〇五
古大殿基佛座下	寺左三塔	一〇六
舊有羅漢頂骨		一〇六
九龍霧禪師	晦山顯禪師	一〇七
趙州關		一〇七
<hr/>		
塔院		
道容禪師塔	道膺禪師塔	一〇八
道簡禪師塔	奎章禪師塔	一〇八
融禪師塔		一〇八
清錫禪師塔	道齊禪師塔	一〇九
心印禪師塔	元祐禪師塔	一〇九
羅漢塔	山塘□禪師塔	一〇九
山塘□禪師塔	□禪師塔	一〇九
□禪師塔	□禪師塔	一〇九
高僧塔	大慧塔	一〇九

卷六

勅翰

唐憲宗	宋真宗	宋仁宗	一
宋神宗	宋高宗		一
明神宗			一
			三

卽菴禪師塔	關房塔	一一
一翁慶如禪師塔	姜菴塔	一一
顓愚觀衡和尚新遷塔		一一
晦山顯禪師壽塔	先耆宿塔	一一
月空天耆宿塔	拙初先耆宿塔	一一
西峰首座塔	壽椿耆宿塔	一一
琬公耆宿塔	□耆宿塔	一一
寂演都管和尚塔	光照塔	一一
航公濟□	龜山味公塔	一一
蛇山秀公塔	明□□□	一一
祇樹堂塔	果熟塔	一一
龍護塔□		一一
久參首座塔	普同塔	一一
灣頭塔山		一一

藝文……………一一四

卷七

〔寺記〕

雲居開山緣起記………張大猷……一五

雲居山重修真如禪院碑記

晏殊……一六

重修雲居寺記………張位……一九

敕建雲居山真如禪寺立僧戶碑記

魏裔魯……二一

重建古雲門寺記………熊維典……二三

雲居山真如寺重建諸殿堂碑記

謝文游……二三

重建古雲門寺記………釋戒顯……二十四

雲居諸緣老人上足知悟和尚開建

芙蓉山苾芻禪林碑記………釋戒顯……二六

炮莊序

卷八

〔錄序〕

詳目

卷九

雲居祐禪師語錄序………黃庭堅……二二八

雲居晦山禪師語錄序………熊開元……二二九

晦山大師匡廬集序………熊維典……二三〇

雲居賦序………宋之盛……二三一

天上雲居賦序………洪周祿……二三三

雲居鍛鍊說十三篇序………黎元寬……二三四

雲居鍛鍊說十三篇序………張立廉……二三五

晦山和尚詩文全集序………徐增……二三六

晦山和尚詩文全集序………查繼佐……二四〇

現果錄序………周亮工……二四二

晦山和尚全錄序………張立廉……二四二

題雲居之雲壑序………熊遠寄……二四三

雲居弘覺禪師語錄序………釋德洪……二四五

閉門語自序………釋觀衡……二四六

書義全提序………釋戒顯……二四七

釋戒顯……二四八

〔啓〕

請晦山大師住雲居……熊德陽等……一五〇
請雲居晦翁和尚住東林啓

文德翼……一五一

請圓悟和尚住雲居……釋德洪……一五一

請晦山和尚住雲居……釋音住等……一五二

賀燕雷和尚繼雲居席……釋智鎔等……一五三

奉和雲居燕翁和尚續席……德□……一五三

請雲居西泉寺起高和尚赴圓通啓

釋大成……一五四

卷十

〔疏〕

奏請藏經疏……釋洪斷……一五五

募建雲居大殿疏……釋戒顯……一五五

雲居募磁碗及大齋疏……釋戒顯……一五六

雲居山真如禪寺募緣疏……王肯堂……一五七

募造釋迦佛銅像疏……于玉立……一五八

題雲居寺疏……董其昌……一五八

題雲居寺疏……楊繼禮……一五九

題雲居寺疏……羅大紘……一五九

雲居茶菴募蓋禪室疏……熊維典……一五九

雲居募造千華閣疏……朱徽……一六〇

臥龍菴募疏……熊德明……一六一

卷十一

〔銘〕

傘居顥愚大師塔銘……熊德陽……一六三

味白老宿塔銘……熊德陽……一六三

大殿佛座下地宮碑銘……釋洪斷……一六四

傘居顥愚大師塔銘……釋道盛……一六五

卷十二

〔賦〕

天上雲居賦……釋戒顯……一六七

卷十三

〔書問〕

答雲居佛印禪師二書	蘇 輓	一七一
答佛印禪師	黃庭堅	一七二
與雲居教首座	黃庭堅	一七二
與雲居高菴禪師	耿延禧	一七二
與雲居妙喜禪師二書	韓駒	一七三
復雲居諸緣和尚	張位	一七三
復雲居諸緣和尚	劉日寧	一七四
上雲居顥愚和尚	劉同升	一七四
復雲居晦山和尚	王時敏	一七四
復雲居晦山和尚	張有譽	一七五
復雲居晦山和尚	吳偉業	一七六
復雲居晦山和尚	熊維典	一七六
復雲居燕雷和尚	李道泰	一七七
與雲居燕雷大師	袁懋芹	一七七
復雲居燕雷大師	吳孔安	一八〇
候雲居燕雷和尚	熊遠寄	一八〇
候雲居燕雷和尚	許延邵	一八一

請大定師回山監院書	熊士龍	一八二
與蘇子瞻	釋了元	一八二
與龍圖學士耿公延禧	釋克勤	一八三
與月堂禪師	釋師一	一八三
諭眷屬常慧常錦常潮常鍊常因暨		
合山大衆當家師	釋洪斷	一八三
答熊青嶼居士	釋觀衡	一八四
與端伯黃元公居士	釋觀衡	一八四
復味白老師	釋觀衡	一八四
與味白老師	釋觀衡	一八五
答晦公方丈	釋弘禮	一八五
復晦侄和尚	釋弘儲	一八六
復晦兄和尚	釋正畧	一八七
復晦兄和尚	釋濟麟	一八七
復雲居燕雷和尚	釋音可	一八八
復雲居燕雷和尚	釋明洪	一八八
答雲居燕公方丈	釋戒顯	一八九

復雲居燕侄和尚.....釋濟璞.....一九〇

卷十四

〔詩〕

雲居寺孤桐	白居易	一九一
遊雲居贈穆三十六地主	白居易	一九一
寄雲居諸長老	王貞白	一九一
過雲居寺玄福上人舊居	皮日休	一九一
和黃山谷遊雲居作	蘇 輓	一九二
登雲居作	黃庭堅	一九二
送雲居佛印禪師	秦 觀	一九二
送妙喜禪師歸雲居	李 彭	一九二
送惇上人之雲居省師	呂居仁	一九三
贈別妙喜禪師	韓駒	一九三
贈雲居雲門菴空首座	曾天游	一九三
望雲居	陸 游	一九三
過建昌望雲居山	王在晉	一九三
雲居山寺	朱謀灑	一九四

遊雲居禪院	張 位	一九四
初至雲居有感	沈 潤	一九四
初至雲居有感	羅 治	一九四
初至雲居有感	曹學佺	一九五
諸緣上人自京師往建昌雲居建刹		
賦此送之	余孟麟	一九五
諸緣上人自京師往建昌雲居建刹		
賦此送別	馮有經	一九五
諸緣上人自京師往建昌雲居建刹		
賦此送別	黃汝亨	一九六
諸緣上人自京師往建昌雲居建刹		
賦此送別	朱之蕃	一九六
諸緣上人自京師往建昌雲居建刹		
題雲居寺	朱統鉉	一九六

題雲居	蒲秉權	一九六
上雲居	蒲秉權	一九七
夜宿雲居	曾鳳儀	一九七
望雲居寄徐司馬	朱謀璋	一九七
夜宿雲居有懷社中諸子	徐中素	一九七
夜宿雲居有懷	朱謀渾	一九八
登建昌城望雲居山	朱謀轍	一九八
登雲居山寺	姜輔周	一九八
登宿雲居元日值雪有作	周國庠	一九八
登雲居步前韻	周國廉	一九八
登雲居山	汪應婁	一九九
登雲居山	陸夢龍	一九九
登雲居山	朱議徹	一九九
袁伯采鄉次公諸文學家重姪約生		
暨諸子集雲居真如寺	熊德陽	一九九
遊雲居雲門菴	熊德陽	一九九
雲居蛟頭菴	熊德陽	一〇〇

宿歐阜蓮花菴 熊維典 一〇〇
七里松夜坐懷雲居顥愚大師

得雲居晦山禪師書並詩卻寄 劉同升 一〇〇
顧夢麟 一〇〇
懷雲居願雲和尚 顧夢麟 一〇一

贈晦山大師 吳偉業 一〇一
喜晦山大師從雲居歸並序
吳偉業 一〇二
得雲居晦山大師書 吳偉業 一〇三
己亥肇秋奉祝雲居晦翁大師
文德翼 一〇三
懷雲居晦山和尚 洪周祿 一〇三
寄雲居晦山和尚 顧湄 一〇三
登雲居訪晦大師 許縵 一〇三
遊雲居呈晦山和尚 韓本駿 一〇四
題雲居山 張士璠 一〇四

初入雲居	亡	名	一一〇四	史 簡	一一〇七
冬至後二日觀雲	龔蕃錫	一一〇四	寄懷雲居燕雷和尚	吳孔安	一一〇七
雲居霧景兼懷晦山和尚	黎民貴	一一〇五	與顥愚大師夜坐明月堂	袁懋芹	一一〇七
懷雲居晦山和尚	樊維師	一一〇五	晤雲居燕雷大師	袁懋芹	一一〇八
望雲居山	米漢雯	一一〇五	家大人拏舟偕星渚宋未有業師入		
辛亥初秋祈雨雲居五龍潭謁方丈			雲居訪燕雷禪師兼休夏山麓之		
燕雷和尚	李道泰	一一〇五	休菴避暑夜行臨別命賦		
聖水塘祈雨應夢詩	李道泰	一一〇六	庚子遊雲居	熊遠寄	一一〇八
祈雨雲居龍潭謁燕雷和尚	許延邵	一一〇六	辛亥初夏重遊雲居登絕頂有感	熊遠寄	一一〇八
奉祝雲居晦大師	姚 佺	一一〇六	奉懷晦老和尚二首	文行遠	一一〇九
請雲居晦山和尚開法薦福	史 白	一一〇六	重陽登雲居山	袁懋芹	一一〇九
晤雲居燕雷和尚話舊	史 白	一一〇七	遊雲居石屋	劉盟欽	一一〇九
遊雲居山次子升黃社兄韻	馬 驥	一一〇七	秋日登雲居呈燕雷和尚	李 鼎	一一〇九
晤雲居燕雷大師兼之靈隱	郭賢操	一一〇八	巖山漫詠	郭賢操	一一〇九
寄石與上人	郭賢操	一一〇九			

卷十五

〔詩〕

寄懷縣令	釋了元	一一一
次韻雲居詮上人有感	釋德洪	一一一
清侍者自長沙歸雲居來辭且乞偈	釋德洪	一一一
余歛目想見清侍者自窩田莊拄	釋常慧	一一四
策而上將及到天亭回視諸峰如	釋通詰	一一五
關種所作廬山夕陽圖	釋德洪	一一一
贈成上人之雲居	釋德洪	一二二
太原還見明於洪水上藍問明別後	釋弘儲	一一五
嘗寓則曰十年客雲居感嘆其高	釋如璽	一一五
遁作此	釋德洪	一二二
示若平禪人住雲門菴	釋克勤	一二二
題雲居寺壁	釋圓悟	一二二
遊雲居懷古	釋真可	一二二
示雲居常元禪人	釋德清	一二三
過雲居真如寺	釋圓信	一二三

雲居復古二首	釋洪斷	一一三	
初遊雲居作	釋觀衡	一一三	
淨土咏	圓通頌	釋觀衡	一一四
訊候顥愚大師	釋道盛	一一四	
同青嶼先生五龍潭看水	釋音可	一一四	
雲居山咏二首	釋常慧	一一四	
挽顥愚和尚	釋通詰	一一五	
山居	釋如璽	一一五	
題聖水塘	釋具圓	一一五	
寄雲居願侄和尚	釋弘儲	一一五	
讀天童老和尚壁間句有引	釋戒顯	一一五	
復次一絕	釋戒顯	一一六	
祝熊青嶼老居士八十	釋戒顯	一一六	
請兩轍驗紀事有引	釋戒顯	一一六	
收禾苦雨行有引	釋戒顯	一一七	
答太倉顧麟士寄詩	釋戒顯	一一七	

除夕	元旦有引	釋戒顯	一一八
酬南康徐伯羽太尊		釋戒顯	一一八
咏雲居二首		釋戒顯	一一九
贈黎天錫居士	裁禾	釋戒顯	一一九
贈建昌令魏竟甫居士		釋戒顯	一一九
登雲居五老峯絕頂		釋戒顯	一一九
答史白也居士來韻		釋戒顯	一一〇
祝熊季納居士六十		釋戒顯	一一〇
返歐峯宿熊約生大居士齋閣		釋戒顯	一一〇
丙午冬到雲居喜新禪堂落成		釋戒顯	一一〇
.....	
訪雲門祖剎		釋戒顯	一二二
寄雲居願兄和尚		釋正嵒	一二二
訪雲居晦兄和尚		釋濟潤	一二三
壽雲居晦兄和尚		釋濟茲	一二三
書贈雲居燕姪和尚	釋濟萃		一二三

寄懷雲居晦山和尚		釋法淳	一二三
讀諸緣和尚詩書感		釋元鵬	一二三
元旦禮顯愚和尚塔		釋元鵬	一二三
卽韻酬史爾力先生之贈		釋元鵬	一二三
酬熊季納居士		釋元鵬	一二三
喜悟史白也居士		釋元鵬	一二三
奉迓老人開法薦福次史白也韻	
答袁伯采居士來韻		釋元鵬	一二三
奉送老人由安國赴四祖請時辛丑		釋元鵬	一二四
二月朔日也		釋元鵬	一二四
辛丑秋山堂禪師塔頭上供	
.....	
訪雲門祖剎		釋元鵬	一二四
掃保安壽椿禪師塔		釋元鵬	一二四
丁未春方丈落成次韻		釋元鵬	一二五
賀贈熊居士北上		釋元鵬	一二五
酬李霍翁邑侯		釋元鵬	一二五

登歐頂五老峯	釋元鵬	一一五	
庚戌除夕	釋元鵬	一一五	
辛亥元旦	山居四咏	釋元鵬	一一六
宿雲門寺喜佛殿藏經閣山門僧堂		釋元濂	一一八
族新書贈暎明禪社兄	釋元鵬	一一六	
贈友詣雲居晦和尚席下秉戒兼度			
三旬	釋天植	一二六	
夜話雲居方丈	釋定嵩	一二七	
賀雲居燕兄和尚	釋超宗	一二七	
寄懷雲居燕兄和尚	釋超宗	一二七	
祝雲居燕兄和尚大壽	釋智鎔	一二七	
客靈山送燕兄和尚歸雲居			
釋元遠	一一七		
賀雲居新和尚繼席	釋元器	一二八	
次韻送燕翁法兄和尚歸雲居			
釋元輿	一二八		
己酉立秋二日送燕翁和尚歸雲居			

十韻
己酉立秋二日送燕翁和尚歸雲居
十韻
己酉季夏喜雲居燕翁和尚詣靈山

恭祝老人大壽承賦飛來峯行一

篇次韻奉酬兼惜別
釋正瑞
別雲居燕翁和尚
釋元斐
寓靈隱送雲居燕翁和尚歸西江

釋海遂
釋顯赤
登雲居山
己酉秋日送別燕翁和尚
釋等璉
重遊雲居
釋本翔
靈隱老和尚壽塔建在雲居辛亥冬
杪垂成恭賦志喜
釋成殊
和前題
和前題
釋元鵬
釋常源
釋常樸

和前題	釋願成	一一一
寄懷晦山和尚	釋正智	一一一
奉輓晦山和尚	釋超直	一一一
丙申秋登雲居兼贈燕翁和尚	釋元迴	一一一
寄懷晦山和尚	釋讀徹	一一一

卷十六

〔集景詩〕

溫泉	王安石	一三三
溫泉	朱熹	一三三
講經臺	蒲秉權	一三三
咏雲居高橋	蒲秉權	一三三
講經臺	朱統鉞	一三四

五龍潭	雲頂田	一三四
復合神鐘	鄭州璽	一三四
雲頂田	楊士元	一三五
明月湖	趙之後	一二五

羅漢塔	雲頂田	趙之俊	一三五
碧溪橋	神宗御筆	朱門馴	一三六
明月湖		陳忠	一三六
羅漢垣		熊士龍	一三六
鉢盂峰		熊維政	一三六
五龍潭		雷之朝	一三七
溫泉		白居易	一三七

卷十七

〔集景詩〕

碧溪橋	五龍潭	石鼓	蒲秉權	一三七
碧溪橋			朱統鉞	一三七
五龍潭			朱統鉞	一三八
明月湖	石鼓峰		熊德陽	一三八

明月湖	五龍潭	釋戒顯	一三九
趙州關	佛印橋	釋戒顯	一三九
石鼓峰	鉢盂峰	釋戒顯	一四〇

羅漢塔	雲頂田	釋戒顯	一四〇
蓮花城	羅漢牆	釋戒顯	一四一
神宗御筆	復合神鐘	釋戒顯	一四一
明月湖		釋元鵬	一四一
五龍潭	趙州關	釋元鵬	一四二
佛印橋	石鼓峰	釋元鵬	一四二
鉢盂峰		釋元鵬	一四二
羅漢塔	雲頂田	釋元鵬	一四三
蓮花城	羅漢牆	釋元鵬	一四三
神宗御筆	復合神鐘	釋元鵬	一四四
石雞峰		釋元鵬	一四四
明月湖	五龍潭	釋音住	一四五
趙州關	佛印橋	釋音住	一四五
石鼓峰	鉢盂峯	釋音住	一四五
講經臺		釋音住	一四五
蓮花城	雲頂田	釋音住	一四六
羅漢塔	神宗御筆	釋音住	一四六

五龍潭	石鼓峯	釋智鎔	一四七
明月湖		釋海曙	一四七
蓮花城		釋海曙	一四八
五龍潭	羅漢塔	釋常源	一四八
明月湖	五龍潭	釋常駿	一四八
蓮花城	雲頂田	釋常楷	一四九
五龍潭		釋法讚	一四九
石雞峰		釋法讚	一四九
和晦和尚	雲頂田韻	釋德大	一四九
客壽樟菴	望雲居山奉次晦翁老人		
雲頂田韻		釋昌裴	一五〇
明月湖		釋元鳳	一五〇
石鼓峯	復合神鐘	釋德大	一五〇
石鼓峰		釋宗本	一五一

無心杏 講經臺 石鼓 釋戒顯 一一五一

石船 釋戒顯 一一五一
石船 釋元鵬 一一五一

明月湖 釋音可 一一五一
趙州關 安樂殿 釋音可 一一五一

石鼓峰 碧溪橋 釋正印 一一五一
雲居石船 釋音明 一一五一

雲居石船 釋性愷 一一五一
趙州關 釋智浪 一一五一

碧溪橋 釋智浪 一一五三
碧溪橋 石鼓峰 釋性照 一一五三

雲頂田 復合鐘 釋通徹 一一五三
石鼓峰 釋定圓 一一五三

石鼓峰 釋定圓 一一五三
〔歌〕

插田歌 釋觀衡 一二五四

明月湖歌贈雲居晦兄和尚 釋濟潤 一二六三

〔詞〕

癸巳除夕示禪衆烹露地白牛詞

釋戒顯 一一六四
從寒溪歸雲居道中和東坡赤壁賦

釋戒顯 一一六四
從寒溪歸雲居道中和東坡赤壁賦

卷十八

〔贊〕

雲居佛印禪師磨衲贊 蘇 輓 一二六五
顥愚和尚像贊 金之俊 一二六六

雲居晦山和尚道影贊 張立廉 一二六六
雲居山諸緣大師贊 黃端伯 一二六六

自讚 釋克勤 一二六六
雲居佛印禪師贊 釋德清 一二六六

顥愚和尚贊 釋道盛 一二六七
愍山大師小像贊 釋觀衡 一二六七

諸緣和尚像贊 釋戒顯 一二六七
顥愚和尚像贊 釋戒顯 一二六七

顥愚和尚像贊 釋戒顯 一二六七
釋濟潤 一二六三

題雲居長老受業師太空老宿道影	釋戒顯	二六八
靈隱老和尚贊	釋元鵬	二六八
顓愚大師贊	釋真果	二六八

〔跋〕

雲居豁糧公案跋語	熊德陽	二七〇
雲居志跋	吳巒	二七一
跋東坡與佛印帖	釋德洪	二七一
跋雲居佛印帖	釋株宏	二七一
跋蘇子瞻詩	釋株宏	二七二
跋陸大宗伯雲居募疏	釋真可	二七二
禪門鍛鍊說自跋	釋戒顯	二七二
跋熊約翁家藏綸言	釋戒顯	二七三

卷十九

〔雜錄〕

祭熊青嶼給諫文	釋戒顯	二七四
祭熊季納四居士文	釋戒顯	二七五


詳 目

奠季納熊居士	釋元鵬	二七五
奠無回熊居士	釋元鵬	二七五
祭靈隱晦山老和尚文	熊維典	二七六
卷二十	事略	二七七
附錄·重建雲居山真如寺事略	釋虛雲	二八〇


虛雲老和尚鑑定
岑學呂居士重編

雲居山志

殿寶雄大寺如真山居雲




天王殿懷雲樓全景



大雄寶殿中三尊大佛之一——釋迦牟尼如來



明萬曆洪斷諸緣和尙中興本寺銅鑄千華佛繞毘盧像現供奉藏經樓上



藏經樓上之木雕西方三聖像



大雄寶殿後 — 海島觀世音菩薩像






者尊八十側供內殿寶雄大




海會塔 戊戌詹勵吾居士發起興建





室住尙和老雲虛是便者指所頭箭

景全蓬茅居雲




藏經樓外貌





鐘樓及客堂全景

清初中興本寺晦山戒顯和尚全身塔




趙州關碑石景織



佛印橋畔之談心石及石牀



明月湖畔壁巖石刻飛虹橋及詩



明月飛湖虹飄橋後橋後水景



雲

居

山

全

圖


































雲居山志總目

卷首	一	七												
山圖	序	緣起												
卷之一														
山水	山	湖	峯	潭	城	溪	嶺	均	石	泉	塘	窩	塢	
坑	街	坪	洞											
卷之二														
剏建	殿	堂	樓閣	牆	橋	坊	關	亭	寺院	壇廟				
卷之三														
住持														
卷之四														
過化														
	四八	一一	五六											
				九	——	一五								
					一六	——	四七							

卷之五……五七——六七 34

事蹟 塔院

卷之六……六八——七〇

勅翰 藝文

卷之七……七一——八三

寺記

卷之八……八四——一〇五

錄序

卷之九……一〇六十一——一〇

啓

卷之十……一一一——一八

疏

卷之十一……一一九——一二二

銘

卷之十二.....一二三——一二六

賦

卷之十三.....一二七——一四六

書問

卷之十四.....一四七——一六六

詩

卷之十五.....一六七——一八八

詩

卷之十六.....一八九——一九四

集景詩

卷之十七.....一九五——二二〇

集景詩 歌 詞

卷之十八.....二二一——二二九

贊 跋

靈居山志總目

四

卷之十九.....二三〇——二三二

雜錄

卷之二十.....二三三——二三八

事畧

雲居山志總目終

雲居山志重修流通序

癸巳夏。予養疴廬山。有數禪人自雲居至。稱日寇中原時。以茲山險峻。易伏游兵。遂將真如寺全部焚燬。今祇見毘盧遮那大銅佛。兀坐荒烟蔓草中。苟不重修。將湮滅矣。予聞之惻然。念雲居自唐代元和年開山。爲歷代祖師最勝道場。道容以後。道膺繼之。其後齊禪師。融禪師。老夫舜。佛印了元。圓悟克勤。大慧宗杲。皆曾任該寺住持。而過化者。有趙州諗。雲門偃。古塔主。洞山聰。圓通秀。真淨文。居士中如白居易。皮日休。蘇東坡。黃山谷。秦少游。呂居仁等。不計其數。今祖師道場。零落至此。亟待重修。秋七月與居士祝華平等。至真如寺。洵如僧言。祇性福等四人住茅蓬中。以事香火。居數月。四方衲子。聞風而至者。數逾千指。僉議重修事宜。雖有殿宇舊址之可尋。而乏山志記載之考據。因志板久燬。書冊

亦絕。後於蘇州訪得殘本。漫漶殊甚。乃屬岑學呂居士考訂重輯之。略有增刪。緣舊日志書。係清代康熙初年編纂。其中文移產業。代遠年湮。久歷變更。酌爲刪去。其餘悉依舊本。以傳其真。亟事流通。免再湮滅。予自癸巳至戊戌六年之間。所有重修殿宇。再塑金容。整肅清規。耕田博飯。種種事蹟。附錄於本志之末。以便後之修志者。有所採焉。

佛曆一千九百八十六年歲次己亥孟夏釋虛雲序時年一百二十

舊序一

辛亥初秋。南州奇旱。禱祠不應。有言雲居五龍潭。昔五老人曾於講座聽法者。因與鄉民登山謁祠。蓋予綰艾綬兩載。瞻禮白雲有日。兼聞燕雷和尙高風。只於數行筆語。未隨參謁。茲乃一至雲山也。燕和尙彌天朗朗。如湖中明月照人。繼晦老人席。遠近傾參。茶話之餘。出雲居志相示。且索一叙。予謂自瑤田至絕頂。目接步經。林表圖披。指中點出趙州一關。道俗不閉。明月泓水。常流人間。一部志書。和尙未嘗秘不示人。盤跚嶺白。行吟湖青。石橋坐月。茆屋編烟。一篇灑落文字。蘇黃不用著筆。今日乃欲使簿書俗吏。弄筆墨於雲竇月窟中。不第雲月笑人。恐蘇黃諸公後。不宜有此唐笑耳。和尙笑曰。山川文字。原相表裏。居士欲以雙眸讀雲山現成文字。不如使世人以現成文字讀雲山。則自瑤田一舉足。便曉得趙州道俗不閉關。更使湖心流水。去在人間。臨流掬清。皆有明月在胸中。卽他州殊郡。得翻閱此志。拈道容諸古德一則。皆作白雲天際想矣。燕和尙以此志。大鳴山上石鼓。灌入人間耳中。予不得不爲雷門一進捧槌也。

知建昌縣事閩龍潯子交李道泰撰

舊序二

雲居山志。顥愚師嘗欲爲之。已移紫竹林弗果。晦山師又欲爲之。已移四祖。又弗果。今燕雷師卓錫是山。始克爲之。志成見委以序。序曰。是志也。既有以續唐宋累代相傳之燈。又足以成顥晦兩師未竟之志。一舉而衆美具焉。誰之功歟。慨自萬曆間諸緣寂後。毘尼不守。寺產崩分。向非得兩師踵起。固無以振其墜緒。而非燕雷公紹隆於後。則兩師法幢。迭興迭仆。卽殘縑剩墨。一委諸伯魯之簡。誰復徵文獻哉。此以知燕公之於雲居。功不在顥晦兩師下。信不誣也。予嘗觀於雲居之陰。是爲雲門。雲居之陽。是爲鳳棲。此兩山皆祖庭離立。龍象蔚起。其於雲居也。鼎足而峙。實摹跡相銜。非惟競爽。蓋亦同條者焉。山川懷不孤之德。法門闡不二之宗。自萬曆以來。於斯爲盛。而公以筆墨收之。則又非但爲兩師之功臣而已。抑予有感焉。予嘗考於邑乘。菴院累百餘所。並登記載。不多乎哉。本其意。聊以網羅舊聞。張皇勝蹟耳。而中間名跡已湮。化爲俗壘者。或猶索驥按圖。流而諍聞。冀黃卓魯。其亦病諸。是志也成。信猶歐山之南董。堪爲艾乘之筆削。異時有修縣志者。其必取裁於此。然則公之斯舉。又將有功於邑國。非但雲居之爲烈而已。顥師往矣。請以是質之晦師。其言不必盡有當。聊亦盍各。

之義云爾。

諸緣之興復雲居。尙矣。其去也。欲迎名師碩德者主之。於是撥靜室。分插徒子。使得退息。而虛常住。使十方人覩管。意弘遠矣。去後。十方人犯法。自干刑辟。衆鳥散去。郡侯費公。仍委舊徒管領。保有寺產。二十餘年。各子孫林立。會顥愚來游。知其賢。遂相率退歸靜室。迎顥住持。以終諸緣之志。先給諫青嶼先生。實預此盟焉。此段高義。何可沒也。予序初本誌所由作。而未發明及此。故續書之。

癸丑古艾七十五翁熊維典題。

舊序三

雲居一席。雄踞西江。方內祖山。實稱弁冕。龍門佛眼。曰。雲居甲於江左。子瞻則曰。冠絕聖境。大士所廬。禪老垂五十年。皆傑出龍象。聲馳祖域。雲居之名。貫僧俗口耳者。蓋雷震而霆崩矣。奚以志爲。不知震旦清涼。支提那羅延窟。皆以雜華得傳。海上三神山。空中方廣竹林。向等寺。亦由仙釋志而著。卽本山名勝。開建至今。不知其幾。因無記載。前人嘉言懿德。埋蝕於荒烟剝蘚中者。可勝道哉。就雲居而言。雲居志不可少也。余從辛卯忝主斯席。烟蓑雨笠。

敲擊衲子之暇。時憤憤以編志爲事。旣得艾志載歐峯山川名人題咏頗悉。并蒐討宗書世典。幾成集矣。會經營建殿。苦無寧晷。兼草雲居賦成。薄刻流通。遂爾停擱。辛丑再圖從事。遂移笠雙峯。近復繼住靈隱矣。今丁未。鵬子主席之十載。忽傳一編至。則約翁所定。鵬子手輯雲居志也。余額手嘆曰。是余十餘年裒纂而未就者。今乃成書。真發吾覆矣。然熊氏伯莊宋妙喜時爲歐峯內護。今青嶼先生季納居士。及約翁一門。世篤金湯。約翁苦行柴桑。博綜內外典。慮雲居祖跡。或致湮沈。不惜焚膏與鵬子彙成大帙。一展卷間。山靈人物。藝文著作。并諸緣老人載造功勳。傘居古佛住持行德。犧然具備。雖不敢謂漁獵無遺。而什存七八。四百州天上雲居。不自此頓開生面乎。昌黎曰。莫爲之後。雖盛弗傳。余與約翁鵬子豈惟藉此以塞責。竊喜雲居諸祖。與金石同永矣。

靈隱晦山沙門戒顯述

緣起


自馬大師西江騰踏。選佛場開。竿影星羅。法道冠冕乎華夏。數傳而後。門槌拍板。雲居又冠冕乎神州。若佛果敕黃之親到。坡翁涪老之記載。僉謂四百州天上雲居。覺範亦曰天上歐峯寺。歷四十餘代。諸老麟奔鳳翥。響震傳燈。明中葉時。祖席荒夷。典冊碑碣。蕪沒殆盡。幸晦老人重振禪宗。住持十載。著作既繁。兼加考究。累欲編纂。以經營土木。未果成書。鵬忝繼席。匡領之暇。苦心搜採。積之十年。據實詮次。薄成卷帙。非敢上侔撰輯。聊綜古今著述之萬一。以存名山形勝。先哲風規云爾。

燕叟元鵬識

雲居山志卷之一

一 山水

東華七山。五嶽與夫崑崙。其源本于阿耨達池。然此地形最高。分天下之山爲四支。而東華之地當其一。其東北之脉。或起或伏。伏而爲地。起而爲山。有崑崙焉。崑崙衍脉分條。截河源自康姑天竺。通巴西之嚴鵬山。分枝三派。左股發脉爲荆襄之南衛。渡祁山起。南嶽衡山。按分野形勢。南嶽爲荆揚鼻祖。負終南而跨荆湘。蜿蜒逶迤。東至庾嶺。分三支。中支入甌越。過靈隱而窮普陀。南支進五嶺。由寶林而盡羅浮。北支則下西江。逕分寧走雙龍。百丈寶峯至海昏界。而結雲居山。是知雲居山者。乃南嶽之盡龍也。朱晦庵詩云。千尋幾千仞。據地三百里。又晏殊云。盤址崔嵬。層淵祕邃。中畫郡國。外羅邑居。靈真之所迴翔。川涂之所衝要。蘇軾亦云。雲居冠世絕境。大士所廬。其中湖開明月。漱巒寺門。三面平田。四山帶礪。巖巒盤曲。宛如蓮瓣蠶抱。晦老人題爲蓮華城。山之奇觀萬狀。秀曠天然。形容莫盡。茲略撮其古今傳頌之大概者。



歐山 傳歐峩將軍爲楚將。以懷王入秦。而後裔康王避難于廬山谷中。王翦追之急。天忽雷雨烈風。剪人馬不能前。因名康王谷。而將軍覓嗣主不得。遂遯此山修煉得道。仙隱始著。故名歐山。

雲居山 卽歐阜山。常出雲。遂名雲居。層巒疊巘。望若插霄。及躡頂入山。復爲平地。羣峯環抱。天然城郭。田園陂澤。鷄犬白雲。真若桃源蹊徑。

雲居第一山 距窰田寺西數十步。按山圖古有石牌坊。今廢。

鉢盂山 適當明月湖前。端正周圓。天然作案。

龜山 蛇山 距本寺西後半里。

鷄籠山 在半山茶庵後嶺。

橫架山。香花山。



明月湖 形如圓月。恰拱寺門。每初日出。金光蕩漾。注射臺殿。縣令蒲秉權建石坊。榜曰明月湖。



五老峯 在寺後。乃常往來脉主山。儼然雪頂。潦倒唐突虛空。故名。

龍珠峯 圓整秀聳。後枕玉屏。爲選佛場主山。

象王峯 爲本寺外案山。宛如雙象鼻捲。且頭尾完全。因名。

袈裟峯 青嶂數重。層摺左臂。在寺東百步。

石鼓峯 其形正圓。面如削成。恰橫在架上。而面向常住。上有佛名四字。相傳佛印遺蹟。

碧雲峰



五龍潭 四山之水。匯于明月湖。湖流瀉出三里許。將出口。忽有龍潭五。天然鑿圓。而第五

潭乃火龍渦。瀑布懸掛。遠望如匹練。與匡廬爭勝。



蓮華城 雲居外望。山勢最雄。纔一進嶺。坦然平正。四面峯圍。儼如蓮華。又宛如一大城郭。內有湖田。祖庭絕勝。故晦老和尚題曰。千層臺擁浮幢寺。十丈蓮攢泰華圖。



碧溪 近寺前。佛印橋跨其上。

改溪 峴居改溪流於青龍山。環匯於明月湖。

九溪 距寺十五里。雲門庵水匯歸其中。



到嶺 在關房均上。

鵠公嶺 當寺南路在更衣亭下。

走馬嶺 督府劉公綻入山。鄉人謂不便駒從。遂更騎徑上。

荷葉嶺 在雲居第一山上行數武。

廣家嶺



月明均 距寺西半里

關房均 距寺東半里

陽均 爲本山過峽處。閃跌平地。復起五老峯。聳出天半。

馬頸均 距寺後二十里。爲本山來脉。長二百餘步。下瞰懸崖。幾數百丈。往來者到此。無不股慄。

豐源均 出寺均 在雲門寺左一里

佛頂均

談心石 平整瑩潔。時登其上。古翠潺湲。談鋒愈壯。近佛印橋。

磬石 擊之鏗然清響絕倫。

木魚石 在膺祖塔前。游人敲打如聆魚梵。

仙人脚石 長三尺許。腳頭寬平中凹後窄。近洪覺道場。

龜石 蛇石 在大龍潭上流。左右交挽。關鎖水口。其形肖極。

歡喜石 在廣家嶺當寺東路。唯此處陡削。擔簦者一坐此石。遠盼匡廬。頓爾忘倦。往來衲子云。一上歡喜石。終身不出山。

石船 在關房左角。形如小舶。泝流欲上可坐數人。

鷄石 在祇樹堂右。隻立嶺表。

頭巾石 馬嘴石 五墮石 鷹嘴石 俱在半山



慧泉 在山門內。冰凝棍凍。汲此以供雲厨。

馬尾水 近剃頭庵 白水 在象王峯背

溫泉 在後山。相距十里。唐宋名士俱有題咏。

塘



仰天塘 爲寺前山。唐奎章禪師塔於此。明嘉靖間重修。今改名仰天坪。

聖水塘 旱不爲燄。澇不爲溢。故名。庵據塘畔。距寺西偏十里。

窩



仰天窩 距寺左一里

九龍窩 近陽均爲本山外障

塢



龍昌塢 相傳徧融禪師曾結廬習靜於此。在寺右。今址存。

坑



井頭坑 禪風坑 打石坑 釣橋坑 野豬坑

街

石街 由鵝公嶺上至三門五六里許。石板結砌。寬平方整。行人德之。

坪

大湖坪 古有塔石尙存

小湖坪 距雲門寺二里

洞

雷門洞 在小湖坪之右。拔地千尋。嶮峻對峙。寒風叱咤。廝雨輒應。故名。

雲居山志卷之二

一 朔建

雲居殿堂歷奉勅建。髹形絢爛。琳碧精熒。宋唐最盛。劫運既經。荒榛極目。蓋今昔盛衰。氣數使然。但祖庭湮沒。有千百數十年者。茲山法燈闡於明葉。古制規模。大有可徵。晏相國碣云。登奧阼者五百室。迄今相傳。故老雲居四十八丹墀。當年法席之隆。可想而知也。斷公重建以來。參居正當廢弛之候。更新壞墮。修補罅漏。晦老和尙開闢禪荒。重新雄殿。飯堂香積。先殿落成。宋唐之觀漸復。半千衲子可栖。凡興廢堂寮。仍爲列出。



大雄殿 萬曆二十七年。住持洪斷奉敕建。後日久梁柱摧折。順治十年己亥三月初四。住持戒顯重新鼎建。

藏經殿 大明神宗頒賜藏經供此。上覆鐵瓦。中奉滲金毗盧像。住持洪斷奉敕建。

天王殿 在大殿前。建昌益藩題額。梵王帝釋洪斷建。殿南面額懸天上雲居。奉堂王時敏

書。

方丈 康熙七年戊申八月廿日住持元鵬剏建在選佛場東掖正向明月湖。



禪堂 陸樹聲題額選佛場住持洪斷建康熙四年丙午八月十七日住持元鵬重新鼎建。

千在堂 康熙六年丁未正月初三日住持元鵬剏建在選佛場西掖正向明月湖內懸雲來獅座額給諫熊德陽題。

祖師堂

毗尼堂

伽藍堂

雲水堂

明月堂

爲燕居之所住持觀衡建相國金之後題額無心古佛傘居常自題聯「朗千古
月閒萬重雲」

應供堂 內春秋住持戒顯新建

香積堂 內申春住持戒顯新建

雲農寮 戊戌年住持戒顯新建

耆宿寮 丙午年住持元鵬新建

浴堂 辛丑秋住持元鵬新建

田寮 癸卯冬住持元鵬新建

米寮 槽廠 壬寅夏住持元鵬新建



鐘樓 鼓樓



羅漢牆 壴居率衆輦石磊成。堅緻不朽。石劙有自書羅漢塙三大字。
山門 相國張位書額雲居禪林



佛印橋 以佛印鼎建得名。今號碧溪橋。而內翰蘇東坡詩云「欲與白雲論心事。碧溪橋下水潺潺」。則是在佛印時先名碧溪矣。而紫柏詩云「佛印橋頭夜月涼」。必追思佛印後。以人名在寺前。

安樂橋 從五老峯下西溪。有二里許。水漲行走罕便。傘居率衆砌岸丈許。架石成橋。橋下以石刻。自書八字曰。再遇游鮮主。蓋豆函乃名其橋曰。安樂。

呼童橋 在山南甃以石。跨馬尾水。世傳唐膺禪師於此呼童故名。

獨石橋 跨明月湖水爲本山內水口。

高橋 舊有名宿題咏

撞山橋 駕龍潭水口今墩存



石坊 萬曆年月日邑宰蒲秉權鼎建

趙州關 以趙州訪膺祖。曾到雲居故名。至今叢蘚石壁上趙州關三大字尚存。故蘇內翰有「一可行至趙州關。怪底山頭更有山」之句。



到天亭 洪覺範有詩爲此山最高處。

葛公亭 石柱石板堅固完整。兵憲記瞻葛公寅亮建。今廢。

更衣亭 距葛公亭上二里。昔名賢問道更衣於此。

三高亭 何徹入鍾山定林寺。通內典。二兄求點並從栖遁。號曰何氏三高。亦曾栖息雲居。後人追思芳躅。因建此亭也。

孤雲亭 沈灌有云「投明恰到孤雲亭。」載縣志。



瑤田寺 傳是道容禪師開建。又名保定寺。重建事實載給諫熊維典碑。

雲門寺 爲匡真禪師靜隱處。妙喜亦誅茆爲鉗錘衲子之所。時竹庵珪同此度夏。作頌古編集寶訓。明葉廢爲民業。順治十四年。映明性浹贖回。鼎建佛殿。興復因緣。載給諫熊維典記晦老人碑文。

龍溪寺 明萬曆四十三年。琬公耆宿建。寺之古基。湮沒蕩盡。後移建溪口。

西泉寺 距真如常住十里。在山後半嶺。

仰天窩 卽上靜室

石屋 卽下靜室

臥龍庵 在五龍潭側。佛印禪師建。今址存

關房 祇樹堂 姜庵 休庵 金鈴寺 寶蓋寺

塔前庵 諸緣和尚四世孫崇修。師諱道思。遵其祖訓。及其眷屬。捨爲常住下院。順治十七年九月住持元鵬重建。晦老人額曰安隱菴。

茶菴 圓通菴 惠泉菴 蘿蔔菴 樂牧菴 上方菴 顚菴 慧雲菴 斗田菴

山塘菴 蛟頭菴 光隱寺 花菴 龍護菴 鄭家寺

上菴 距常住十餘里

下菴 菴後古有祖塔三座近山堂庄菴

青蘿菴 **雲居菴** **地藏菴** **冷水菴** **壽樟菴** **維摩菴** **果樹菴** **梅子菴** **石湖菴**

聽雲菴 **須彌菴** **佛祖菴** **百福菴** **興隆菴** **觀音菴** **剃頭菴** **九溪院** **崇福菴**

木坑菴 **遊龍寺**

方廣舍 在浮梁縣景德鎮。院主侯建師同蓮社劉清可居士衆姓居士立交單。捨爲雲居

常住脚院。

觀音菴 在省城瑠璃門外上浮子塘。開山無量師諱元閎暨徒明見照心德本正念。徒孫惺慧于康熙四年十二月初六日立交單。捨爲雲居常住脚院。



龍王廟 **歐山將軍廟** **安樂殿** **樹神村**

雲居庫 在縣治雷家巷。昔雲居盛時。冊糧四百石有零。每輸納俱停榻於此。至今稱雲居
庫巷。縣志備載。

雲居山志卷之三

一 住持

雲居燈錄所載。有洪州雲居。江州雲居。南康雲居。其實總屬建昌。然天台武林。亦有雲居。武林吳山上。有雲居寺。初號聖水寺。因蘇子瞻守杭時。佛印禪師往返。掛錫其中。後杭人追慕。改號雲居。中有中峯畫像。遺履茲所志者。建昌之雲居山也。晴嵐雨霧。絕異他山。俯瞰則瓊綿滿界。仰睇則錦練迷空。橫拖直豎。目眩心駭。故山以得名。凡諸師生緣受業機語。嗣法乃至本山住持過化。舉揚法要。陞座上堂。如雷如霆。五燈震吼。然有言者全錄浩瀚。具載良難。若無者。言句缺乏。俟蒐討續入。

開山道容禪師

全誨大師

道簡禪師

雲居膺嗣卽晏
碑達簡下倣此

懷嶽禪師

雲居
膺嗣

住滿禪師

雲居
膺嗣

弘覺道膺禪師

洞山
价嗣

昌禪師

雲居膺嗣
卽道昌

住緣禪師

雲居嶽嗣
卽德緣

智深禪師

雲居
滿嗣

清錫禪師	法嗣
慧震禪師	雲居
元裕禪師	事載相國
義德禪師	能嗣
融禪師	雲門
自寶禪師	五祖
佛印了元禪師	開嗣先
守億禪師	泐潭
仲和禪師	澄嗣
元祐禪師	佛印
圓悟克勤禪師	南嗣
宗振禪師	勤悟
頑菴德昇禪師	佛眼
圓禪師	遠嗣
普雲自圓禪師	珪龍翔

道齊禪師	欽嗣
契環禪師	清涼
義能禪師	報慈言嗣
紹遵禪師	齊嗣
慶禪師	五祖
曉舜禪師	洞山
文慶海印禪師	聰嗣
思文禪師	元印
仗錫修己禪師	谷
高菴善悟禪師	雲蓋
大慧宗杲禪師	龍門
法如禪師	眼嗣
祖禪師	勤悟
普雲自圓禪師	高菴

蓬菴德會禪師

石頭
同嗣

如山禪師

泐潭
乾嗣

卽菴慈覺禪師

臥龍
先嗣

掩室善開禪師

松源
岳嗣

小隱師大禪師

江心一
山萬嗣

諸緣洪斷和尚

天界
興陽

方融如璽禪師

盛嗣
雲居

燕雷元鵬禪師

詞嗣

梵琮禪師

靈隱佛
照光嗣

一翁慶如禪師

天童
荷傑嗣

志禪師

仗錫
己嗣

呆菴普莊禪師

一天
少室

慈舟方念禪師

潤嗣

顓愚觀衡和尚

靈慈
禮嗣

晦山戒顯禪師

少室
潤嗣

佛日明熙禪師

靈慈
禮嗣

道膺禪師。幽州玉田王氏子。童卯出家於范陽延壽寺。二十五成大僧。其師令習聲聞篇聚。

非其好。棄之游方。至翠微問道。會有僧自豫章來。盛稱洞山法席。師遂造焉。山問甚處來。師曰。翠微來。山曰。翠微有何言句示徒。師曰。翠微供養羅漢。某甲問供養羅漢。羅漢還來否。微曰。你每日噇個甚麼。山曰。實有此語否。師曰。有。山曰。不虛參見作家來「上堂」舉。先師道地獄未是苦。向此衣線下。不明大事。却是最苦。師曰。汝等既在這箇行流。十分去九。不較多也。更著些子精彩便是。上座不屈平生行脚。不辜負叢林。古人道欲得保住此。

事。須向高高山頂立。深深海底行。方有些子氣息。汝若大事未辦。且須履踐玄途。「上堂」得者不輕微。明者不賤用。識者不咨嗟。解者無厭惡。從天降下則貧窮。從地湧出則富貴。門裏出身易。身裏出門難。動則埋身千丈。不動則當處生苗。一言迥脫。獨拔當時。言語不要多。多則無用處。僧問有人衣錦繡入來。見和尙後。爲甚寸絲不掛。師曰。直得瑠璃殿上行。撲倒也須粉碎。師曾令侍者送袴與一住菴道者。道者曰。自有娘生袴。竟不受。師再令侍者問娘未生時。著個甚麼。道者無語。後遷化有舍利三斗三升。持似於師。師曰。直饒得八斛四斗。不如當時下得一轉語好。「上堂」汝等諸人。直饒學得佛邊事。早是錯用心。不見古人講得天花落。石點頭。亦不干自己事。自餘是甚麼。擬將有限身心。向無限中用。如將方木逗圓孔。多少清訛。若無恁麼事。饒你攢花簇錦。亦無用處。未離情識在。一切事須向這裏去盡。若有一毫去不盡。卽被塵累。豈況更多。差之毫釐。過犯山嶽。不見古人道。學處不玄。盡是流俗。閨閣中物。捨不得。俱爲滲漏。直須向這裏認取。認去認來。併盡一切事。始得無過。如人頭頭上了。物物上通。祇喚作了事人。終不喚作尊貴。將知尊貴一路自別。不見道從門入者非寶。棒上不成龍。知麼。師爲南昌鍾王尊之。願爲世世師。天復元年秋示疾。明年正月三日問侍者曰。今日是幾日。初三。師曰三十年後。但道「祇這是。」乃

告寂。謚弘覺禪師。

道簡禪師。范陽人也。久入先雲居之室。密受真印。而分掌寺務。典司樵爨。以臘高堂中爲第一座。屬先雲居將順寂。主事請問誰堪繼嗣。居曰。堂中簡主事。雖承言而意不在師。謂令揀擇可當說法者。僉曰。第二座可。然且備禮。先請第一座。若讓讓卽堅請第二座。師旣密承授記。畧不辭免。卽自持道具入方丈。攝衆演法。主事等不懷素志。因循規式。師察其情。乃潛棄去。其夜安樂樹神號泣。詰旦主事大衆奔至麥莊。悔過哀請歸院。衆聞空中連聲唱曰。和尚來也。僧問路逢猛虎時如何。師曰。千人萬人不逢。爲甚麼闔黎偏逢。問孤峯獨宿時如何。師曰。閑却七間僧堂不宿。阿誰教汝孤峯獨宿。師後無疾而寂。塔於本山。

昌禪師。僧問相逢不相識時如何。師曰。旣相逢。爲甚麼不相識。問紅爐猛燄時如何。師曰。裏頭是甚麼。問不受商量時如何。師曰。來作甚麼。曰來亦不商量。師曰。空來何益。問方丈前容身時如何。師曰。汝身大小。

懷嶽禪師。僧問如何是大圓鏡。師曰。不鑑照。曰。忽遇四方八面來時作麼生。師曰。胡來胡現。漢來漢現。曰。大好不鑑照。師便打。

清錫禪師。僧問如何是雲居境。師曰。汝喚甚麼作境。曰。如何是境中人。師曰。適來向汝道甚

麼。有廖天使入院。見供法眼真。乃問曰。真前是甚麼果子。師曰假果子。曰既是假果子。何以供養真。師曰也祇要天使識假。

道齊禪師。本州金氏子。徧歷禪會。學心未息。後於上監院主經藏法燈。一日謂師曰。有人問我西來意。答他不東不西。藏主作麼生會。師對曰不東不西。燈曰。與麼會又爭得。曰道齊。祇恁麼。未審和尚尊意如何。燈曰。他家自有兒孫。將來用得恰好。火梅煦來參。師問汝從甚麼來。若從僧堂來。卽是謾語。不從僧堂來。又是自瞞。汝從甚處來。梅於言下頓悟。師著語要搜玄拈。古代別等。盛行叢林。至道三年丁酉九月示疾。聲鐘集衆。乃云老僧三處住持三十餘年。十方兄弟。相聚話道。主事頭首。勤心贊助。老僧今日火風相逼。特與諸人相別。諸人還見麼。今日若見。是末後方便。諸人向甚麼處見。爲向四大五陰處見。六入十二處見。這裏若見。可謂雲居山二十年間。後學有賴。吾去後。山門大衆。分付契瓌。開堂住持。凡事勤而行之。各自努力。珍重大衆。纔散。師歸西挾而逝。塔於本山。

契瓌禪師。僧問。路逢死蛇。莫打殺。無底籃子盛。將歸。未審師還受也無。師曰。你甚麼得來。曰。恁麼則不虛施也。師曰。却且提取去。問如何是佛。師曰。讚歎不及。曰。莫祇這個便是麼。師

曰不令人讚歎。

曉舜禪師。瑞州人也。少年粗猛。忽悟浮幻。投師出家。乃修細行。參洞山。一日如武昌行乞。首謁劉公居士家。士高行爲時所敬。意所與奪。莫不從之。師時年少。不知其飽參。頗易之。士曰。老漢有一問。若相契。卽開疏。如不契。卽請還山。遂問古鏡未磨時如何。師曰。黑似漆。士曰。磨後如何。師曰。照天照地。士長揖曰。且請上人還山。拂袖入宅。師懨懨卽還洞山。山問其故。師具言其事。山曰。你問我。我與你道。師理前問。山曰。此去漢陽不遠。師進後語。山曰。黃鶴樓前鸚鵡洲。師於言下大悟。機鋒不可觸。住後「上堂」。聞說佛法兩字。早是污我耳目。諸人未跨雲居門。脚跟下好與三十棒。雖然如是。也是爲衆竭力。「上堂」舉夾山道閻市門頭。識取天子。百草頭上。薦取老僧。雲居卽不然。婦搖機軋。兒弄口喝。」「上堂」諸方有弄蛇頭。撥虎尾。跳大海。劍刃裏藏身。雲居這裏。寒天熱水洗脚。夜間脫襪打睡。早朝旋打行纏。風吹籬倒。喚人夫劈篾縛起。「上堂」雲居不會禪。洗脚上床眠。冬瓜直籠。瓠子曲彎彎。

了元佛印禪師。字覺老。饒州浮梁林氏子。誕生之時。祥光上燭。鬚髮爪齒。宛然具體。風骨爽拔。孩孺異常。發言成章。語合經史。閩里先生稱曰神童。年將頂角博覽典墳。卷不再舒。洞

明今古。才思俊邁。風韻飄然。志慕空宗。投師出家。試經圓具。感悟夙習。卽徧參游。廬山謁開先暹道者。暹自負其號海上橫行。俯視後進。師與問答捷給。乃稱賞。時年十九。又謁圓通訥公。訥曰。骨格已似雪竇。後來之俊也。時書記懷璉方應詔。以師繼其職。江州承天虛席。又以師當選。郡將少之。訥曰。元齒少而德壯。雖萬耆衲。不可折也。師自承天遷淮之斗方。廬山之開先歸宗。潤州之金山焦山江西之大仰。又住雲居。凡四十年間。德化縕素縉紳之賢者。多與之游。四衆傾向。名動朝野。神宗賜高麗磨衲金鉢。以旌師德。僧問。如何是佛。師曰。木頭雕不就。曰。恁麼則皆是虛妄也。師曰。梵音深遠。令人樂聞。問。如何是諸佛說不到底法。師曰。蟻子解尋腥處走。蒼蠅偏向臭邊飛。曰。學人未曉。請師再指。師曰。九萬里鵬從海出。一千年鶴遠天歸。問。達摩面壁。意旨如何。師曰。閉口深藏舌。曰。學人未曉。師曰。一言已出。駟馬難追。問。大修行人。還入地獄也無。師曰。在裏許。曰。大作業人。還上天堂也無。師曰。蝦跳不出斗。曰。恁麼則鑊湯爐炭吹教滅。劍樹刀山喝使摧。師曰。自作自受。「上堂」寒風撼。竹聲乾。水凍魚行澁。林疎鳥宿難。早是嚴霜威重。那堪行客衣單。休思紫陌花千朵。且擁紅爐火一攢。放下茱萸。空中竹橛。倒却迦葉。門前刹竿。直下更云不會。算來也太無端。郭功甫到雲居。請師陞座。公拈香云。覺地相逢一何早。鵠臭汗衫今脫了。要識

雲居一句玄珍重後園驥喫草召大眾云此一瓣香熏天炙地去也師曰今日不著便被

這漢當面塗糊便打乃曰謝公千里來相訪共話東山竹徑深借與一龍騎出洞若逢天旱便爲霖擲拄杖下座公拜起師曰收得龍麼公曰已在這裏師曰作麼生騎公擺手作

舞便行師撫掌曰祇有這漢猶較些子西塞帥王公韶自以殺業深重祈爲澡雪請說法師炷香云此香爲殺人不眨眼上將軍立地成佛大居士韶亦悠然意消高麗僧統義天

航海至明州傳云棄王位出家上疏乞遍歷叢林問法受道有詔朝奉郎楊傑次公館伴所經吳中諸刹皆餞如王臣禮到師處師床坐納其大展次公驚問故師曰義天亦異國

僧耳僧至叢林規繩如是不可易也衆姓出家同名釋子自非買崔盧門閥相高安問貴種次公曰卑之少狗時宜求異諸方亦豈覺老心哉師曰不然屈道隨俗諸方先失一隻眼何以示華夏師法乎朝廷聞之以師爲知大體元符元年正月初四日聽客語有會于心軒渠一笑而化世壽六十七坐五十有二夏

自寶禪師上堂總恁麼風恬浪靜那裏得來忽遇洪波浩渺白浪滔天當恁麼時覓個水手也難得衆中莫有把舵者麼衆無對師曰賺殺一船人

守億禪師上堂馬祖纔陞堂雄峯便卷席春風一陣來滿地花狼籍便下座

文慶海印禪師。僧問如何是函蓋乾坤句。師曰合。曰如何是隨波逐浪句。師曰闊。曰如何是截斷衆流句。師曰窄。「上堂」道本無爲。法非延促。一念萬年。千古在目。月白風恬。山青水綠。法法現前。頭頭具足。祖意教意。非直非曲。要識廬陵米價。會取山前麥熟。以拂子擊禪床。下座。

元祐禪師。信州王氏子。僧問如何是道林的旨。師曰拶。曰隨流認得性。無喜亦無憂。師曰汝皮袋重多少。曰高著眼看。師曰自領出去。王安上者。舒王之弟。問法於師。以雲居延之。師曰。爲攜此骨歸葬峯頂耳。登輿而去。問如何是祖師西來意。師曰胡天雪壓玉麒麟。僧問如龜藏六時如何。師曰。文彩已彰。曰爭奈處處無踪跡。師曰。一任拖泥帶水。曰。便與麼去時如何。師曰果然。「上堂」過去諸如來。更不再勘。現前諸菩薩放過。卽不可。未來修學人謾他一點不得。所以教中道。若人欲了知三世一切佛。應觀法界性。一切惟心造。雖然如是。雲居門下。正是金屑落眼。師疾。諸方欲分塔者。因剏三塔。紹聖二年七月七日夜。集衆說偈而化。世壽六十有六。坐四十有二夏。

高庵善悟禪師。洋州李氏子。年十一去家。業經得度。有夙慧。聞沖禪師舉武帝問達磨因緣。如獲舊物。遽曰。我旣廓然。何聖之有。沖異其語。勉之南詢。蒙授記於龍門。一日有僧被蛇

傷足。佛眼問曰。既是龍門爲甚麼却被蛇咬。師卽應曰。果然現大人相。眼益器之後。傳此語到昭覺圓悟云。龍門有此僧也。東山法道未寂寥耳。住後上堂。少林面壁。懷藏東土西天。歐阜陞堂。充塞四維上下。致使山巍巍而砥掌平。水昏昏而常自清。華非鑿而結空果。風不搖而片葉零。人無法而得咨問。佛無心而更可成。野蔬淡飯延時日。任運隨緣道自靈。畢竟如何。日午打三更。一日拈南院。喧啄同時語云。且作麼生是喧啄同時。眼若得明。其用自備。又道作家不喧啄。喧啄同時失。何故不喧啄。所以道子若喧吼。其母卽喪。諸人還明得麼。乃頌曰。子若喧吼。其母卽喪。全歸其子。十方通暢。大用現前理自然。何必起心作模樣。更若不會。雲居拄杖。中際能公往來舒州龍門。雲居有年。未有所證。一日普請擇菜次。師忽以貓兒擲能懷中。能擬議。師攔胸踏倒。於是大事洞明。

克勤佛果禪師。建炎丁未歲十一月初六日奉敕住雲居。入院至方丈云。個是天下叢林。鍛佛祖大洪爐。奕世宗師烹衲子。鉗錘底處。所以山僧到此。潦潦倒倒。波波挈挈。百事無能。向個裏如何施設。然雖如是。當爐不避火。還委悉麼。銅頭鐵額如龍虎。看取金圈栗棘蓬。「上堂。」耳聞不如眼見。眼辨不如手親。四百州天上雲居。今之日竹與親到巖巒回合。林嶺崔嵬。白雲深處見樓臺。恍如別造一世界。到個裏亦不必窮玄說妙。立境立機。論性

論心。究理究事。只如今人分上。一切坐斷。正當恁麼時。親到一句作麼生道。祖佛妙玄窮徹底。白雲深處好安居。復云。賜得雲居養病身。半千衲子倍相親。攀蘿直上青天上。投老依栖安樂神。蔣運使寄雲居山三大字。仍請陞座。乃云。法法圓融。心心虛寂。大包無外。文彩已彰。細入無間。眼莫能觀。所以道萬法是心光。諸緣唯性曉。本無迷悟人。只要今日了。云云。復有頌云。衆峯盤屈屋耽耽。天上泓澄雨碧潭。渴驥怒貌三大字。高踪千古振名藍。「上堂」孤迥迥。峭巍巍。面前案山子。昔聞弘覺言。今朝親到此。有時生層雲。有時霑微雨。逗到大晴明。依前突兀地。且道是心耶。是境耶。爲復在心內。爲復在心外。鴛鴦繡出從君看。不把金針度與人。舉果首座立僧上堂云。鶻兒未出窠。已有摩嘒志。虎子未絕乳。已有食牛氣。況復羽翼成。況復爪牙備。奮迅卽驚群。八面清風起。一條脊梁硬似鐵。一條白棒掀天地。相與建法幢。展衲僧巴鼻。舉丹霞裕長老爲人入室上堂云。大衆摩醯首羅。揭示頂門正眼。摩竭陁國全提向上鉗鎗。壁立萬仞。絕承當。孤光燬破四天下。所以道殺人刀。活人劍。將錯就錯。上古之風規。亦是今時之樞要。和泥合水。若論殺人刀。不存毫末。活人劍。橫屍萬里。須知殺中有活。擒縱人天。活中有殺。權衡佛祖。直饒說得殺活。倒黨分明。山僧更問你覓劍在。正恁麼時。見麼。萬仞懸崖垂隻手。高峯共唱太平歌。復云。趙州道。趙

州南石橋北觀音院裏有彌勒祖師留下一隻履直至如今覓不得諸人要知落處麼。問取丹霞和尚。師一日入室。問隆藏主。見見之時。見非是見。見猶離見。見不能及。舉拳云。還見麼。主云見。師云頭上安頭。主聞脫然契證。師叱曰。見個甚麼。主曰竹密不妨流水過。師肯之。尋俾掌藏教。有問師曰。隆藏主柔易若此。何能爲哉。師曰。瞌睡虎耳。郡王趙令衿居士任南康政成事簡。多與禪衲遊公堂間。維摩詰丈室適師居歐阜。公欣然就鑪鉢。師不少假。公固請。師曰。此事要得相應。直須是死一回始得。公默契。嘗自疏之其畧曰。家貧遭劫。誰知盡底不存。空屋無人。幾度賊來亦打。師見囑令加護。

宗杲大慧禪師。時圜悟詔住雲居。師往省觀。至山次日。卽請爲第一座。時會中多龍象。以圜悟久虛座元。俟師之來。頗有不平之心。及冬至。秉拂昭覺。元禪師出衆。問云。眉間掛劍時。如何。師曰。血濺梵天。圜悟於座。以手約住云。住住。問得極好。答得更奇。元乃歸衆。叢林由是改觀。首座寮一日因遺火燒却簾。次日告香拈狗子無佛性話云。欲識佛性義。當觀時節因緣。雲門大師道若是得底人。道火何曾燒著口。遂作頌云。趙州狗子無佛性。道火何曾口被燒。昨夜忽然簾上發。南海波斯鼻孔焦。秉拂上堂。夷門昔日呈家醜。拈出無邊栗棘蓬。今日歐峯孤頂上。幸然無事又相逢。相逢卽且置。其中事作麼生。若有人道得一句。

便請各自歸堂。若道不得打葛藤謾諸人去也。諸佛未出世時。有即今巴鼻。一人人頂門上輝大寶光。出世後消息全無。一個個脚跟下縱橫十字。有佛處不得住。無佛處急走過。拶着不來三千里外。穿却鼻孔。到這裏直饒置無邊刹境於一毛頭上。只這一毛頭。從甚麼處得來。納百億須彌盧於一粒粟中。只這一粒粟。又向甚麼處安著。如是則易。不如是則難。休于言上覓。莫向意中求。如是則難。不如是則易。識取鈎頭意。莫論定盤星。衲僧拄杖子。拈得便行。切忌向平地上釘椿搖鱗。所以道神光不昧。萬古徽猷。入此門來。莫存知解。只如一大藏教說。權說實。說頓說漸。說有說無。乃至西天此土。諸代祖師。古往今來。一切知識。種種言說。種種作用。且道是知解耶。非知解耶。若定奪得出。秉拂上座。一場敗闕。若定奪不出。潑第二杓惡水去也。喝一喝云是甚麼有照用。無向背。只許老胡知。不許老胡會。睦州一向擔板。趙州貴買賤賣。獨有三聖瞎驢。至今遭人笑怪。須彌山突出諸人額角邊。大海水灌入諸人鼻孔裏。卽且置。馬大師道。自從胡亂後。三十年不曾少鹽醬。又作麼生商量。還委悉麼。多年曆日無人問。蓦地拈來愁殺人。喝一喝。復舉岩頭參德山。纔跨門便問。是凡是聖。山便喝。頭便禮拜。後有僧舉似洞山。山云。若不是燶公。也大難承當。燶頭聞云。洞山老漢。不識好惡。錯下名言。我當時一手擡。一手揭。師云。猛虎不識穿。穿中身。

死。蛟龍不怖劍。劍下身亡。巖頭雖於虎窪中。有透脫一路。向劍刃上。有出身之機。若仔細檢點將來。猶欠悟在只。今還有爲岩頭作主底麼。出來與果上座相見。良久。喝一喝。拍一拍。云泊合停因長智。一日到西積莊。遇一暫到僧。從圓通來云。因看首座頌。女子出定話有個悟處。特來求首座印證。師云。你去不是。僧云。某甲未說見處。爲甚麼道不是。師再三搖手云。是不是。僧懨懼而退。師四十歲十月至雲居首座寮。幾二載。四十二歲春遷古雲門基址上雲門菴住。至四十六歲二月方入閩。在雲居前後六年。與竹菴珪禪師共作頌古一百一十則。集禪林寶訓。

宗振禪師。丹丘人也。依圓悟於雲居。一日仰瞻鐘閣。倏然契證有詰之者。師酬以三偈。其後曰。我有一機。直下示伊。青天霹靂。電卷星馳。德山臨濟。棒喝徒施。不傳之妙。於汝何虧。悟見大悅。竟以節操自高。道望愈重。嘗書壁曰。住在千峯最上層。年將耳順任騰騰。免教名字挂人齒。甘作今朝百拙僧。

法如禪師。丹丘胡氏子。依護國瑞師祝髮。登具徧參淮右諸宗匠。晚至龍門。以平日所證白佛眼。眼曰。此皆學解。非究竟事。欲了生死。當求妙悟。師駭然諦信。一日命主香積。以道業未辦。因辭。眼勉曰。姑就職。其中大有人爲汝說法。未幾晨興。開廚門。望見聖僧。契所未證。

卽白佛眼。眼曰。這裏還見聖僧麼。師詣前問訊。又手而立。眼曰。向汝道大有人爲汝說法。住後上堂。一法若有。毘盧墮在凡夫。萬法若無。普賢失其境界。向者裏有無俱遺。得失兩亡。直得十方諸佛不見諸人。且道十二時中向甚麼處安身立命。披蓑側立千峯外。引水澆蔬五老前。上堂乾坤之內。宇宙之間。中有一寶。秘在形山。雲居又且不然。乾坤之內。宇宙之間。中有一寶。擲下拄杖云。大衆也須識取。

頑菴德昇禪師。漢州何氏子。二十得度。習講久之。棄謁文殊道禪師。問佛法省要。殊示偈曰。契丹打破波斯寨。奪得寶珠村裏賣。十字街頭窮乞兒。腰間掛個風流袋。師擬對。殊曰。莫錯。師退參三年。方得旨趣。往見佛性。機不投。入閩至鼓山禮觀。便問國師。不跨石門句意旨如何。竹菴應聲喝曰。閑言語。師卽領悟。住後僧問。應真不借高超三界。卽不問。如何是無位真人。師曰。聞時富貴。見後貧窮。曰擡頭須掩耳。側掌便翻身。師曰。無位真人在甚麼處。曰。老大宗師。話頭也不識。師曰。放你三十棒。

普雲自圓禪師。綿州雍氏子。年十九。試經得度。留教苑五祀。出關南下。歷扣諸大尊宿。始詣龍門。一日於廊廡間覩繪胡人有省。夜白高菴。菴舉法眼偈曰。頭戴貂鼠帽。腰懸羊角錐。語不令人會。須得人譯之。復夾火示之曰。我爲汝譯了也。於是大法明了。呈偈曰。外國言

音不可窮。起雲亭下一時通。口門廣大無邊際。吞盡楊岐栗棘蓬。
蓬菴德會禪師。重慶府何氏子。上堂舉教中道。若見諸相非。相卽見如來。作麼生是非相底
道理。佯走詐羞偷眼觀。竹門斜掩半枝華。

率菴梵琮禪師上堂。舉百丈野狐話。百丈野狐石女無夫。一回淚出滄海乾枯。頌佛降生曰。
且喜今朝降獨尊。率菴無物慶生辰。只將一霎薔薇露。洗出湖山淨法身。

一翁慶如禪師上堂。意能剗句。句能剗意。意句交馳。討甚巴鼻。盡力道不得底句。不是河南。
便是河北。衲僧聞得。與麼告報。十個有五雙。鼻孔冷笑。遂拈拄杖云。雲居拄杖子。黨理不
黨親。卓一下云。雪巢初冷夜。雲鬢未梳時。上堂豁開戶牖。當軒無人。搊動雷門。憑誰側耳。
裴相國印心於老黃檗。溫伯雪目擊於魯仲尼。衲僧門下。檢點將來。猶在半途。知縣學士。
今日到來雲居。如何與伊相見。拈拄杖畫一畫云。萬重關鎖盡。一劍倚天寒。晚年退隱南
昌西山。示寂塔於定林。壽六十八。夏四十九。

卽菴慈覺禪師赴雲居請。江州上堂。舉雪峯因閩王問擬。欲蓋一所佛殿。去時如何。峯曰。大
王何不蓋取一所空王殿。王曰。請師樣子。峯展两手。雲門云。一舉四十九。師頌曰。空王殿
樣子。雪峯展两手。添得老韶陽。一舉四十九。總是面南看北斗。讚船子和尚偈曰。三十餘

年在藥山。鬼家活計豈能傳。當時不得夾山老。你且耐煩。擣破船。

掩室善開禪師上堂。舉密菴因應菴華問如何是正法眼藏。密菴答云。破沙盆。師頌曰。法眼拈來早自謾。無端錯對破沙盆。而今徧界難遮掩。殃害叢林累子孫。後松源貽書。囑以大法。道播寰海。時號松源明燈。

呆菴普莊禪師上堂。指法座云。從上先德。推此一位。以爲極則。莊上座見得。只是尋常上堂。舉世尊覩明星公案。師云。我要問釋迦老子。喚甚麼作智慧德相。喚甚麼作妄想執着。擬議不來。劈脊便棒。衆中還有與釋迦老子出氣者麼。拈拄杖。不敢望汝與釋迦老子出氣。只是自己鼻孔摸索得着也好。靠拄杖。上堂拈劄靈山付囑。驗在今日。佛法徧天下。皇恩無盡。時師應高僧選。辭衆上堂。我來雲中居。五載如轉燭。所樂在忘緣。心心自知足。虛名不可逃。驛書到空谷。笑看折脚鎗。委置憑誰續。摩挲七尺藤。光彩耀人目。用捨各有時。去住何拘束。珍重同道流。共唱清平曲。蓦拈拄杖召大衆云。且道清平曲是什麼腔調。喝一喝。下座。

小隱師大禪師。終日方丈危坐。澹如也。剃除鬚髮。侍者鑄生爭取藏之。信次卽生舍利。嘗送信禪人偈曰。信是道源功德母。藥如有驗不消多。上人直下承當得。佛祖安能奈爾何。

慈舟方念禪師。曾赴雲居之請。載五燈續畧。

諸緣洪斷和尚。重興道場。按師行狀。係真定府藁城縣張氏子。幼失怙恃。鞠於祖母。年十四。長齋時徧融老師住柏林寺。師日爲諸友送供至寺。自袖日糧就寺禮佛菩薩像。從夜徹曉。不臥僧房。已分糧盡。則推故不食。其自小畏罪福如此。融師愛重之。年十五。逢蜀中法界別傳二師。教以念佛法門。次年參胡焦禮及仙法師。有弟祥叔可奉姑。師屢求出家。姑不許。十七歲時。六街迎神。神附生童到家。勸捨出俗。母猶不忍。神迫之。始得出家。禮崇效寺與陽爲師。陽先夢一大龜入其室。周行三十步。旦而師至。陽喜曰。此英靈子。將名重寰宇耶。深器之。師志崇淨業。請玉峯老師講四十八願。十六觀經。嘗留伏牛山廣悟莊學法華經。方過二卷。身體俱腫。或勸止之。師益加精勵。至四卷。定中聞喊聲趕虎。虎卽啣其頭。似噬過心膂。忽惺悟。渾身汗浹。自此學諸經。如若夢覺。少有留難。時年十八九歲也。又過龜背石。攢米打七。初至眼疾不能覩物者七日。然亦不放參期場。人衆七百患傷寒。逝者六十餘人。師亦病。直聲念佛六晝夜。始得憶念相續。身意輕安。仍帶病入堂打七。過冬。至石梯攢單住靜。二十歲過黑龍撞住靜一年。次過武當。上終南金州平裏縣小道河相從者四十五人。次過雲霧山。嘗食麥麌。打七。工夫猛切。昏散不入。復至峨嵋。燃指及燃項香。

尅苦參究。過南嶽遇大千師翁。付授大衣。圓戒於北京賓湖老師。負米百里供衆二載。二十六歲游南海。復至伏牛。遇大方老師。發明楞嚴三觀。又上五臺保山住靜。水齋三年。至今人稱水齋坪也。因看黃檗心要。舉道明趁六祖公案。忽然有省。後中貴邀入北京西山古基萬佛堂。國太后開建十方海會叢林。請松谷法師講演。自住萬佛堂。約十三年。未自肯也。歲壬辰。年四十三。晤紫柏尊者于京師。聞最憐清淨金仙地。反作豪門放牧場之句。遂荷策雲居。結茆閉關。跪誦華嚴三載。丙申慈聖皇太后遣中貴到山賜紫衣等物。始建方丈。辛丑建大殿。壬寅進京。皇太后施金鑄滲金千佛寶蓮盧舍那大佛。癸卯遇達觀大師之難。同逮獄中。夏末蒙恩放還。迎佛返山。乙巳進京。國母頒賜龍藏。戊申回山。建藏殿。安奉。請僧檢閱。師嘗曰。往古賢聖歷劫勤劬。興隆三寶。余又何爲。自愚自尊。是以往返南北。六經大難。心未少退。每見前輩成大業者。皆慈心廣大。不厭勞苦。故所至儀矩可觀。好自放逸者。則垂老無成。師住萬佛堂時。行人換去燭蠟。見天神現形查考。又行人以破甌供佛。小白龍降神責治。師在南嶽上側刀峯住靜。忽一日崩裂之聲。震動岩谷。而師觀念自若。稍霽視之。一壁如截。鄉人謂出龍也。將至雲居。神鐘不擊自鳴者三日。建殿掄材。風拔神木。欲伐古樹。靈鵠移巢。師初到五台。午夜夢寐中。見文殊乘獅子現相空中。放光攝

授。身心通泰。然數者事出偶然。何足爲師輕重。而梗述師之生平。又不可不據見聞而摭及焉。師生嘉靖庚戌。童真入道。雖五處開山。意在福慧雙修。悟明祖道。年近六十。方始置被。計長坐不臥者四十餘年。嘗持咒以求加被。竟無所證。因知悟道之難。非騰口舌輕履踐所可彷彿也。己酉請古心和尙登山。弘演毘尼。時千華三昧老人董勸戒席。江楚傾動。且一切行本。皆深心回向西方。與師契洽。庚戌過京。辛亥還山。請革空法師講楞嚴諸經論。王子復往萬佛堂。不復來矣。前後往來。經營雲居二十年。行忍荼蓼。心同佛祖。殿堂寮舍。凡叢林所宜有者。內外煥然。續置莊田。約計七處。命徒屬輩各依莊菴靜住。商請十方高僧住持常住。以公法化。冀唐宋盛時氣象。將見於今日矣。經營事竣。功成不處。杖笠飄然。復逸老于萬壽堂。其他詳之別傳。

顯愚衡和尙。霸州趙氏子。母夢大士而娠。產時白衣重包。小兒嬉戲。愛供養觀世音。十二歲持素。十四歲遇五臺惠仁老宿得度。依獅子窟空印大師。一苦一行。以取銘焉。三年如一日。參達觀雪浪雲栖大師。咸深器重。悟楞嚴於天台華頂。大省豁於乾岡月夜。入曹溪禮憨山老人。老人曰。此予三十年目所罕見者。師至南嶽。遇毒下邵陵就醫。老人尋至南嶽。歎曰。禪門不幸得一個半個。真實爲生死人。斯人而有斯疾。豈龍天厭薄法門乎。貽詩曰。

『四大久觀如泡影。病魔何處可潛踪。古人自有安閒法。只在無生一念中。』後師復觀老人于湖東。參侍半月。老人贈以法語千言。師在邵陵。結菴雙清磯後。顏曰五臺不忘本也。多著述。丁丑至雲居。見山水豐厚。峯巒環拱。曰。此南方北山。天下第一道場也。遂應請。時雲居緣盡法弛。師振揚宗風。重新觀聽。見聞感悟。頓成淨土。居七年。先是法璽正印關主。閉關于豫章黃牛洲。聞師至南昌。破關出謁。甚相契合。侍歸雲居。受圓通法門。勸事拮据。師旋領青原。至石城。卓錫城北山陽。顏曰紫竹林。以月公居五臺竹林。亦猶邵陵五臺名菴之意。聲動吳楚。道洽王侯。竹林之盛。軼于邵陵雲居云。丙戌示寂。弟子方融迎龕塔于雲居。先兩地爭塔。請覺浪大師主盟。大師云。和尚重興雲居。與膺祖同功。則築窣堵波以彰道化。烏可已也。竹林建衣鉢塔以慰輿情。議乃定。師一生領悟在楞嚴。立教在音聞。所居禮圓通頤懾法莊嚴。時號圓通宗。清苦茹淡。身親畚插。不事外緣。咸稱古佛。常坐禪大傘下。又署傘居和尚。遇毒之後。自稱病僧。生平言句行狀。詳之紫竹林年譜。及塔銘等編。師遷塔後。憩住靖安龍門。興建同安。修飾巨麗。不孤師提警之深衷云。

方融如璽禪師。涼州任氏子。傘居在蘇溪桂柏園開戒。師自浣溪來參。受具後。侍傘居於歐阜。領監院事。傘居制期。命學人參觀音大士。卽今在甚麼處。解制問師。師曰。『多言人怪。』

少言癡語。默何嘗不是伊。若問觀音真住處。梅花幾點洩天機。」參居問洩甚天機。師曰。露結爲霜。又曰。覓得些兒便休歇。囊裏斷乎不走蟹。古渠何處是觀音。梨花偏打元宵節。傘居去石城。署師爲東堂首座。匡衆雲居。後嗣天界盛和尙。繼席二載。旋歸關中。遷寂建塔於廬山之二層崖。

晦山顯禪師。師在廬山歸宗寺受請。辛卯十二月廿一甲子進院。衆護法暨本寺大衆。合山耆舊。請陞座。僧問靈峯劍未離寶匣。已截斷天下人舌頭。拄杖子拈出當陽。重振起西江號令。和尚今日高登猊座。正令當行。如何是出格爲人的句。師云歐峯頂上輒花毬。進云獅音出格。綈龍起別轉。旌旗試道看。師云明月湖頭飛鐵鳳。進云可謂五彩雲濤輝佛日。一湖明月照靈山。師云不妨領話。問昔日匡山賓。今朝雲居主。向日爲賓則不問。今日爲主事如何。師云。眉毛撐宇宙。進云如何是雲居境。師云殿閣吼風雷。進云如何是雲居人。師云個個爲龍爲象。進云謝師答話。師云也是萬里崖州。乃卓拄杖云。向上一事離相離名。破塵破的。猛如香象。利過吹毛。若使盡其機用。奮巨靈劈華之鋒。擒拏不着。竭金翅吞龍之勢。啞啄無門。縱饒千聖出頭。直得退身有分。惟有上無攀仰。下絕已躬底出格衲僧。一連連得。便能收大地于毫芒。竭千江于一渴。隨處作主。建大法城。遇緣卽宗。篆大法印。

卽如江西法窟。雲居道場。自道容開山。及膺簡諸祖舜老夫。佛印圓悟妙喜高菴。清涼齊輩四十餘代。諸老皆以蓋世龍象。蹴踏此山。或樹新豐之幟。或轟濟北之雷。或燄發雲門。或光騰法眼。一一麟奔鳳逸。海驛山翻。光耀拈花。聲馳祖域。山僧行解荒涼。何敢仰希高步。旣承推轂。當爐不避火迸。畧借諸祖威光。與諸仁通個消息。不見百丈大師云。靈光獨耀。迥脫根塵。體露真常。不拘文字。於斯薦得。便知各各頂門正眼。如十日並照。千鏡高懸。亘古亘今。輝天燭地。雖然如是。作家禪將一句全提。不遇知音。翻成捏目。且迥脫一句作麼生道。復卓拄杖。喝一喝云。玉離荆岫寒光動。劍出豐城紫氣橫。下座結冬制。請陞座。僧問湖天瑞靄。選佛場開。透網金鱗。作麼生接。師云。當陽拋毒餌。進云。三級浪高轟霹靂。掀鑿衝破禹門秋。師云。一釣三山連六鰲。進云。白日騎牛穿市過。石獅水面輶花毬。師云。好彩不可放過。僧掩耳歸位。師云。大好消息。乃云。威音前聖箭。那容落二落三。項頸上眼睛。從來透七透八。石火猶嫌遲鈍。電光未許追攀。若是真過量人。一擊鐵圍粉碎。山僧自到雲居。三開爐鞴。今冬禪制。更斬新條。擴開廣大禪堂。包納十方龍象。果見望睂門而大嚼。見鞭影而爭先。山僧不惜大展旗鎗。興雲布陣。生擒角虎。活捉獮龍。看取峯雲攬浪底。掀翻選佛之場。戴角擎頭底。撞破漫天之網。錦標先奪。始見英靈神劍高提。方稱好手。且道

現前大眾那個是孟八郎漢。震威一喝。云一喝腦門齊迸裂。人人項上挂金鎖。下座解制。請陞座。舉德山云。踞虎頭收虎尾。第一句下明宗旨。雲居九旬。大開爐鞴。力鍛英雄。功不浪施。已見一十餘人龍驤豹變。令行告滿。又當正月有半。鼴吼鯨轟可謂虎頭已踞。虎尾已收。山僧要問諸人。第一句下宗旨作麼生明。有明得底出衆道看。僧纔出禮拜。師擲拄杖便下座。僧一喝。師劈面掌云。箭過西天十萬里。僧云放過老漢三十棒。師便歸方丈。丁酉臘月廿五大殿落成陞座。師云佛殿鼎新法王端拱。有掌擎佛刹脚踏龍宮的。請出相見。僧問大悲手現宮殿。維摩掌擎香積。意旨如何。師云現前佛國。進云古殿重新將什麼爲人。師卓拄杖。云賴有拄杖子。進云向後又作麼生。師云東山下左邊底進云。波斯仰面看。師云仰面看天不見天。進云錦上鋪花又一重。師打云這棒少不得。迺云支那四百州。天上雲居。龍蟠鳳舞。臘月二十五。雲門一曲動地驚天。雲居今日鼎建法幢。發揮祖令。朗空中日月布格外風雷。直得月湖龍瀑。舞起半空。象生鉢盂。迴身下拜。膺簡佛印圓悟大慧諸老。暨四十八代禪祖。一個個拍掌當陽。點胸點肋。據實而論。山僧赤手空拳。並無伎倆。全由衆職化土。四臣効力。諸道分權。遂見金盤湧地。玉柱撐天。雄殿鼎新。光揚歐阜。更須知衲僧分上。各有尊貴一路。何故功成莖草存回互。金殿重重顯至尊。舉鵬首座繼

席雲居。上堂師云黃檗宗旨。滹沱建立。臨濟玄要。瞎驢滅却。父子祖孫。遞代相承。見謂各
行一路。殊不知建立的奮跨海機。籌扶起釋迦老子。剝竿虎頭戴角。掃滅的打背翻筋斗。
撲破大庾嶺頭鉢子。錦上鋪花。雲居多年滯貨。也有個爛木橛。破沙盆。攤向明月湖頭。一
任脚下瞎驢扶起掃滅。七花八裂。山僧但高眠青嶂。坐斷白雲。圖作個無事道人。不見道
兒孫得力室內。不知如何是得力的事。九萬里鵬從海出。一千年鶴遠天歸。下座回至雲
居。顓愚老和尚新塔上供。師云。顓翁老和尚道傳空印。宗立圓通。一生自號傘居。四海共
稱古佛。藏身歐阜。已云深固靈根。建塔東岡。久矣安貞應地。何期祝融肆虐。別建高幢。雲
霧同居。個是幻中之幻。星辰可摘。更爲天上之天。某遠從曹水。來自青原。勺水瓣香。聊陳
供養。不嫌蛇足。重宣一偈。天上雲居更有天。奎章塔畔共雲煙。閩山粵水還歸供。永仰浮
圖億萬年。

燕雷鵬禪師。辛丑秋四祖老和尚命住雲居。八月初七日兩序全闔山耆宿。闔院大眾。請上
堂。聞堂大師白椎云。法筵龍象衆。當觀第一義。師云。第一義諦。金鑄遜空。覲露當陽。劍鋒
有路。還有互相證據者麼。僧問。雲居今日法道蔚興。臨濟一枝。重添光彩。如何是革新條
令一句。還云。榔標敲開金殿月。進云。燈燈續焰。直指人心。如何是直指處。師云。洞庭無蓋。

進云。上無攀仰。下絕己躬的人來。又作麼生。師云。腦後更抽釘。僧便喝。師云。祇如象王峯與蓮華峯門額。又且如何。進云。兩輪交互照。一月映千江。師云。放過一着。問優鉢花開。法雷震地。聯芳續焰。卽不問。舊店新開。事若何。師曰。出爐彈子峯頭放。打落天邊彩鳳兒。進云。正令當行。十方坐斷。從上列祖。安向甚處。師云。露柱裏藏身。進云。如何是出格爲人底句。師云。赤手扶起破沙盆。進云。作家宗師。天然有在。師云。也不消得問。如何是奪人不奪境。師云。上座痛領一頓。進云。如何是奪境不奪人。師云。青天遭白棒。進云。如何是奪人不奪奪。師云。山河吐吞。佛祖攢眉。進云。如何是人境俱不奪。師云。一片月生海。幾家人上樓。乃揮拂云。衲僧巴鼻。迥脫名模。融豁聖凡。權衡佛祖。惟是純鋼鑄就鐵舌銅睛。驅耕夫牛靈苗蕃茂。奪饑人食。博地膨脹。八大龍王尊富。分文不值。萬斛帝青燦爛。撲碎無遺。所以先哲云。靈光不昧。萬古徽猷。入此門來。莫存知解膺祖開宗。以此一言獨拔。寶鏡高懸。四十八代諸老。亦以此奮通天作用。蓋代威寧。竭海崩崖。獅回象轉。鵬上座。今日被堂頭老漢。攬上虎背。大似奮臂當車。在衆兄弟門前。只得班門弄斧。撮土爲金。鼠肝驢胃。行看動地驚天。變金成土。脂帽鶻衫。跔在撻撻堆裏。使人人額晃千珠。光吞昊日。鯨轟八面。吒咤神州。到個裏如何話會。畫拄杖云。橫按鎧鏹全正令。太平寰宇。斬癡頑。結椎云。諦觀法王法。

法王法如是。下座上浴堂梁陞座。問今日歐山將軍與安樂樹神大戰雲居。天上和尚作麼生收攝。師云。穿却鼻孔進云。竿頭收放。雖云作者別轉旗鎗。更請道看。師云。髑髏粉碎。進云。恁麼則寶劍當鋒無觸犯。倒騎石馬出天門。師云。倒騎石馬。固是驚羣作弊。閻提劍。閃個中誰副此機。僧拂坐具云。傾翻巢穴去也。師打云。不妨好手。乃云。薑草現瓊樓玉殿。一竿修竹建精藍。須彌燈王是甚麼。聞家具。鐵餽餡木札爻。一回飲水一回噎。香積如來百雜碎。透過雙鎖關。別展天機一路。金牛頻笑舞。錦簇花攢。古靈佛放光。金圈脫穎。然後截斷跋陀契悟。非塵葛藤遍地。捉敗睦州鐸鑼鎗子。狼藉家珍。幾重公案。是世諦流傳。是向上關櫃子。卓拄杖云。阿耨達池深四十丈。濶八十丈。結制陞座。僧問雲居鉗鎗聲高海內。忽有衝關戴角底來。作麼生施設。師曰。打盡鳳麟五色髓。進云。橫按鎗鄒全正令。別展旗鎗。又若何。師云。今日院門開峯。峯頭倒卓。進云。者老漢眼光爍破四天下。師云。禁取兩片皮。乃云。但得其頭尾亦隨至。火裏蟬蟬。吞却大海三世諸佛。火焰裏轉大法輪。卓拄杖。云。眉毛在麼。火焰說法。諸佛立地聽。又卓一下云。眼睛突出。轉法聽法。熾然無間。喚甚麼作法輪。又卓一下云。斯門已成就。今各入圓明。當依如是法。復擲下拄杖云。雪峯雲門真淨三大師來也。一齊趨向文武火中着。解制陞座。師云。入荒田不換威音話。墮信手拈來。

草漆桶龍吟。還會麼。盡大地是個木上座。把住則箭穿紅影。落盡九鳥。放行則山海沸騰。縱橫十字露柱擎拳衡嶽去。踢倒湖南瞎驢。燈籠鼓掌上天台。踏殺豐干猛虎。便恁麼去。乘風奮翅鶴突層霄。噴雹揚馨。鰲翻巨浸。祇如解開布袋。正令全提一句。作麼生道。三尺黑蛇全殺活。虎頭虎尾一齊收。壬寅七月廿八日。慧山元尊宿萬松超宗龍門法璽二大師。及衆師。請爲顓愚老和尚遷塔起龕。師云。青霜面目。師表人天。紫鐵肝腸。範圍佛祖。北臺究理。無文印子打虛空。南嶽窮玄。成鏡磚磨輝大地。闢雙清之梵塢。洗盡蠻煙。證五乳之鴻猷。砥迴曹水。是凡是聖。倒翻空劫威音。入佛入魔。迸出耳門日月。道化行青原祖席。浩歸楚豫。英才補位來。天上雲居。騰踏寰區。駿骨大功不宰。碧溪流曲繞龍沙。尊貴頽然。明月堂開。擰虎嶂。惟報緣示寂夫竹林。究全軀。窀穸乎歐阜。十七年孝思昭格。光明焰發泥蟠。後此日密固靈根。移建肩鉢有子。脚下兒孫齊得力。浮圖高跨象王峯。遂彈指云。時節旣彰。請歸寶所。八月初四日封塔。師云。者古椎遜天鼻孔。徧界莫藏。如幻圓通。生緣顯煥。有時折葦飛渡。隆慶江心。有時懸跨神駒。騰驤震土。有時鷹巢示跡。閣筆僧繇。有時蛤隊橫身。喚醒天子。這回又從北地露龍頭。南方收猊尾。聲訛截斷。無位安排。直須無陰陽地爲基。間浮檀金爲井。華藏刹海爲函。總太虛爲蓋。須彌盧爲頂。祇這奉重全身。何拘




湘南潭北。然後俎豆山河。禪悅萬象。燈明日。月帷幔雲霞。時開時闔。縱教三界天人。二十五有衆生。恭敬圍繞。瞻之仰之。合掌加額曰。希有古佛。祇如功忘照泥。宴坐那伽。佛手驢腳。掀翻白練一條枯盡。怎生安奉。仍將山前片地。常住方磚。層落落影團團。以拄杖畫相云。珠龕封樹分多子。靈木迢然隱鳳鸞。丙午冬新禪堂落成。結制陞座。師云。嶄新戶牖廊大堂楹。地曠天寬。便請蹴踏。僧問七事鉤錐。家常茶飯。如何是新禪堂號令。師云。金鞭影動玉柱擎天。進云。湖天木石開生面。殺活全提起象龍。師云。高着眼。乃揮拂云。莖草現瓊樓玉殿。決定可信。瓊樓玉殿被莖草蓋却。莫被熱瞞。雲居今秋錐頭斧子。木兜瓦屑放光動地。僧堂攬入佛殿觀音。挂搭藏堂。鼓弄知事。人力草鞋似虎。扛擔如龍。戲笑怒罵。聲騰天上。響震人間。獨有普光明殿脊。日天子月天子。把定兩頭。研額謾言。更新選佛場。一家有事百家忙。祇如肥不剩肉。瘦不露骨底漢。推不前。約不後。是忙是閒。待諸人自汗通身。心空及第。此話大行。丁未春方丈昇梁日陞座。師云。爐鍊方面。金碧榛莽。經歷多少時代。湖天震吼石嶺麟乾坤特地。金圈棘蓬銅頭鐵額人來。吞吐不下。堪容三萬三千獅子座。現未曾有法。古今好彩。乘時一賽。今日是春王正月。月生三從東過西。架起樹王。肩天跨日。花狸奴不審水牯牛和南。空王古佛。又新參衣錦繡人來。直教寸絲不挂。憑仗個甚麼。

得如是奇特。連卓拄杖云。在賓行正令立。主要須圓。千華閣落成陞座。師云。今正是千華

閣落成。祖幢上座。從三疊泉上來。請揚法要。記得千華昧老人主持東林。符遠公白蓮重開。吾當再來之讖。後戒輪別轉道徧寰瀛嗣然律燈。焜耀江楚。咸輒仰觀本師九雲律庭。

雪師太贈言波離一滴血。滴在廬山中。脚下兒孫。刹竿相望。律虎宗象。震吼叢林。而今要知二老人立地處麼。揮拂云。面目現在。復云。山僧今夏不耐閑。偶隨芳草普請。却逐落花遊山。迨拂子仍懸。四百州天上。但帳合紫羅。鼾眠青嶂。卽者柱與麼圓者枋與麼匾。錐頭利鑿頭方。一任作佛法商量。世譜流布。何故插標垂蓋。代諸道自分權。結制陞座。師云。欲知護末。尤當慎初。腳跟努力。空裏步躍出那邊三脚驢。威音王佛。猶是他奴。大唐天子。割稻栽畲。不入荆棘裏。不坐萬年牀。頭正尾正。阿誰直下分疎。擲拄杖云。穿却鼻孔。解制陞座。師云。匡衆十年來。得個住山法子。不學汾陽置酒肉紙錢。趕散閑神野鬼。不學葉縣水潑旦過堂。驅驗英靈。又不學諸方巧點。羅致掠虛雛兒。多多打發。但只去者任去。不用鉤子鉤伊。住者任住。不用錐子錐伊。設有知得飯是米做底。更須七棒。對十三索取飯錢着。僧問高峯大師海底泥牛話。此四句中有一句能縱能奪。能殺能活。且道是那一句。師舉拳示之。進云。作麼生是擒縱殺活。師連拳趁出。僧問古佛與露柱相交是何宗旨。師云。賓

主歷然。進云。別峯與和尚相見。師云。錯却一機。



雲居山志卷之四

過化

趙州從諗禪師

南泉
願嗣

雲門文偃禪師

雪峯
存嗣

洞山曉聰禪師

文殊
真嗣

泐潭洪英禪師

黃龍
南嗣

靈源惟清禪師

黃龍
心嗣

覺範惠洪禪師

真淨
文嗣

塗毒智策禪師

雲岩
游嗣

妙覺慧悟禪師

長蘆
歇了嗣

昭覺道元禪師

圓悟
勤嗣

寶峯元白音可尊宿

佛日本空禪師

雲居
膺嗣

雲門古塔主

雲門
優嗣

圓通法秀禪師

天衣
懷嗣

瑞光圓照本禪師

天衣
懷嗣

寶峯真淨文禪師

黃龍
南嗣

竹菴士珪禪師

龍門
遠嗣

龍翔肱禪師

高菴
悟嗣

丹霞佛智端裕禪師

圓悟
勤嗣

薦福曹源道生禪師

密菴
傑嗣

雙峯起高智浪和尚

三角
志嗣

壽椿福永耆宿

興福

雲谷龍和尚

詞闡

無盡宗學耆宿

真如玉清潔禪師

曉天
旭嗣

趙州從諗禪師到雲居。居云。老老大大。何不覓個住處。師云。甚麼處住得。居云。前面有古寺基。師云。與麼卽和尙自住取。師因見僧掃地次。遂問。與麼還得淨潔也。無。云。轉掃轉多。師云。豈無撥塵者也。云。誰是撥塵者。師云。會麼。云。不會。師云。問取雲居去。其僧乃去問雲居。如何是撥塵者。雲居云。者瞎漢。

佛日本空禪師。初游天台山。嘗曰。如有人奪得我機者。卽吾師矣。尋謁雲居作禮。問曰。二龍爭珠。誰是得者。居云。卸却業身來。與子相見。師曰。業身已卸。居曰。珠在甚處。師無對。遂投誠入室。時始年十三。

雲門文偃禪師。嘉興張氏子。徧謁諸方。覈窮殊軌。鋒辯險絕。世所盛聞。上堂。大眾集定。師云。總上來。也各自東行西行。便下座。代云不少。或云古人一言悟道。觸緣見性。拈起作麼生商量。代云。雲居鼓。上監鐘。陳尙書問雲居供養主。云。雲居高低於弟子。主無語。尙書問師。師云。尙書莫教話墮。

雲門承古禪師。操行高潔。稟性虛明。參大光敬玄禪師。乃曰。祇是草裏漢。遂參福嚴雅和尚。

又曰。祇是個脫灑衲僧。由是終日默然。深究先德洪規。一日覽雲門語。忽然發悟。自此韜藏。不求名聞。棲止雲居弘覺禪師塔所。四方學者奔湊。因稱古塔主也。

洞山曉鷗禪師。韶之曲江人。師初游廬山。莫有知之者。時雲居法席最盛。師作燈頭。聞僧衆談泗洲僧伽。近於揚州出現。有設問者曰。既是泗洲大聖。爲甚麼向揚州出現。師曰。君子愛財。取之有道。一衆大笑。有僧至蓮華峯。祥菴主所舉似之。祥公大驚曰。雲門兒孫猶在。中夜望雲居拜之。師之名遂重叢林。

圓通法秀禪師。在雲居會中作維那時。舜老夫罵天衣懷說葛藤禪。一日聞懷遷化于法堂上。合掌云。且喜葛藤椅子倒了也。師每見呵罵不已。乃謂同列曰。我須與這老漢理會一上。及夜參。又如前呵罵。師出衆厲聲曰。豈不見圓覺經中道。舜遽曰。久立大衆。伏惟珍重。便歸方丈。師曰。這老漢通身是眼。罵得懷和尚也。

泐潭洪英禪師。開豁明濟之姿。蓋從上宗門爪牙也。嘗客雲居掩室。不與人交。下視四海。莫有可其意者。曰。吾將老死於此山。

瑞光圓照宗本禪師。天資純誠。而少緣飾。初遊雲居。同數友觀石鼓峯。相率賦頌。或議本素不從事筆硯。乃戲強之。師賦有解聽希聲徧大千。而儕輩爲之愕然。其後被詔住慧林道。

契仁廟而名落天下。其希聲徧大千之語。豈苟然哉。

靈源清禪師。佛印再歸雲居。師自龍山來。與衆羣居。痛自韬晦。佛印陞座。白衆請以爲座元。其禮數特異。師受之。叢林學者日親晦堂老人法道有在矣。師分座爲衆激昂。有法輪應。端禪師處衆時。扣其旨。然以妙入諸經自負。師嘗痛劄之。端乃援馬祖百丈機語。及華嚴宗旨爲表。師笑曰。馬祖百丈固錯矣。而華嚴宗旨。與個事喜沒交涉。端憤然。欲他往。因請辭。及揭簾。忽大悟。汗流浹背。師見乃曰。是子識好惡矣。馬祖百丈文殊普賢。幾被汝帶累。由是譽望四馳。

寶峯真淨文禪師。寄雲居長老五頌。絕頂雲居北斗齊。雲門知見便高提。莫將透脫當情解。須是當機離水泥。絕頂雲居北斗齊。藏身北斗最難提。叢林總作平常解。無限高僧沒在泥。絕頂雲居北斗齊。出羣消息要人提。其中未善宗乘者。奇特商量滿眼泥。絕頂雲居北斗齊。參差光裏闡中提。擎頭戴角誇能解。一一重教上細泥。絕頂雲居北斗齊。橫三堅四目前提。空中鶻眼殊無礙。還笑靈蛇不離泥。

覺範惠洪禪師。有僧問雲居道簡和尚曰。古人云。若欲保任此事。直須向高高山頂立。深深海底行。意旨如何。曰高峯深海。迥絕孤危。似汝閨閣中軟緩麼。師曰。大陽明安嘗疏藥山

之語。曰高高山。上標不出。深深海底藏不沒。其兒孫遵承之以爲妙得其旨。及聞雲居之言。則如真虎踞地而吼。百獸震恐。乃悟明安所示。蓋裴旻之虎也。予爲作偈曰。高高山頂立。深深海底行。道人行立處。塵世有誰爭。無間功不立。渠儂尊貴生。酬君顛倒欲枯木。一枝榮。師之神注雲居。觀諸撰述。可想見矣。

鼓山竹菴珪禪師。紹興癸丑四月。師過雲居之雲門菴。同妙喜度夏。山頂高寒。終日無一事。相從甚樂。妙喜曰。昔白雲端師翁謝事圓通。約保寧勇禪師夏居白蓮峯。作頌古一百一十篇。有提盡古人未到處。從頭一一加針錐之語。吾二人今亦同夏于此事跡相類。雖效攀無愧也。遂取古公案一百一十則。各爲之頌。更互酬酢。發明蘊奧。斟酌古人之深淺。譏訶近世之謬妄。不開知見戶牖。不涉語言蹊徑。各隨機緣。直指要津。庶有志參玄之士。可以洗心曷慮於茲矣。

塗毒智策禪師。天台陳氏子。幼依護國僧楚光落髮。未幾造國清謁寂室。光灑然有省。往豫章謁典牛。道由雲居。風雪塞路。坐四十二日。午初聞版聲鏗然。豁爾大悟。及造門。典牛獨指師曰。甚處見神見鬼來。師曰。雲居聞版聲來。牛曰。是甚麼。師曰。打破虛空。全無柄韁。牛曰。向上事未在。師曰。東家暗坐。西家廝罵。牛曰。嶄然超出佛祖。他日起家。一麟足矣。

翹翔肱禪師。天資嚴重。能追蹤其師。高菴悟公之爲人。其偈句亦精研。叢林傳誦之。因謝事龍翔遊雁蕩。戲題龍鼻水以見意。曰雨足雲收得暫閑。謾將頭角寄空山。鼻端一滴無多子。引得人人到此間。師後住筠陽洞山。退寓雲居三塔而終。然雲居乃受道之地。流行坎止。任之以緣。復以高菴冥會。此非偶然耳。

妙覺慧悟禪師到雲居上堂。圓悟引座。有曰。撞着道伴交肩過。一生參學事已畢。今朝幸遇大導師。寶華王座爲拈出。後長蘆席。僧問雁過長空。影沈寒水。雁無遺蹤之意。水無留影之心。還端的也無。師曰。蘆花兩岸雪。江水一天秋。

丹霞佛智端裕禪師。圓悟住雲居。舉師爲人。入室語載圓悟章中。後九住名刹。晚遷明州育王。紹興庚午十月初示微疾。至十八日首座請遺訓。師曰。盡此心意。以道相資。語絕而逝。火後目睛齒舌不壞。其地發光終夕。得舍利者無計。踰月不絕。黃冠羅肇常平日問道于師。方與客食咀嚼間。若有物吐哺。則舍利也。大如菽。色若琥珀。好事者持去。遂再拜於闔維所。聞香匿亟開。所獲如前。而差紅潤。

詔覺道元禪師。謁圜悟於金山。悟遷住雲居。師從之。雖有信入。終以鯁脣之物未去爲疑。會悟問參徒。生死到來時如何。僧曰。香臺子笑和尚。次問師。汝作麼生。師曰。草賊大敗。悟曰。

有人問你時如何。師擬答。悟憑陵曰。草賊大敗。師卽徹證。悟以拳擊之。師拊掌大笑。悟曰。汝見甚麼便如此。師曰。毒拳未報。永劫不忘。師問果首座。眉間挂劍機緣。圓悟極其稱獎。薦福曹源道生禪師。南劍人。首衆雲居時。嘻笑怒罵。皆爲人善巧方便。出世饒之妙果。凡參侍老拳痛棒不少貸。使渠知見不留朕跡。後住饒州薦福。逾月化去。

寶峯元白音可尊宿。自天童來謁。傘居。傘居示法語有云。甲戌入匡山。爲憨大師掃塔。復禮雲居祖庭。爲當事堅留。作洒掃因緣子。聞之。覓我於明月湖上。一見頭顱方正。大非昔人也。知諸方善知識。非徒以超佛越祖。空談爲向上。實有轉凡骨入聖胎手段。病僧有愧諸方遠矣。傘居住紫竹林時。師返雲居。商請還歐。忽雷雨大作。雨止天曉。乃見明月堂左銀杏古樹折而碎矣。合衆駭然。師曰。驟雨平田。一聲雷擊千年樹。畢竟是何先兆。復曰。雷門旣震千山雨。古樹何宜折半株。今日紅輪如不起。吾師未必轉雲居。次日石屋僧自竹林秉戒歸。曰。和尚于五月初六日圓寂矣。師住寶峯。復開淑慧山清泉寺。道望四馳。謹嚴慧命。付法濫觴之候。可爲末流砥柱。人咸稱之爲尊宿云。

壽椿福永禪宿師。剪鬃雲居。自學地以迨領衆。大興修建。增置六莊。藩司袁公鑄序師語錄。內翰張公元楨記師行實。海康縣令彭公鑒撰師塔銘。其生平德業孝友。爲名公卿推重。

類如此。後順寂。改塔于保安莊。

無盡闍黎。生緣蘓州。薙染後。參天童密雲和尚。隨受具。徧謁名宿。晚至歐阜。傘居緣契。依止最久。結社十八人。砌羅漢牆。傘居嘉美之。示以心語云。禪人諱宗學。號無盡。北平人。因土賦性。二俱質直。無變無易。率常如此。禪人過南方。隨喜諸名山諸祖庭。參禮諸善知識。不曾染些佛法知見。只是一直。末後登雲居山。同病僧插田割禾。修園種蔬。事事不在人後。因修羅漢垣。安禪人。爲西堂。三年之中。取石拽石。擡石砌石。禪人獨能首衆。三五人不能舉之石。一人能舉之。風裏雨裏。泥裏雪裏。禪人未少難色。一十八人。未滿三年。幾經去就。獨禪人與三五同志。力如金剛。八風不能搖也。及傘居遷化。復主塔十有七年。歲壬寅塔院回祿改建。仰天塘師歸老常住。以德贊高。故方和尚晦和尚燕和尚歷開戒法。位居闍黎。日課法華。長坐不臥。翛然一室。不出山者三十載。茲年垂八十。銀眉雪頂。道氣親人。行業堅貞。凜乎爲叢林之典型也。後闍維得舍利百餘顆。不謬羅漢之稱爾。

雙峯起高和尚。師在雲居。五十誕日。方容大師設齋請師自慶。山僧五十。本當自慶。一上却乃雲居去。這滯貨不得。爲他主人。故不敢造次。若論壽之一字。通貫古今。事事皆然。故得理隨事變。寬廓非外。事得理融。寂寥非內。若以虛空比壽。虛空有盡。我壽無窮。若以天地

比壽。天地有壞。我壽彌堅。若以日月比壽。日月雖明。皆有盈虧。我壽非此也。若以大圓鏡智比壽。大圓鏡智悉屬名言。吾壽非言可及。而有傍不甘者。廻出座前道。浪上座汝恁麼道。早落名言了也。山僧卽向他道。自甘三十棒。也須借汝身子。承始得。嘵壽量。何須八字開。乾乾日用任徘徊。虛空有盡渠無盡。出沒閻浮絕去來。珍重。師住靜西泉日。給諫熊公青嶼有詩贈云。隻鯉潑刺幻如龍。暫寄西泉法水中。直待黃梅功熟後。黃梅味豈與人同。三載後果應黃梅四祖寺之請。

雲居山志卷之五

一 事蹟

自漢唐以來。舊蹟芳踪。代有奇出。如飛來羅漢。泣笑樹神。佛印橋。趙州關諸勝。留連諷咏。諸先哲手澤。巒壑輝騰。奈刲火頻經。艱於蒐採。事蹟存什一于千百。悉有關於祖庭者輯之。餘則未逮。以俟參補。

無心杏。傳是唐膺祖時物。果實無心。拔地參天。一山雄偉。傘居時住竹林。忽風雨大作。電光霹靂。右一杏樹折而碎矣。識者謂師未必轉雲居。乃知此樹崩折。實有關係。

羅漢塔。舊說太平興國初武牢沙門惠了游廬山。宿於雲居寺中。夜聞呻吟甚苦。及旦視之。有僧雪眉而癯。臥腥臭中。見了涕泣指其瘡曰。當奈何。了惻然憐之。爲留五日。洗摩傅藥。甚有恩惠。踰年瘡愈。謂了曰。我家南嶽。子他日遊湘中。當過我於石崖峰下。探懷出紙裏付了。了送至西嶺訣別而還。視裏中乃瘡痂爲屏。除臥處亦皆瘡痂也。心惡之。俄成熏陸。投諸火中。有異香。了心駭異之。明年春南來。果逢雪眉於國清山路間。倚杖而笑曰。來何。

暮也。相與坐青林之下。語笑歡甚。了問石崖峰安在。雪眉以手指之。俄失所在。於是了乃悟其爲聖賢也。悵悵彌日至方廣寺。入羅漢堂。而雪眉乃在十六像中。了大驚喜躍。逗留久之。後至南臺。見昔同學道普者。爲敘說其事。有童子方掃除聞之。停簾參立曰。今日添香殿廡間。羅漢輒剩一身。了亟往視之。卽方廣所見雪眉塑像。自是號飛來羅漢。了後還雲居。以瘡痂葬西嶺。爲壇其上。今號羅漢塔。

安樂殿。是山昔有樹神。爲簡祖顯大靈異。後東坡訪佛印。遇數老人。坡問曰。何住。曰住此山久矣。但未安樂。語訖。忽不見。出元白尊宿傳。

神通變現唐宋……如此備錄之……踪

黃荆樹。係佛印禪師手植。形幹奇老。現在寺前。

高菴初不赴雲居。命佛眼遺書勉云。雲居甲于江左。可以安衆行道。似不須固讓。師猶自遜謝。佛鑒聞之曰。高菴去就。衲子所不及。

雪堂行禪師曰。高菴住雲居。普雲圓爲首座。一材僧爲書記。白楊順爲藏主。通烏頭爲知客。真牧爲維那。華姪爲副寺。用姪爲監寺。皆是有德業者。用姪尋常廉約。不點常住油。華姪因戲之曰。異時做長老。須是鼻孔端正始得。豈可以此爲得邪。用姪不對。用姪處己雖儉。

與人甚豐。接納四來。畧無倦色。高菴一日見之曰。監寺用心固難得。更須照管常住。勿令疎失。用姪曰。在某失爲小過。在和尚尊賢待士。海納山容。不問細微。誠爲大德。高菴笑而已。故叢林有用大碗之稱。

山堂同韓尙書子蒼萬菴顏首座賢真牧。避難於雲居之雲門菴。韓公因問萬菴近聞被李成兵吏所執。何計得脫。萬菴曰。昨被執縛。飢凍連日。自度必死矣。偶大雪埋屋。其所繫屋壁無故崩倒。是夜幸脫者百餘人。公曰。正被所執時。如何排遣。萬菴不對。公再詰之。萬菴曰。此何足道。吾輩學道。以義爲質。有死而已。何所懼乎。公頷之。因知前輩涉世禍害死生皆有處斷矣。

自寶禪師三遷大刹。繼住雲居。一夜山神以肩輿我師遶寺行。師云。擡你爺。擡你娘。擡上方丈去。神復昇歸方丈。

佛印禪師。周茂叔謁見。問曰。天命之謂性。率性之謂道。禪門何謂無心是道。師曰。疑則別參。公曰。參則不無。畢竟以何爲道。師曰。滿目青山一任看。公有省。一日忽見窗前草生。乃曰。與自家意思一般。以偈呈師曰。昔本不迷今不悟。心融境會豁幽潛。草深窗外松當道。盡日令人看不厭。師和云。大道體寬無不在。何拘動植與飛潛。行觀坐看了無礙。色見聲求

心自厭。由是命師作青松社主。追媿白蓮故事。

佛印禪師。一日令李石麟爲寫照作笑容。自爲贊曰。李公天上石麒麟。傳得雲居道者真。不爲拈花明大事。等閑開口笑何人。泥牛漫向風前轉。枯木無端雪裏春。對現堂堂俱不識。太平時代自由身。元符元年正月四日。與客語有會其心。軒渠一笑而化。其令畫笑狀而贊之。非苟然也。有鄭夷甫者。吳人也。少年登第。術者推其壽不過三十五。心甚憂之。旣聞師談論間化去。曰。吾不得壽。得如元公。復何憾哉。乃與禪者遊。讀楞嚴經歲餘。忽有所悟。曰。生死之理。吾知之矣。遂釋然。旣而預知死日。至期沐浴更衣。親督人灑掃園亭。又焚香擇時。指畫之間。屹然立化。其手猶作指畫狀。

李商老與妙喜最爲莫逆。往來石門歐阜。追隨無間。以師下急。因作佩韋賦以贈之。曰。李子曩有下急疾。中歲少愈。夷粹自得。唯妙喜公政爾無敵。拽斷鼻繩。因風奔逸。念佩韋之戒。作賦以勉之。曰。妙喜來前。藥言甚力。吾嘗折肱。泛濫在昔。邾子好潔。而廢於爐。魏技授歌。而取誅殛。禰衡持桃杖而大罵。周公出火攻於下策。袁彥道擲樗蒲而怒。王藍田踐雞子於履。或逐蠅而拔劍。或搗蜂而聚液。是皆喪天真於俄頃。蹈禍機於飄忽。妙喜於是開懷以受盡言。止乎是也。乃曰。此吾之三益。盍書之以爲吾盤盂几杖之銘乎。故李子夜呼燈

索筆爲妙喜三令五申之。而不惜也。

高菴住雲居。聞衲子病。移延壽堂。咨嗟歎息。如出諸已。朝夕問候。以至躬自煎煮。不嘗不與食。或遇天氣稍寒。拊其背曰。衣不單乎。或值時暑。察其色曰。莫太熱乎。不幸不救。不問彼有無。常住盡禮津送。知事或他辭。高菴叱之曰。昔百丈爲老病者立常住。爾不病不死也。四方識者高其爲人。乃退雲居。過天台。衲子相從者僅五十輩。間有不能往者。泣涕而別。蓋其德感人如此。雲居山三大字鑄石。蔣運使爲圜悟禪師書。

弘覺道場。在五龍潭上半里。

石刻四字。方圓文餘。
遺勁可愛。頗爲神筆。

卽菴慈覺禪師。蜀人。初出川行脚時。欲上雲居。先宿瑤田莊。夢伽藍安樂公告曰。汝昔在此山。曾肩一擔土。今來止有一粥緣。次日午後上山。晚粥罷。值旦過寮。相諍聞於寺司。凡新到例遭斥逐。覺心竊疑訝。逾十年得法于臥龍先禪師。有南康太守張公亦蜀人。與師親舊。適雲居虛席。請師開法。師欣然應之。以爲前夢不驗矣。卜次日上山。當晚宿麥洲莊。忽然遷化。塔至今存焉。近爲水堙。一石尚在。

復合神鐘。寺有巨鐘。明中葉院圮。居民輒至聖水塘裂開。大壘。寺重興。昇歸壘復合。不擊自鳴者累日。壬辰夏晦。山禪師手書梵咒于上。令僧擊撞。以濟幽冥焉。

古太殿基佛座下。有滲金釋迦像一尊。并舍利磁瓶。梁公硯。古爐瓶等爲鎮。明萬曆丙午十四年春。諸緣斷公建大殿畢。安立佛像。憩砌臺座。掘土五尺許得之。但闕碑碣。世代名諱莫考。乃勒石銘詩二首。并所鎮物。仍藏本處。歲己亥三月晦山禪師重建大殿。移砌佛座。得斷公銘詩。具載諸舊物。仍瘞佛座下。因識之。俾來者知歲月焉。

寺左三塔。沉埋土中多年。庚辰傘居率衆鋤土有聲。師曰。下必塔也。復掘數尺。乃及塔門。懸有鎖鑰。啓視。規模宏壯。不知是何祖塔。但得碎碑石片。上有梅花香噴遠之句。仍令封閉。外復修砌完整。人以師爲祖師再來也。

舊有羅漢頂骨。係大內龍藏偕來。後移某居士家。置諸篋笥。數顯靈異。復送歸藏殿供奉。辛卯中秋日。遜菴院主與熊季納居士取頂骨卜鬱。書海內知識號在內。獨晦山禪師屢中。乃謀公請。

壬辰臘月至癸巳春王大雪中。殿堂七八夜放光。院衆疑訝。半山師僧驚怖。慮常住災。奔上。到嶺。但見光曜燭天。寺宇無恙。未幾鼎新大殿。晦山禪師住持時事

庚子冬月十八夜。晦山禪師夢四祖信大師現身授意。次年春果赴雙峯之請。至則訪其舊院主。乃前一夜十七日去也。

九龍霧禪師。讀雲居祐和尚辭紫衣有法未等語。曰。然則祐公果法未等耶。謙虛耶。抑亦杜其後世貪名好利者之路徑耶。若公者。不有聖凡兩絕。人法雙忘。何從得者副頭顱。臨非常之富貴。而等若浮雲耶。

晦山顯禪師。住雲居時。乙未八月夜夢舉一僧居方丈。贈以偈曰。誰能紹續永吾宗。五老深藏六出公。今日送君歸丈室。寶刀出匣吼長虹。

趙州關。宋錢唐吳說書。高宗見說書九里松。欲易己書。命筆數十幅。嘆曰。無以易說所書。未幾授說信州守。陞辭高宗因語之曰。九里松是卿書乎。朕嘗書此終不如卿。說益遜謝。卽令復揭之。勅賜填金說。吳師禮子。王安石之外孫也。

二 塔院

祖塔剏自道容暨簡諸祖。有建本山湖關內外者。有建左右龍虎山者。有距常住十數里及諸莊所者。或蓁莽淪沒。或銘碣斷殘。甚且有頂石摧零。移易別地者。世代遐遠。名諱剝蝕。總係開闢法化。世守成緒。於茲山者。古德云。雲居祖塔百有餘所。今列所見。庶他日稽考有藉。

道容禪師塔 近寺門震方。左高僧塔。右普同塔。

道層禪師塔 古有塔宇。左右爲元祐禪師剏建。按林間錄云。雲居祐禪師曰。吾觀諸方長老示滅。必塔其骸。山川有限。而死本無窮。百年之下。塔將何所容。於是於宏覺塔之東。作卵塔曰。凡住持都自非生身不壞。火浴兩舍利者。皆以骨石填于此。其西又作卵塔。曰。凡衆僧化。皆藏骨石于此。謂之三塔。然三塔有二處。一在寺門青龍山址。一在趙州關外。距寺半里。塔頂南面有弘覺禪師塔五字。蘚苔半蝕。古塔主龍翔腋俱卓錫于此。寺左三塔。或謂中座是師塔。有見內碑存天順三年。唐史絕無天順年號。祇有大順二年。想字畫增減耳。傳燈載天復二年。師方示寂。距十有餘載。豈有師住世而豫爲封塔樹碑銘乎。則容祖先塔此。

道簡禪師塔 帥府張崇施財建石塔藏于本山。

奎章禪師塔 在常住案山名仰天坪。石上現有唐奎章禪師塔六字。明嘉靖中。其後人重加修飾。顚愚和尚改建塔在前五六步間。

融禪師塔 上覆石屋。明葉豪右計侵改葬。數牛牽挽間。忽雷震風雨交作。至今石屋折一角焉。顧瞻增慟。

清錫禪師塔

道齊禪師塔 、 、 、 塔于本山

心印禪師塔 亦有石屋石柱。刻宋心印禪師政和二年壬辰九月三十日示寂。石梁刻鉅
宋大觀庚寅秋七月建二十八日吉旦□□謹題

元祐禪師塔

羅漢塔 詳載事蹟

山塘口禪師塔 距寺二十里。順治辛丑夏有土民魔子計謀遷葬。聞之當事蒙府主黃正
法仍照古界騎嶺管業。水倒內爲寺業。水流外爲民業。

山塘口禪師塔 同處

口禪師塔 在塔前青龍山

口禪師塔 在明月湖石坊右五十步間

口禪師塔 在鉢盂山左向關外田壘 峯秀禪師塔

高僧塔 一在開山塔東一在弘覺塔東

大慧塔 石山在大湖坪之東。小湖坪之上。傳爲妙喜參徒營師壽藏後未結砌存石百餘

塊鄉人移用。

卽菴禪師塔 在麥莊洲離寺十五里

關房塔

一翁慶如禪師塔 在西山定林寺

姜菴塔

顥愚觀衡和尚新遷塔 在仰天坪唐奎章禪師塔前方。融如璽和尚匡衆雲居時。價買靜
主居幻東坑靜室。常住管業有年。後師順寂。紫竹林方公近靈龕歸歐阜。熊伯臯居士等
商舉東坑靜室修建塔院。至壬寅元旦燬。請同給諫熊約翁護法。季納熊士龍居士叔吉
吳孔安居士暨衆檀越衆耆宿公議遷建。常住面山仰天坪。塔院造成。其東坑塔址。竹山
衆批居幻原契仍爲常住管業。塔上之銘詳之別傳。起龕封塔語載之住持類中。

晦山顯禪師壽塔 在常住內青龍山窩。左近融禪師石屋右近開山道容禪師塔。庚子冬
靈隱本師預卜其兆也。

先耆宿塔 在膺祖塔後。按師內碑諱福先。字象初。臨川貴氏子。明成化間。師事雲居住持
瓊公。貴中掌藏事。後遷首座。凡房寮朽敝者修葺之。田山侵沒者取復之。與本初本琬福
永諸公爲同門。師後治麥莊爲退居。建觀音殿及寮舍百十餘楹。儲穀萬石。拯濟貧窮人
咸德之。

月空天耆宿塔 拙初先耆宿塔 西峰首座塔

壽椿耆宿塔 師遷寂後弘治五年十一月塔于保安莊離寺二十里。塔前尚存祭田數畝。現有巨碑。

琬公耆宿塔有銘亦師事瓊公。因開建龍溪塔藏寺西二里甲辰春予同衆瞻禮見衆僧塔

骨露。有云鎖骨拋殘空玉匣。一回觸目一酸心。

□耆宿塔 在古龍溪寺址後山

寂演都管和尚塔 光照塔 航公濟□

龜山味公塔 蛇山秀公塔 明□□□

祇樹堂塔 果熟塔 龍護塔□

久參首座塔 民國十一年建

普同塔 一在容祖塔西偏。一在膺祖塔西偏。□□□住西塢 一在琬公塔前。

灣頭塔山。

雲居山志卷之六

一 勅翰

雲居御墨。肇自唐代。以及兩宋。恩渥旌揚。玉檢璇題。生輝嵒谷。明葉法社。凋零制誥。多淪蔓艸。迨神廟間。荷兩聖勅。頒龍藏。祖席重興。聯額宸章。日星炳煥。恭讀手訂。以見

聖天子之寵賚。歷宰輔之褒崇。金湯法道。若是之隆也。

唐元和中。道膺禪師法契南平。鍾王奏聞帝庭。賜額曰龍昌禪院。號曰弘覺大師。

宋大中祥符元年。詔賜契環禪師真如禪寺額。仁宗御煤飛白書。

元祐禪師賜紫衣。至云爲僧六十鬢先華。無補空門號。出家願乞封回禮部牒。免辜盧老舊。袈裟人問其故。曰。人主之恩。王者之施。非敢辭。以近名也。但其法未等耳。

佛印了元禪師。九坐道場。四衆傾向。名動朝野。神宗賜高麗磨衲金鉢。以旌師德。

高宗建炎元年。佛果克勤禪師。奉天下名山。惟師擇住之。詔勅住持雲居。錫號圓悟。師捧起勅曰。龍床角頭親賜得。天上雲居古道場。安樂樹邊藏拙訥。更無佛法可商量。

明神宗皇帝勅諭。朕惟自古帝王以儒道治天下。而儒術之外。復有佛教。相翼並行。朕以冲昧嗣承大統。迄今廿有七禩。天下和平。臣民樂業。仰思天眷。祖德洪庥。良由大公同善之因。況國初建置僧錄司職掌厥事。蓋仁慈清淨。其功德不殊。神道設教于化。誠爲易。祖宗睿謨。意深遠矣。佛氏藏經舊刻六百三十七函。我聖母慈聖宣文明肅皇太后續刊四十一函。朕旣恭序其端。而又因通行印施。序其前後。勅諭護持。所以錫孝類流慈恩也。茲者朕嘉善道之可依。念傳布之未廣。爰命所司印造全藏六百七十八函。施捨在京及天下名山寺院。永垂不朽。庶表朕敬天法祖之意。弘仁普濟之誠。使海宇共享無爲之福。先民有言。一念思善。和風慶雲。一念不善。災星厲氣。夫善念有感而興。無感而懈。是以皇極敷言。不厭諄懇。聖哲所貴。善與人同。古今相傳。其揆一也。且善在一人。尙萃一家和氣。若億兆嚮善。豈不四海太和。此經須布之各處。本寺僧衆人等。其務齋心禮誦。敬奉珍藏。不許摹玩。致有毀失。特賜護敕。以垂永久。欽哉故諭。

大明萬曆二十七年 月 日頒

神宗御書禪堂懸扁曰。寡過未能。柱聯曰。智水消心火。仁風掃世塵。

二 藝文

本山代有韻人高衲。同時唱拍。徵諸書傳。但僻處荒陬。無能博採珍藏。且古今煨燼之餘。潛德幽光。如白蘇朱黃之游咏。僅見一斑。他如龍居筆勢。龍昌集。雲居寶錄。總未之見。祇耳目所及。著述數種。或游覽慟歎。或卓錫興懷。或遐想溪山之外。或歌嘯岩壑之中。翰墨淋漓。情見乎詞者。摭實裒集。若流連光景。無裨叢林盛衰。概弗彙入。

雲居山志卷之七

寺記

雲居開山緣起記

張大猷

唐憲宗元和初。司馬頭陀至雲山之南曰瑤田。見道容禪師。謂容曰。吾自南嶽來尋此山。凡十五載。今獲勝地。願與禪師闡揚佛教。是夜夢五神人來曰。求珠當入九重之淵。搜寶必登萬仞之巔。上十里許。山水奇勝。真方外之金湯。法門之帶礪也。黎明頭陀命樵人開道。與容登山。有白鹿啣花前導。自橫嶺折而北數百步。地平如掌。湖澄如鏡。巒岫環列如屏障。忽見五神人現前。語曰。此山乃弟子眷屬所居。弟子受佛記囑。今願捨此續佛慧命。容領諾。隨卽其地治基建寺。曰龍昌。後三日復見五神人現前。容問曰。舍此何適。五神人曰。後山枯木可居也。容一日往謝之。五神人果從枯木中出。容問安樂否。五神人曰。弟子舉族安樂。由是山遂得安樂之名。僖宗中和三年。弘覺禪師道膺入山。開堂演法。常有五老人來聽。一日弘覺問曰。公何人。對曰。山前檀越。言訖而行。弘覺異之。令人觀其何往。到山側小池躍入其中。

遂不復見。至今人呼爲五龍潭。宋祥符中賜額真如院。有仁宗飛白書。紹定六年三月三日承節郎張大猷記。

雲居山重修真如禪院碑記

晏殊

山嶽配天。廬阜標其秀。江湖紀地。彭蠡擅其雄。盤址崔嵬。層淵秘邃。中畫郡國。外羅邑居。靈真之所迴翔。川涂之所衝要。寬柔有教。世號南方之強。戒施俱修。俗虔西竺之化。繇是苾芻淨侶。霧集乎郊壘。麗跂仁祠。棋分於都鄙。雲居山者。茲山之勝境也。前控漳水。左界廬峯。崇巒隱其造天。複岫森其蔽日。外壁立以千仞。中坦然而一方。油雲郁紛。陽林以之晝暝。積雪凝沍。陰谷於焉夏寒。真如禪院者。茲山之淨土也。枕倚岩堯。盤據平敞。超彼色界。屹如化城。煥百寶之莊嚴。壓萬景之明滅。香花襞積。十善之人是依。象馬紛紜。六和之衆攸集。其始也。唐元和中有高僧道容。渡杯游方。頓錫茲地。少林隻履。旣謀於定居。祇園側金。乃兆乎締構。容師去世。其徒全慶全誨。續而住持。譬爲山一簣之功。不止起於累土。九層之業以成。影像倏其云亡。軌躅淪其莫嗣。中和歲。道膺禪師者。得洞山之密契。爲南宗之偉人。始居廬陵。化道彌盛。將赴貴池之勤請。適居豫章之大藩。時南平鍾王傳素仰道風。方持戒律。攝衣延見。虛左相待。亦旣接彌天之妙辨。且欲駐出世之高蹤。會此邑人。與本院僧徒等。詣府抗辭。請

揚真諦。南平卽日欣然許之。黑白歡迎。人天景從。登師子之座。撫納衆生。宣海潮之音。開導羣品。南平於是奏賜額曰龍昌禪院。津梁大闢。星紀載更。將示民於有終。俄與物而共盡。南平叙其遺懿。聞於帝庭。詔謚曰弘覺大師。繼師之化者曰道簡。繼簡曰道昌。繼昌曰懷嶽。繼嶽曰德緣。繼緣曰懷滿。繼滿曰智深。繼深曰清錫。繼錫曰義能。繼能曰義德。一燈是續。十代于茲。既而世變風移。人亡政息。雖靈光之制。歸然獨存。而壘相之賓。去者過半。禪枝擢其落蔭。覺路浩其揚塵。時道齊禪師居洪井之雙林。傳法燈之要旨。梯航所會。遐邇爭趨。僧衆等越境致恭。願移法席。師亦牢讓不獲。濡足來暨。憑五行之軾。正道有歸。航六度之舟。迷津嚮附。聽一音者如聆韶箏之韻。翕純而自怡。霑一雨者如沐睢渙之流。藻績而增麗。鴻蔭旣廣。勝幡旣揚。復歸其真。無怛不化。今禪師契環寶奉遺旨。紹宣法輪。環禪師智乃出家之雄。心存接物之志。佩菩提之密印。悟佛上乘。傳達摩之信衣。仍當世嫡。真風一闡。名流四臻。提唱叢林。作歸救之所。宣揚義海。無戲論之譏。繇是三江繁會之區。比屋富饒之俗。傾依大士。想像能仁。修飾伽藍。追二梵之福。喜捨珍藏。靡惜萬金之材。度木也。取徂松甫柏之良。擇匠焉。得班輸王爾之妙。萃之以日力。鳩之以歲功。卽舊以謀新。其規益壯。因高而俯下。其制增嚴。斤斧揮風。筌繩揆景。丹梁畫拱。蠶虹蜺之蜿蜒。縹瓦朱簷。爍鴛鳳之騰跂。鬆形煥爛。琳碧

精熒廣廈重深。坐迷於涼燠。清防辟竅。倏變於朝昏。夫其祕殿森羅。金容海藏之攸設。華堂濬敞。宿德繙流之是依。門闈洞開。樓觀岑立。管庫爰關。于以峙乎糗糧。浴室宏披。于是滌乎塵垢。賓館在塾。津橋亘途。山泉脈引於通溝。石磴環周乎翠瀨。莫不經營有漸。輪奐增華。易圭律者二十秋。登奧阼者五百室。矧良疇別墅。並列於郊垌。而峻宇重扉。咸新乎制度。信所謂廣大悉備。規模宏遠。華鬢寶相。永藉於閑安。白足方袍。長資於晏坐。豐功博利。罔不宣臻。洪惟聖皇不闡元化。敦崇像教。獎賚空門。大中祥符元年。詔改賜今額。芝泥玉檢。降澤雲霄。銀榜璇題。生輝巖谷。足以表昌辰之崇奉。增率土之歸依。彰勝果於妙嚴。贊景業於無量者已。夫道靡不在。諒周於大方。民罔常懷。實賓於衆善。若乃起居淨界。深證於真常。迴入塵勞。廣施於饒益。如環師之精進。復出於等倫。抵璧捐金。仰資於佛事。移風易俗。漸暨於度門。如此方之信向。特越於思議。宜乎高岸爲谷。壯麗之功不騫。大海揚塵。鴻明之福常茂。予繕性非利。屬辭罕工。風波之塗。方悼于淪滯。虫篆之作。徒欣於贊揚。避命不遑。濡毫增愧。銘曰。兜率儲精。迦維降靈。身超十地。智廣三明。揭披戒品。宣茲法乘。揄揚善利。濟度羣生。奏入漢閣。經傳中夏。仰式佛土。競崇精舍。想像青鶯。形容白馬。制軼耆山。功超鹿野。江陽舊壤。官亭奧區。屹乎翠峯。迥若懶闌。招提是託。脇蠻潛扶。谷鳥銜供。山祇讓居。奄宅一方。代有名德。大海

爲藏。圓珠在械。忍草林滋。狂猿檻匿。泡電徒奔。雷雲豈息。紹我正法。惟吾導師。騰凌慧日。茂蔚禪枝。續佛壽命。作人軌儀。四生是仰。八部爲依。長者參禪。都人預會。聞法施金。投誠獻蓋。喜捨珍玩。增修梵界。霧委珠瓔。星羅寶貝。瓊材致用。良工效奇。辨方審曲。測景裁基。彤鏤土木。買遷歲時。聿成大壯。有煥新規。華闡崇眸。雕楹巨麗。儼若神蓮。子如蟬致。寶像熒煌。華鐘沸渭。無量之緣。於茲具備。天垂紫詔。帝錫嘉名。煌煌寶篆。肅肅高甍。真祇翊護。雅俗歡榮。常資妙善。以贊隆平。淨衆依投。編氓向慕。道闡八正。人亡五怖。劫石有盡。溟波有駐。惟此叢林。湛然常住。四代孫晏大正重書勒石。

重修雲居寺記

張位洪陽

雲居江右名刹也。峙南康郡之建昌。漢晉以來。名歐阜。地以人顯。則咸稱佛印禪師。然非肇自佛印也。唐元和中。僧道容始居此山。取名雲居禪寺。傳燈闡教。尋有道膺禪師。不振法席。門徒甚盛。南唐時賜額龍昌禪院。宋有道簡懷嶽元裕等十八師。嗣演法化。由是了元禪師號佛印者出焉。與蘇子瞻黃魯直諸賢同遊。機鋒醞藉。載記堪徵。而精藍由茲愈顯。復賜名真如禪院。比其時相傳庄菴四十八所。米麥茶蔬。鹽醯油醬。竹木薪炭。倉庾儲峙。纖細畢具。明天順成化中。尙存僧房五百餘間。比丘慶思實修復之。嘉靖末大圮。所遺惟碧溪橋。講經

臺。安樂殿。羅漢塔。趙州關。故址隱然。遊者悵歎。思其盛而惜其衰。徒見山水蒼茫而已。夫山以水勝。山高而水廣尤勝。雲居外峻中平。上有明湖。汪洋停蓄。布潤涵靈。蓋自湖廢爲田。斯刹與俱廢。鄉豪利其田而入重稅。僧不敢問。萬曆戊子。有二僧夙交于雲居最久。因對予述刹之廢以湖。而湖之終不可復以稅。予識之。次歲北上。過九江。與兵憲王公談之。旣入京晤建昌令蔡君。詳言之。皆力任去稅復湖。遂令山僧具情於道邑。更買田與豪易。而薄其稅。事乃就緒。予復捐金爲濬湖費。明月澄波。鏡光圓滿。而能善士日相與謀議興刹因緣矣。先是山有古鐘。居民移去聖水塘。而鐘體偶墮。後昇還山。而墮復合。萬曆壬辰。其鐘不擊自鳴者數日。適燕京萬佛寺住持洪斷上人應運而至。夫豈偶然哉。上人負大智力。具法眼。閉關三載。戒行著聞。萬曆丙申聖皇太后遣中貴到山掛旛。賜金及紫衣等物。因葺方丈左右禪堂。辛丑丹陽賀觀察子學仁。以而翁舊守南康。遺愛斯在。謀建殿方丈之前。時乏棟梁大木。有近山壇樹頗巨。民憚其神。不敢伐。忽一夕猛風。大木斯拔。顛末無損。同夕上林魏氏。風拔塚樹數十株。盡隨喜興造。而殿材遂備。常熟繆徵君希雍。金壇于比部玉立。共鑄釋迦銅像。高丈六。雄麗聳瞻。癸卯復蒙聖母皇太后施滲金毘盧佛銅像。高丈餘。賜藏經一部。建閣貯之。延僧檢閱。其天王殿伽藍殿鐘鼓二樓。及山門寮舍。次第告成。洪上人日偕徒衆。朝夕焚香。

誦經。仰祈聖母聖天子福壽萬年。而巋然名刹。一旦復前代之舊焉。誠哉其不偶然也。上人因屬予記于予惟叢林之建。有因人而勝者。有因地而勝者。高僧出世。肇教闡法。傳派廣而道脈綿長。是其人焉。而地待以興者也。勝境發祥。風環氣繞。靈基固而奠安弘衍。是其地焉。人待以成者也。兩者具而勝事藉以爲不騫。然人其本也。嗟乎。山河大地。一切幻景。圓明真性。不朽常存。若夫剏造莊嚴。供設充備。用以擅美一時。應緣扶教。是稱有爲功德耳。至其精嚴戒律。修明福慧。樹雄樟。震法鼓。俾九宇庇其宗風。千禱沐其甘露。始也因相悟心。旣焉得心忘相。末後則心相雙泯。巍巍朗朗。與太空相爲無敵。是稱無相功德。在仁者自優爲之。予固不能贊一辭矣。遂記之。以復於洪上人。

敕建雲居山真如禪寺立僧戶碑記

魏裔魯竟菴

雲居古刹。著於傳燈。其曰洪州雲居者。實建昌地也。歷唐宋於今。代奉優綸。法物經藏。頒自祕府。繇來久矣。其間佛印舜老圓悟高菴諸大禪宿。提唱宗風。雷驚電拂。使信嚮者。莫不蠲邪灌累。藻雪神明。洵足以助宣王化也。顧是山也。憑高累渺。風駛泉冽。披榛爲田。不蕃黍稻。而其稅糧。編入民版。歲不敷伊蒲之供。而役與俗均。計冊米止壹拾貳石貳斗。以之急公無幾何。而不免於塵累淨業也。竊惟名山法侶。去住雲流。非猶委身偷蔭之穴。鉢授徒承之產。

而以雜泛差徭。一例加之。豈所以敦梵行而示優與。茲者吳門晦山顯禪師實主法席。闡揚禪道。其監院肇隆謀於紳士。請以寺糧別立僧戶。名雲居常住。附於蘆潭鎮之冊尾。其歲賦有常。照限同輸。而役則該鎮自承。毋及附藉。僉以爲便。遂用其請。如是施行。恐異時有汨敗其議。及濫授此例者。無所據正。爰勒之貞珉。以告於後之君子焉。

重建古雲門寺記

熊維典

五宗雲門尙矣。修江之雲門。據雲居之上游。烏道紝繁。孤幽獨絕。始自唐宋人以爲道場。蓋古刹云。大慧叢林寶訓。實輯於此。古德之風規不墜。名山之後起有人。不其瑋與。茲惟映明浹公大師。發法華之蹤。入晦山之室。一經印可。灰心泯智。入山彌深。旣而星霜累稔。遂成堂構。荆棘艸萊。化爲金碧。見者異之。又皆其師弟子十餘年。相與虎豹不避。凍渴不輟。鬪墾積聚。以克底於成。而未嘗下山持鉢。藉手俗緣也。不尤難乎哉。旣卽工之明年。介杜生丐予文爲記。生言禪堂經閣。一時備舉。兩廡翼如。庖湦區分。凡百六十有八楹。繚以甃垣。法物咸具。而猶未已也。又夫欲鑄寶訓。購全藏。以備茲山前此未有之勝事。而後畢其初願。嘻。是誠不可無記也。顧師本儒家子。父旭揆杜公。以文學顯。章縫間。其内外族皆佔畢爲儒生。而師獨脫身修淨業。持苦行。方絲苦參得正解。而又於解後作苦。懋勉不退。然則向所印可者。今復

爲敝屣而更益精進可知也。法門龍象非師而誰。師方將嗣晦恢宗以解行相應。振起天下叢林。志弘遠矣。豈但曰吾獨步修江。以雲門爲安樂窩者哉。用是序次其事。而因以爲師勗焉。

雲居山真如寺重建諸殿堂碑記

謝文游秋水

予少具山水癖。自世變來。以貧故守舊袍幘。不敢出郡域一步。蹙蹙歲月。母年邁。奉不遠遊。之戒唯謹。壬子秋。母不幸。故毀疾。藉藥餌。保喘息。癸丑練祔後。冬氣體稍平。附舟過星渚。拜亡友宋髻山墓。兼索其遺書訂之。畢六載寤寐宿懷。因登五老。訪日談踐十五年舊約。相傾倒。談旬餘日。一夕日公偶舉顥愚和尙於江南紫竹林。三月十九日薦國忌。和尙拈香次。舉聲大慟。觀者萬餘。俱感哭聲憾天地。予聞之。悚然心震動不已。生平不識顥愚爲何狀。恨不得把其臂。嘔血數斗爲快。繼而過滄江。謁熊約生先生諸令子。述晦山和尙初爲名諸生。聞北都變。思廟殉社稷凶問。趨文廟痛哭。負所作文及青衿拜告焚之。去祝髮爲僧。余復悚然心震動。不能忍如前。聞顥愚事時方自恨坐老丘壑。有血性男子如此。皆先余死而不得相對。一抒胸中所鬱積。嗚呼。何吾生之不辰也。踰數日。友人云滄江山水之奇。毋出雲居右。相從登焉。縹缈天半。忽平曠。開百餘畝。有湖號明月。居其中。寺居其後。諸峯如蓮瓣。環如城。洵

奇觀也。入方丈。叩主席燕雷和尙。風範藹如。雅談令予心醉。信宿出手訂雲居志十餘卷示余讀之。知顥愚晦山皆曾主席此山。而晦山其傳法授衣師也。此山自唐迄今爲江右祖庭。歷諸祖四十八代。至明神廟時諸緣和尚再興。神廟賜藏及御書扁聯。顥愚修舉廢墜。建明月堂。磊羅漢牆。歲己亥。晦山建大雄寶殿。應供堂。香積堂。雲農寮。歲丙午。歷戊申。燕雷新建禪堂。方丈安隱室。千在堂。耆宿寮浴堂。田寮米寮。千華閣。整齊絢爛。蔚然復唐宋舊蹟。歲辛亥。燕雷又續置學背壠莊田二十畝零。便輸漕米。又繙素合置木桶莊田三十九畝零。以供晦山和尙塔院香燈。自此宗風益熾。俊傑擔荷者益繩繩不替可卜矣。然余於此有深慨焉。余前自五老別日公下山。冒雪游白鹿洞。見其室廬荒陋。階前遍榛莽。庭戶閑然無人。整敝衣冠。向墀道瞻拜。三嘆而出。忍凍縮項。徘徊於古松泉石之間。喘咽不得出一語。今覩此雲居之盛。余獨何心能不悲吾道之衰。遂無豪傑如顥愚晦山燕雷諸公其人者耶。抑有其人而時不可爲耶。抑時但當出世盛而經世期未至耶。余又不能不慟哭矣。于是燕公屬余紀其修建之勤。鐫碑以垂不朽。余固樂爲之。且俾燕公導余至顥愚晦山二古德塔所俯首一拜。以寫余前聞之恨。而亦因以志余深慨之衷云。

重建古雲門寺記

戒顯

南康下建昌隸艾治。邑名修水。去雲居三十里。有古雲門寺。乃匡真偃禪師住靜處也。妙喜老人參園悟勤於雲居。居首座寮將二載。更期深造。力追古人。卜靜室於古雲門寺基。刀畔火種。一住四載。同龍門竹菴珪禪師坐夏。各成頌古百首。復編禪林寶訓。爲萬古眼目。園悟獎以偈曰。天上高天更有天。卽此處也。自宋元至明屢經興廢。垂及崇禎末年。殿堂蕪塌。僧徒不守。茅舍幾楹。屬之護法。熊氏給諫青嶼公實避亂其間。自稱雲門道人。後雙峯起高大師。就此縛茅。閉關三載。大師去後。仍歸熊門。久成俗產矣。某年余舊參徒映明浹公。感千年祖跡。鞠爲荒墟。奮圖恢復。乃鬻己所居法華蘭若。兼多方貸益。從熊氏贖歸。初於殿右誅茅五楹。聊蔽風雨。坐禪餘晷。卽荷犁鋤。佩刀斧。力田墾土。除治荒穢。越數年。乃就寺古基。鼎建大雄正殿。丙午冬殿成。復謀造兩廡山門。次第增修。期成法窟。公之爲古雲門致力者。實勤以苦矣。公幼好參禪。初依洞山孤崖和尚。雖得定力。久未透關。山僧住歐峯。公入紅爐就燬。至第二冬。山僧用毒辣鉗錘。公於一竹籃下當堂透脫。操履穩實。山僧以公福學未充。勉令住靜。踵龍山亮公高踪。孰知奮發勤勞。竟能恢廓祖山。建立殿宇。爲雲門妙喜諸老增益光明也哉。庚子秋。余訪雲門信宿茅舍。丁未余從曹溪歸到雙峯。俾徒慈雲來謁。言以傳後裔。余嘉其有志竟成。過於余所期也。聊述顛末。以勒之雲門焉。詞曰。滻江奧域。惟古雲門。後居

妙喜。前隱匡真。雖同歐阜。別一乾坤。地隣湯泉。大小湖坪。奇峯肆繞。上山龜形。雙徑鼓山。古蹟攸存。昭垂寶訓。炳耀禪林。法席中圮。鞠爲荒榛。苦身匡復。惟我映明。雄殿煥煌。一手高擎。飽餐茶蓼。次第鼎興。修舉廢墜。鬱爲功臣。雲居雷震。斯刹齊名。書垂琬琰。萬古其馨。

雲居諸緣老人上足知悟和尚開建芙蓉山苾芻禪林碑記

戒顯

方內名山巨壑。前代上祖。創成叢林梵刹。棋布星羅。卽奧壤窮陬。無處不遍。竊謂勝地搜闢已盡。後有起者。雖過量龍象。力能開疆啓土。但能中興。不能開山矣。及觀雲居嫡裔知悟和尚所開芙蓉山苾芻蘭若。峯環脉匯。秀善畢集。薺峯正主。天半削成。對面羣巒。堆蘆疊翠。加以香爐秀起。彌勒一峯。天然箕踞。拱對山門。又九龍吐水。獅象守關。卽諸方名刹。讓其圓整。始知有勝人又有勝地。向之所疑。殊不謂然。所謂人傑地靈者非耶。師世籍進賢余姓。禮諸緣斷翁和尚。祝髮於燕京西山萬佛堂。法名常亨。稟古心律祖戒。先是南康雲居祖席廢於兵燹。諸緣老人以慈聖太后椒房國戚。望高釐轂。膺達觀可大師囑。疏請于朝。蒙溫旨降香頒帑。并賜龍藏寶旛。滲金毘盧像。老人由是贖產建殿。締構一新。而赤身戮力。始終贊助者。知悟亨翁也。藏殿成。師往建昌募鐵瓦作蓋。至今鱗鱗。標榜歐阜。事訖。卜靜閩中住。馬祖故跡。名佛跡嶺者久之。弟子祖滿同居士張平山入閩。敦請至此芙蓉山。山故宋熙寧時古跡。

師賞其奇秀。先住靜三年。縛茆栖止。以甲寅春躬自鋤荒。大肆開闢。駢饑斬株杌。蘿草抉石。削成基址。建天人師殿。殿下係大溝堑。師奮精衛力。畚土築平。建龍華殿。次後建大士殿。及厨庫飯堂。迴廊從舍。次第告成。凡叢林所應有者。無不備具。加金碧丹藻。聖墁精工。累石合土。祝成堅地。一進寶坊。疑登化樂。嗚呼。非師乘大願力。具大經緯。烏能受勤苦於諸祖。開山之後。鼎興剏闢。建大伽藍。若是之周圓精麗也哉。余辛卯初住雲居。諗知有苾芻越十有五年。說法疎山次。始一造訪。儼如至天上雲居。歎末世開山。有此異地。又喜諸緣老人。瓜瓞綿衍。發秀盱江者。奇功勝蹟。堪與祖山而並峙也。乃爲文以記之。師始終創建。歷四十年。至七十八而西歸。而荼毘輔號大功臣者。海雲繼雲慧雲志雲明心諸公也。詩曰。嶮嶒秀絕此芙蓉。熊熊萬壑爭朝宗。沈埋今古悲荒叢。何人能奮五丁功。卓哉雲居知悟翁。稜稜脊骨真人雄。旣鎔鐵瓦壯歐峯。復來此地誅蒙茸。手鋤荆棘開花宮。琳瑯丹艤誇精工。內衍箕裘引象龍。晨昏禪誦鑄黃鑄。雲居天上舞穹窿。靈秀收歸在此中。萬年不朽此奇蹟。書之貞石永無窮。

雲居山志卷之八

錄序

雲居祐禪師語錄序

黃庭堅山谷

佛言我於一切法無執。報得常光一尋身真金色。乃至三十二大人相。八十種隨形好。一一皆對妙因。固釋迦老子不會祖師禪。今有人灰頭土面。而種種光明徧照。卑濕重遲。而進道猛利。超過百萬阿僧祇劫。哆哆啞啞。而法音如雷如霆。慧辯如雲如雨。跋跋挈挈。而十二時中徧往十方國土。調伏衆生。如來油花套子。全無處用。不可是超佛知見。倒用如來印也。此語若傳山北山南。必且懷疑起諍。若問是誰。但向道是雲居祐老子。若有人問。言句內識此老子。言句外識此老子。不可道不卽言句。不離言句。對諸方說如來禪也。我觀此老子。雖不設陷虎之機。大空升堂。小空入室。雖不結羨魚之網。鳥鵠遷巢。龍蛇避宅。子湖狗口裏刺得乎。祕魔巖又下有出身路。所以鏡有山鬼之形。妙於不見。骨銜波旬之鏃。本自無瘡。若信得及。萬株杉裏方藏影。若信不及。五老峯前又出頭。此老子是無爲無事人。何須鄙夫百千偈。

贊諸人還會麼。巨鰲莫戴三山去。吾欲蓬萊頂上行。

雲居晦山禪師語錄序

熊開元魚山

松挺棘園。鵠翔鳥隊。無事乎扶之浴之也。而直與白乃特聞。則以所託者幸也。若夫遊旃檀之林。欲以香見試。金剛之窟。欲以堅利鳴。難乎爲作者矣。天童三峯靈隱相承三世。丁艸昧之艱。起孤危之弊。各各成一代偉人。余有厚緣。得並廁爐中。薈心鑒焉。謂川嶽所鍾。無剩美矣。垂三十年。而晦山禪師荷靈隱之道。唱於雲居。乃能使人頌其苦節。如趙州神鼎。歎其勤行。如天台永明。而語錄若干卷。復以四家毛羽。運濟上爪牙。汾州乃有此兒。能不爲靈隱額手。然師非無所本源。遂能發皇爾爾也。予令吳門時。師方以髫秀來謁。已與其鄉先達並駕而馳。若燕國公小友鼓其翼。萬里何求。弗得。而師有志乎出情之學。夷然不屑也。絲絃偶絕。師爲詩百有奇。謝絕塵寰。所依依獨北堂。護草耳。會賊犯闕廷。先皇帝晏駕。師乃爲詩文哭孔子廟。卽日燬衣冠爲法王子。蓋其於世間法如斬一握絲。一斬一切斷。自君親外。無足留其盼睨者。故於出世法亦如染一握絲。一染一切染。水潦和尚云。百千三昧。無量妙義。只向一毛頭上。一時識得根源去。師神悟什伯諸方實行。復力追往哲。超然命之曰祖豈偶也哉。予時捨匡廬。詣靈巖座下。聞之堂頭和尚曰。晦公是吾家龍門砥也。因以是印其行解。世人

目不至盲耳不至瞯必不憮於文章鐘鼓雖無予言是錄已十日並照矣。

晦山大師匡廬集序

熊維典

廬山雲居西江兩大名勝也。廬山名匡。雲居名歐。是皆山以人著。然雲居距廬山三舍而遙。博奧不及。而孤幽過之。雲田月湖使人忘世。古尊宿踵相望。具見傳燈。以故修深禪者。或去彼而取此。晦山大師來主雲居。實自廬山。師寓廬山垂二載。探奇攬勝。輒形詩文。廬之賢者。治五老丐師棒喝。而師慨應雲居。師固有取乎爾矣。爾乃宗風大振。龍象如林。師法流通。允在雲居。而門弟子由否否。此弟子斷臂處耳。而一葦之筏。實繇匡廬。奈之何忘之。於是裒集諸稿。先以廬山所著。詮次付梓。蓋亦師之詩史云。師昔驤首諸生間。號儒宗。然獨篤嗜無生。其所提獎。後雖貴顯。猶欲以禪悅奪之。令偕隱去。廬山看月。悲愍棘闈。一寓諸詩。他如罷菴。諸集。拈一題至數百首。絕無膚語。又幼耽墨妙。夐絕鍾王。殘楮剩烟。價兼萬鎰。何多能也。蘇長公贊文與可詩。乃文之毫末。今廬山詩。又師詩之毫末也。心若不有異照。口必不能異言。況復有異能若此乎。然則詩不足以盡師。猶廬山之不足以盡師詩也。見角知牛。望烟識火。讀者必有省焉。

雲居晦山和尚楚游錄序

文德翼用昭

晦師方息影匡廬。旋移歐。如是者六年。僕欲從之遊。未得也。兒子行遠。偶遇之歸宗。荷其
開接。兼念枯株朽木。不竟非素昧平生者。益悠然欲從之遊。卒未得也。今年春。師適楚過憇東
西林。急召歸。獲按晨夕。如三生石上。忽見故人。欣慨交集。不自忍禁。秋杪。師自楚歸。特過
柴門。載續前緣。更依依別去。私自恨曰。安得天上雲居。如古人一粥緣也。近師書來。寄示楚
遊語錄及雜著。讀而誦之。因歎曰。師有三異。恆識攸疑。苟匪達觀。將設賓主。受法靈隱。不負
千華。一也。旣肩別傳。復企虎溪。二也。具知得道。尙涉慧業。三也。大慧果之無礙辯才。洪覺範
之秀媚精進。慧業與道。寧影國也耶。僕馬齒長矣。憶二十年前。浪遊吳越間。遍參天童徑山。
金粟浮玉諸尊宿。電光石火。倏忽駭然。不敢承荷。近於雲居趙州關末後句。卒不得搖扇脫
灑以去。宜師之豁然齒冷。猶以疇昔宗劉同修社事。尙欲西江森水。轆轤吸盡。不顧僕口之
窄也。師豈以慧業作筏者哉。衛身有內甲外甲。行已有內篇外篇。禪體也。律甲也。禪義也。文
篇也。篇謀而義立。甲具而體和。師善導歟。僕報書曰。阿雲友風子雨。不崇朝而遍天下。游可
矣。去其楚而可矣。

雲居賦序

宋之盛未有

雲居賦者。晦大師住歐阜作也。師遊匡廬。有廬山詩。住歐山。有雲居賦。惟其眼底無塵。故觸

境了了。心手副之。師門人石與公得師遊戲墨妙。來屬余序。余謂此非雲居賦也。直自賦晦師耳。師視雲居片地。直太虛中一小塵影。又於塵影中點染某嶺某湖某刹。復于嶺湖刹中指數紹衣諸祖。爲某開山。某中興。幾於註碎全山矣。而要使全山之神光面目。囊來蘚剝石割者。至此爲一聚現。以待剖于師之心胸手眼。而師亦自出其無畏妙明。注放全山諸祖。令其各發殊相同至賦所。則近謂是賦雲居非自賦有不可者。夫詩賦小技耳。文字見除。定不落此。而執除文字者。輒于此妄生分別。捧悟參之一偈一贊。便作密證。而於戲寄之題跋諷詠。不指剩語。便曰名根。不解文字見除。雖乖喻謔。都關妙義。非復文字。何況詩賦。文字見立。雖座上宣偈。棒下轉語。半調聰明。非真解脫。都是文字。何但詩賦。譬之懸鏡照物。任來物之媸媸淨穢。雖下至徇僂瘦漏畢入照裏。鏡無礙也。若寶愛佳麗。圖入鏡面礙矣。豈惟佳麗。卽圖如來妙相。于上而礙滋甚。今不悟鏡體無礙。而以所寓之物色高下分別照義。此真所謂小兒強作解事語者。天下無固陋儒雅。亦安得有弇鄙禪宗。此賦自具全山。其鋪揚崗嶺蔚蒼。月湖瀲灝。及禪林寶訓。燈傳枝續。幾于道容諸祖在焉。呼之欲出。而晦師神影。亦復露現于此。若謂是賦雲居。非自賦者。猶之謁師方丈。更覓雲居道場也。然刻劃賦才。謂此間有晦師存。則又空入歐阜。不見晦師而還。吾弗與之讀雲居賦矣。

天上雲居賦序

洪周祿半石

從來名勝佳山水。非福地洞天。則祖庭梵刹。待其人而後興。故山以人重也。星渚有雲居山。峻峯幽谷。在匡廬伯仲間。向傳歐岌得道處是也。載稽燈元。如「祇這是」之道膺。安樂樹號之道簡。又如佛印。曉舜道齊。善悟諸祖衲。俱於此處演正法眼藏道場。閱唐宋元明。計數百年。法堂草深。雲巒榛翳。晦山大師繇三疊九雲。于焉卓錫。師本儒行。鴻才博學。抱忠孝之思。貫金剛之骨。棄世間法。得靈隱衣鉢。爲法王子。高提祖令。接導後參。東南半壁。宗印重輝矣。四方衲子雲集。日就鉗錘。但時際兵燹。制籍殘燬。晦師行菩薩行。荷鋤耕畲。旋爲創葺。拈頌之暇。乃捃摭往蹟。綜覈前徽。詮次烟嵐。位置泉石。作雲居賦。灑灑千言。蓋界材旣以淹博。而摛辭更覺藻韻。自有此賦。而山色精神。若爲雲居開生面。自有此賦。而祖系不沒。萬象不撥。如鏡鏡重光。琳琅梵網。自有此賦。俾後之稽古者。不費蒐討。不煩檢疏。千載如在目前。自有此賦。而孟堅之兩都失色。興公庾子山之天臺枯樹。瞠乎門外。漢若然晦師接人。不以言句。不落思議。讀此賦者。爲有句耶。無句耶。解者當從不思議處思議之。昔永明以阿逸多化身。而著宗鏡。清涼以妙吉祥化身。而疏華嚴。晦大師祖位重來。賦雲居以垂永久。俱不朽事。寧直山靈有幸已也。

雲居鍛鍊說序

黎元寬博卷

魏志有之曰。藻煉神明。以致無生。而得佛道。此最初治禪者之微言。實煅煉之名所自起也。于是其獨修焉。謂之禪學。學亦無學。其共奉焉。謂之禪師。師亦無師。然而苟不遇無師之師。何以續無學之學。今叢社據室。動稱開爐。其所成就。固不乏人。非妄有名而已。而或徒取備員廣付。以張大其門庭。曾不一是正其眼目。卽所謂我眼本正。因師而邪者。又何能免。禪至此。無乃已衰乎。晦山和尚。所以長慮焉。而著禪門煅煉之說。蓋責師也。昔黃檗言。大唐國無禪師。而又曰。不是無禪。只是無師者。其意亦在煅煉耳。若夫晦公之所謂煅煉篇目十有三。備矣。夫豈猶是萬物爲銅。陰陽爲炭之說。一任其麤濁塞之質已哉。然且必因材而就器。亦且必無失候而遺時。余竊妄意之。理在悟。而更不迷于悟。則是電光罔通。石火莫及之義。迹在功。而終不取于功。則是盡大地裏一齊火發之義。若此者。亦煅煉之極致也。顧其所以合于兵法者何也。無謂其有殺人刀乎。抑謂有活人劍乎。蓋寧還我以死灰。無寧坐人于死水。然則三棒三喝。可以當三驚矣。一莫一無。可以當一至矣。或縱或奪。且換且移。可以當拔轍樹幟矣。夫兵家豈有定法耶。而禪亦如之。禪師亦如之。故法昌嘗曰。我要一不會禪者作國師。而以佛祖言句爲人師範。夾山深病焉。佛不可著。何有于禪。禪不可會。何有于師。問自己。

意不問祖師意。然後無師之師。可得而親也。無學之學。亦可得而詣也。爲語禪人。天下太平。在此日矣。何必須俟之千生百劫。經無數形。而後乃始盡其頑鄙乎。而吹毛用了急須磨。晦公以爲終是僂兵不得也。

雲居鍛鍊說十三篇序

張立廉鴻一

昔圓悟開堂金山。一夕而大徹者十八人。妙喜庵居洋嶼。一期得法者十三輩。信平鉗錘妙密。下刃緊峭者。能投針芥於俄頃。驗殺活於臨時。若尋常爐鞴。火力輕微。發藥不靈。終無是處。溯之從上作家。轟塗毒鼓。施陷虎機。奪食驅耕。抽釘拔楔。死人偷心。斷人命根者。靡不具過人手眼。展出情機。用以據險要。辨龍蛇。故得種草流傳。血脉不斷。若臨濟老子。將黃檗一棒。華劈三玄。恢張七事。直截全提之旨。變爲五花八門。所以盡學者之機器。抉綱宗之骨髓。于諸宗中。尤爲傑出。故其派下。類多魁奇特達之人。雖世數屢更。而風規未墜。所謂源深流長。碧落之碑。終無膺本者也。近世法道陵遲。宗旨昧略。雖坐道場。據師位者。始之無疏通茅塞之能。繼之無斬關開眼之力。末後無掃蹤搜窟寸絲斬斷之略。偶或一二英靈之士。闖入保社。接續先宗。亦出於僂倖而已。豈能知彼前人用心何似。受病何等。蹲坐何處。而爲之審藥忌。明咤啄也哉。吾友晦山和尚。懼燈傳之欲燼。慨法命之寢微。特著鍛鍊說十三篇。最初

審辨機器。及臨時勘驗。迄於徹法源底。保任護持。要期于行解相應。頭尾端正。而于參徒發憤之時。師家下手之際。尤爲緊切。如臨敵然。轉瞬眨眼。立見危亡。此非較勘精明。作用迅疾。未有能得其機要者也。晦老目覩後五百年。此印漸沒。參學之流。若高原望漸。全仗天時。難憑人力。設或鹵莽逼拶。易于著魔成病。過懲此者。又如水浸石頭。不勝悵歎。而作此篇。略指路頭。微示鞭影。嗚呼。其可謂婆心殷切也已。或曰。晦老著說鍛鍊。而擬孫武之十三篇者何也。夫從上說禪。亦如國家兵器。不得已而用之。故醍醐毒藥。一道而行。制勝出奇。鈎錐並用。有叱咤變色之勇。有八面應敵之奇。運不戰屈人之籌。握當斷卽斷之劍。所謂以佛祖心。運英雄智。異術而同用者也。余再四披讀。竊窺苦心。念晦老多載開法椎拂之下。蔚起龍象。接武克家。非偶然者。茲以匠石已試之效。疏和扁起死之方。甘苦親嘗。窺繁洞中。于直指一宗。非小補矣。抑爲人非細事也。古人喻如金針刺眼。毫髮若差。立成大誤。惟根本明徹。契悟廣大者。始克勝任。設見解浮淺。接響承虛。當之立蹶耳。苟非其人。道不虛行。然則付授擇人。尤弘法之第一義也。輒爲序而傳之。偷據位稱師者。能依法力行。光明種子。永不絕於世矣。

晦山和尚詩文全集序

徐增庵

昔崔趙公問徑山國一禪師曰。弟子出家得否。師曰。出家乃大丈夫事。非將相所能爲。夫世

所謂大丈夫者。皆舉將相爲言。將則統帥百萬之衆。爲國家戡禍亂。號令如山。生殺自主。相則位居一人之下。百僚仰其鼻息。天下安危。皆其掌握。是皆千萬人中之一人。盡世間男子。未有不羨之畏之。欲一爲之而不可得者也。徑山之答崔趙公。則是大丈夫。又在將相之外。此豈凡情所能窺測者哉。吾雖病廢。將相之人。嘗得見之。大善知識。亦嘗得見之。其所作爲。截然不類。大善知識。仗將相護法。則有之。將相見善知識。必口稱弟子。稽首方丈。大善知識若是其尊且貴也。據是而言。則是徑山乃與將相相較量矣。烏足稱爲國一大師哉。自古迄今。爲將爲相者。靡不自以爲大丈夫。卽崔趙公。豈不以大丈夫自命。而獨于出家遲疑不斷。只此一問。便非大丈夫。大丈夫者。貴乎。斯然一念。行止由我。崔趙公爵位功勳。亦嘗試之。其味旣已知之。欲出家卽出家。豈不毅然大丈夫哉。且唐皇帝以萬乘之尊。有志法道。延請國一禪師于禁廷。崔趙公斯時有志。卽求剃染。其誰曰不然。如何不作大丈夫事。嗟乎。時不再來。機不可失。乃至千載而下。被吾晦山和尚一人作去。吾見今之出家者。何止萬萬。其始也或因患難。或因貧困。或以怨憤。種種不如意事。或出父母之命。然豈無自己發心。童真悟道者。而要無如晦山和尚之出家。仁義兼至。節孝善全。光明俊偉。超俗拔倫者也。和尚俗姓王。諱瀚字元達。吳之婁東人。與吾祭酒梅村先生同邑。年相若。又同學。才名不相下。屢試高等。

前輩張受先先生重之。稱爲公輔器。午未之間。梅村聯捷。廷對擢鼎甲。而和尚之名益著。和尚幼時。遂有志學佛。以尊君闔修先生在堂。好道力貧。且年高。和尚恐傷老人意。因浮沈于諸生中。從游者最盛。四方多餽遺。以康養兩尊人歡笑。終其天年。祿養者愧不及。甲申春。李賊犯京師。思宗崩。凶問至江南。和尚大慟。卽捲詩文書及平日所爲制舉義。攬負至文廟。拜告先師。焚之。并以青衿置明倫堂。嗟乎。和尚之秀才于此日終。出家于此日始矣。大丈夫之行事。果高出子尋常百倍也。于是諸山聞之。爭願爲之披薙。會三昧老人移舟來。卽往華山出家。至受具畢。乃參具德和尚于顯寧。不數年。盡得其法。印具和尚。初住靈隱。卽欲遜獅子位與居。和尚卽著草鞋走廬山。未二年。雲居膺祖古道場來請。不得已應之。歷二年。是時禪風漸衰。和尚以臨濟七事鍵椎衲子。號爲毒辣。入室者甚衆。皆天下之英俊。化行江楚。數千里。和尚開闢之功。何其偉也。于是彼處道場。若寒溪若薦福若安國若護國。若四祖若疎山。一一坐遍。法語之外。有鍛鍊衲子說十三篇。爲尊宿重。江右李太虛先生。嘗見和尚。亟稱曰。和尚多生來。不知如何修持法道。乃得至此。吾儕科第。不啻糞壤。願以餘生。爲法弟子。少種來生福慧。其爲縉紳先生敬信。又若此。丁未夏。和尚應徑山請。乃遣侍者走三千里。迎和尚補處靈隱。已逾五載于茲矣。以靈隱志未就。屬予修葺。復出其所撰詩文集五十卷。屬爲序。

予讀之而竊有慨也。古來詩文宗匠。竭一生之力。未能至此。和尚二十年來。住持與千五百人俱。法語將等尺。而文集又裒然如是其大。天下不朽事。都被和尚一人佔盡。獨不爲吾輩留餘地耶。吾嘗從事于詩矣。詩本性情。復有一定之法。則三百篇而降。漢魏古詩樂府。無不造極。歌行近體。盛唐爲最。中晚漸淺。宋元來不可言矣。近世詩人。狃于習見。畧不師古。小山崩施。不知五岳爲何物。而況須彌山王。細流差池。不知百川爲何物。而况薩婆若海。予嚮選元氣集。周櫟園先生謂予曰。世安得有幾十人詩。供君論定。近予好遊名山。往往于方外遇之。雖然。亦有才情學力。氣魄光燄。廣大赫奕。如吾和尚者乎。嘗評和尚匡廬詩。不從眼中看來。亦不從筆端寫出。和尚胸頭。自有一座匡廬山在。橫揮直洒。蒼氣充溢。廬山有盡。筆墨無窮。和尚其可以止乎。其他所作。數十倍于廬山。人患才少。師患才多。錦心繡口。鬱或卍字之輪。毫相珠光。悉本浩然之氣。和尚所爲古文。抑又難言之也。古文之盡美盡善。莫如左國。其法變化不測。其次莫如史記前漢書。史記崢嶸。漢書整密。唐推昌黎柳州。宋稱六一東坡。然東坡之一筆直掃。而欲如昌黎之多方出奇。不可得矣。六一之清流繁折。而欲長沙之一氣渾成。其又可得耶。元明以來。多出摹倣。窠臼餽釘。紛然疊見。有博學者束於典故。前賢所未及者。則不敢言。寡學溺于流俗。前賢所已道者。又不能省。貿貿焉無不以壇坫自雄。輒爲高

論亦知牆外籬間。有曉事者從而竊聽之。以嗤其後乎。生前以勢位流通。末後與眼光消殞。比比然也。和尚爲諸生時。旣多讀百家書。又透向上一著。故信手成文。處處臻至。如岱宗出雲。層層動盪。滄溟浴日。轉轉光華。然未能盡其形容也。和尚平日好誦華嚴大經。直在萬花樓上。建瓴出水。一滴成大法雨。一四天下無不周徧。銀面阿難。亦當韜翰。復工臨池。得晉唐神骨。偶落一字。人爭寶之。智永懷素。又在下風矣。總之在和尚光明藏中。悉爲餘事矣。嗟乎。和尚與梅村同一諸生也。一以諸生而爲祭酒。一以諸生而爲法王。一在木天玉振金聲。一在法窟孤松峭壁。梅村或有並馳。和尚永無第二。和尚較梅村止少。廷對一策。梅村較和尚失却法語一大帙。然二公道義。水乳始終無間。不啻如道林玄度。遠公柴桑。永叔明教子瞻佛印而已也。予今幸得親見序其集。因併及之。

晦山和尚全集序

查繼佐伊璜

王子余謁晦山于佛日。晦山便作過去語。以余前草爲所知攜去。余諾草奉不意未及奉而遊于無窮也。癸丑穀日。同學金元石過余。爲代索前諾。方將戒途。奮晷而以賦雲居天上。曰。是望中又一晦山也。

接座塵而盡者弗論矣。其或再三把訂。自形骸深卽肝膈無少有刺違稱石交矣。然而未至

也。心已浹。無可復加。而理迄無窮。則諧于理。日益以進。天下聞聲相思。旣見而徹。等閒置之。卽不隙終。託爲故舊。義不敢二。然于理或淺也。或一淺而一深未洽也。卽垂老弗諼。古久要不外是。若夫理與理相反。互爲敵。亦卽互爲密。至不能以已。則此日所領殊異。閱日而變矣。又閱日而變矣。百接而高者。非其高堅者。非其堅。日見不足。乃日見有餘。卽晦山之與敬修子。是已。敬修子初從錢太倉問晦山。是聞中一晦山也。旣就靈巖一接杖錫。是見中一晦山也。久而寤寐之于心。又久而層折之于理。而于是得無數晦山。何則。晦山隨理而現。而余亦隨理而徵其現。兩人至此。無心而但有理。理自高深。兩人適與之爲高深。豈復多陳迹也哉。晦山因出故所就著述見示。且曰。古相傳。不設語言文字。却此亦是語言。亦是文字。當屬何解。余曰。語言文字。爲導理之級。如篋數然。上一撥得上一撥。撥盡則輒全廢之。曰。吾中總數已了了。不煩筭子一一矣。天之生人身。所有皆人也。而于口爲加要。旣自所入。復自所出。兼領二職。而并設唇齒喉舌鼻交贊之。于是而有耳無口。耳可不設也。耳不聽己之口無口。衆耳可不設也。而無聲之語言。便是文字。更須五指以贊之。于是而有目。目又以濟耳之或窮。蓋諸官備而後口之功名以全。人之事也。亦天之事也。設語言何害。執語言文字之害也。若必捫晦山之五官。使無所見。是革雷風而謂聲存。裁日月而謂形存。有是理哉。至于理圓而

歸于一數學有云。其法故不立。余與晦山。乃相於無窮也已。

現果錄序

周亮工 樂園

悲憫二字。是慈氏宗旨。然以最上一乘示人。愚者昧之。不得已導以因果。聞者復云意誠善。事未實也。先大人作觀宅四十吉祥相中有云。肯爲人說眼前報應。蓋欲以真實事動其真實心耳。余小子亦嘗推先大人意。緝爲一書。苦其未備。未以示人。頃靈隱晦大師顧余湖上。出此錄相示。非親見聞者不以入。復于每條下旁引直提。務開人感信而後止。真如靈壽扶瞽。得踏實地。鞠通引聲。得聆宿響。所謂大慈父。清涼月。返魂香。普渡船也。余家白門。宜之蓮侶。小有諸前修皆立意以利物導人爲事。俱刊有成書。比年來皆目爲老生常談。忽不省視。卽其副墨。亦零落無存矣。得大師此錄。日置案頭。尙可云無徵之事。不篤之語乎。願同人從此認取大師無上乘。毋負大師苦口婆心也。

晦山和尚全錄序

張立廉鴻一

嗚呼。吾忍操筆而序吾晦山兄之遺書也耶。吾與兄定交。垂四十年。始同硯讀書。旋同志參學。游膺多難。同訂林泉。此世他生。同誠荷法。雖主持法化。兄稱世雄。弟以病軀。鍵戶跔伏。溟海枋榆。鵬鷁有異。而殫力大法。爲心則同。兄乃竟捨我而先逝也耶。憶去冬過憩荒齋。將返

靈隱。云先師法席。矢荷三年。今踰四載。歸卽擇人卸擔。隨分丘壑。弘雲棲淨業爲終老計。詎意歸未數月。輒成脾疾。肢節微腫。奄致遷化。卽顧托祖庭。已慰初願。而移錫臯亭。未週一月。嗚呼。哲人云沒。世間空虛。法門之悲。豈余私痛。竊嘗慨歎。祖運秋晚。碩果行盡。鳳生庶鳥。狸混金毛。不有眼目。益就凋謝。是爲法門抱痛者一。前古宗工。多綜三藏。迄乎近世。遂鮮兼通。惟兄精究律部。淹習義海。旣熄一燈。孰起兩翼。是爲法門抱痛者二。兄夙勤淨業。晚年掛鉢。密邇五雲。將訂匡廬十八之緣。弘臺山五會之法。宗鏡忽掩。蓮漏無聞。是爲法門抱痛者三。負此三痛。故雖兄歷坐道場。行化多載。聲馳湖海。法流多賢。似不負出世爲人。而梁木旣壞。善導云徂。不能不致憾于天奪之速也。兄初秋貽札言。門人輩將諸會語錄。并詩文雜著合爲一集。序言則屬諸老友。余逡巡未應。遽聞訃音。傷心隱痛。如何可言。茲首座玉山玢公復惠顧見囑。敢不敬承。以踐心諾。竊念兄法語。始自雲居。迄于佛日。一音霆震。百城傾心。余固無容贅詞。所有雜著。多名山紀勝之鉅篇。峯崖泉壑之情狀。可以快遊。屐備輿史。卽石門文筆最富。未知齊驅孰先。余亦不具論。獨序余交誼終始。畧申傷痛之私。籍此爲延陵之劍耳。夫至痛無文。點筆覲縷。悲從中來。余又何文之有哉。

題雲居之雲壑序

熊遠寄武章

物莫幻於雲。而莫不幻於居。車輪翠蓋。白衣蒼狗。無可端倪。居則止。其所稱停雲者非耶。然桑田滄海。成壞瞬息。而紫烟銀屏。歷千百世無改。則物又莫幻於居。莫不幻於雲。及登雲居之頂。所見紺宇凌空。明湖印月。山城疊雉。白雲往來。覺有天地而卽不可無此景況者。是二者固非幻。而吾獨以爲莫幻於人。誅茅闢土。卓錫深山。割白雲之窩。而分一片之席。直顏其室。而署之曰雲壑。其入此室處。則開窗挹翠。隱几流霞。覩白雲之舒卷。如奔如拜。如聽法受戒。如守禪舍。而稟約束焉者。是遵何道以能使神奇變怪之物。悉範圍於人如此。此其人固青山之所不能方其靈。白雲之所不能比其德者耶。無亦其人之處於無。而凡天下之有者爲之臣。處於虛。而凡天下之實者爲之役乎。是物且莫不幻於雲。與雲之居。而莫幻於居雲居。而能部署乎雲之人矣。署之人爲誰。前老人晦山是也。以吾親老人久。則茲又終不可以作幻觀。何也。老人非署雲也。直自署耳。吾見老人之爲雲矣。當其藏於此壑之中。納須彌于芥子。更不見遍九州。法乳布大地矣。吾見老人爲雲之居矣。當其發於此壑之外。爲霖雨以不聞矣。不寧唯是。老人曰。吾欲吾子孫之雲祔。於是壑者爲慈雲。爲祥雲。於何有德心也。爲輕雲。爲微雲。於何有行地也。爲睡雲。爲居雲。於何有圭角也。而豈幻耶。今老人往矣。三間茅屋。一塢白雲。家風自在。嗣法九公。曾處是壑。茲而九公之法嗣。海日見居之人人雲也。代代

雲之居也。個個皆老人可也。吾見雲卽以見老人。卽以見老人之子若孫。其子若孫。又能以老人之所不幻者幻我之耳目心思。使我無從而孔捉之。形跡之將對其人而恍然若失。瞠然若化。又烏從而指爲雲。烏從而指爲雲之居。烏從而指爲雲居之壑耶。則終幻者耶。此不皆自老人作一無上大幻之功德哉。吾雲居何幸如之。嗚呼。若此壑者。天下焉可也。千萬禱可也。是役也。實九公之書記。潛木明足因海。目師一榻雲壑。乃破混沌以發其機。而以詩與序見示。余以是言。雖然。余于海公猶有待。

雲居弘覺禪師語錄序

德 洪覺範

悟本禪師設五位法門。以發揮石頭大師之妙。大率約體用爲五法。更互主客。隱顯相參。借言以顯無言。然言中無言之趣。妙至幽玄。故其問答之貴親。正如君臣之貴合。於是翕然宗以爲洞上玄風。出其門下者。應機酬詰。務以秀麗嚴峻之語。相高尚。使人放身如覽花葩之開妍。烟雲之縷纖。而仰拂秋之螺峯。染春之鴨波。劃刻百出。必欲合其法而後已。忽其繩墨。以登其門者。則非吾屬也。而雲居弘覺禪師。蓋其徒之秀傑者。乃獨不然。其演法之辨。應機之詞。朴古自在。隨意所劃。如世之良醫。坐于藥肆中。病而詣者。信手與之。藥至病愈。常謂其徒曰。佛法無多事。行得卽是。汝但作佛。莫愁佛不解語。古人純素任真。有所問詰。木頭碌磚。

意答之。實無巧妙。大底渠脚跟下穩當。苟不如此。雖說得如花似錦。無益也。余常怪洞山嗣法者。如本寂道全居遁休靜之徒。光大於世者三十餘人。觀其施爲。提演宗脈。無敢冒規致之外者。而膺公乃爾殊異。豈所謂得所以言。言不必同者歟。余追蹤其意。以謂大法本體離言句。相宗師設立。蓋一期教學。苟簡不審。專己臆斷之弊而已。法久必壞。使天下後世眩疑自退。守言而失宗。無所質辨。爲可惜也。故其超然法立如此。而公之子簡。亦相與振成之。是知俾明悟者。知大法非拘於語言。而借言以顯發者也。嘗與人論至此。其人凌憑其氣。而面頸發熱曰。醫智百巧。志誣先德。詬罵而去。吁嗟。使弘覺不死。且聞余之說。以爲知言者。今其道愈陵遲。至於列位之名。件亦訛亂不次。如正中偏。偏中正。正中來。偏中至。然後以兼中到。總成五。今乃易偏中至。爲兼中到矣。不曉其何義耶。而老師大炳。亦恬然不知怪。爲可笑也。雖然弘覺一矯之。則洞山之道不轉顧地而盡。寧有今日耶。

閉門語自序

觀衡

向上一事。不外宗通。說通亦不涉宗通。而宗說般般。皆光影門頭事。通者達也。借此宗說。達彼向上事而已。經云。諸有所作。常爲一事。則佛祖言教機緣。總爲通達此事之具耳。卽此事中。欲求宗通說通。了不可得。豈容作實法會耶。抑且教有教之正宗。宗有宗之嫡脈。若是宗

教嫡子親孫。說行俱到。逆順逢源。而骨脉自清。靈苗迥別。如其是依草附木。野鬼閒神。何怕其妝點十成。終非聖種。而明眼人前。難逃秦鑑。蓋教之微細。未易具述。宗之源流。畧爲舉示。印土祖於迦葉。震旦尊於達磨。六傳而下。兩岐發脉。五派分門。雖祖姓是同。未免門戶各異。果乃源流不雜。甚至千萬戶而祖骨猶存。自古宗匠。皆有上堂入室。普說小參。種種機用。派演雖殊。禪祭有常。究不外此。一大事因緣也。然作家宗師。權柄在手。抑揚自在。而初機晚學。智識未圓。見善知識。掃文字。遺言說。便作實法會去。見實有文字可遺。實有禪道可參。視藏教爲生冤家。拈機緣作本分事。遇人點破。則已若直恁麼去。而天魔外道。或伺其便。深爲知法者懼。衡沈濱江。將二十載。唯病爲事。衲子肯相依倚者。但教讀誦首楞嚴經。禮觀音聖號。冀發耳根圓通。究竟金剛三昧。現前縱未能發悟。亦作將來遠因。卽經以明宗。不離經而求妙。唯恐混雜異種。迷失正宗。故密護若此。如其聖胎成就。骨氣堅強。自能行於非道。通達佛道。又豈容宗說之分哉。衲子有禮誦不發悟者。或教揣摩經旨。或教參究菩薩。或接之以問答。或示之以偈句。不過一期接引。使生通達之機也。有從事者。集之盈帙。無非病榻衰喘之聲。豈敢濫同諸方上堂普說門庭施設之舉。因以閉門語名之。

書義全提序

戒顯

與井蛙說海。夏蟲語冰。不惟不信。必笑而謗之。所見異也。孔孟云遠心性絕學。幾同說夢。幸禪祖西來。自斷臂安心。以及二派五宗。單提性學。從上古錐深錐痛劄。斥滯磨昏。使人直下洞見本有。由是克復格致。儒家的骨。反在宗門矣。今業儒者不窮岷源。初事咭哩。卽以詆佛。訶禪爲務。正如盲人摸象。各說異端。飲狂泉者。反以不狂爲狂。毋怪其然也。顯初年薄事理學。次遊方外。深究宗乘。乃得洞明兩家同一鼻孔。匿影雲居。知音蓋寡。梅川尊素毛居士學禪有年。具通方見。箋說書義。不宗訓詁。不滯行墨。和會儒禪。竟開大口。振裘挈領。穿貫全書。可謂得大頭顱矣。張子韶學佛知儒。而以禪說頌論語。龍溪親炙姚江。而講學一本於禪門。真能剖破藩籬。獨步大方者。今全提說書。遙相唱拍。千載同調。覓之兩宗。齊當首肯。昔妙喜老人與大鴻泰論香嚴擊竹。五祖狗子二頌云。一擊忘所知。及趙州露刃劍二首句已盡其妙。餘皆註脚。知此理也。方許親見尊素。不然則井蛙夏蟲而已矣。

炮莊序 無可和尙集

戒顯

三家聖人。皆大醫王也。不惟諳病。亦善炮藥。慧日本草。泐潭炮灸。同一鼻孔出氣也。周孔之藥其味純。王不善服者。謂食色名利外。人生別無事業。陳腐壅滯。俗入膏肓。蒙莊氏出。以曠達高放炮之。蕩洗塵俗。知形而上。死生夢覺。有廓天大路眼孔一豁矣。耳食者議漆園。左儒。

非杖人托孤創論。千年闇室。誰則破之。此一炮大快也。我大雄教至。包羅精鴆。刮磨凡聖。以浮幢華藏爲大生藥舖。以人天十類軟中上解脫十地等覺爲病人。以大藏琅瑠止觀施戒等法爲藥方。八邪四倒諸症觸之立愈。然膠名相滯偏權者。筭沙畫地。執藥成病。釋迦老子以拈華炮之。五家諸老又炮之以綱宗。塗毒一擊。聞者皆喪。真藥現前矣。此一炮又大快也。至今日藥肆糅雜。醫師汎濫。或以毒井誤爲上池。膺藥殺人。不可指數。藥地愚者憂焉。假毛錐子大施鍼砭。先舉莊而炮之。阿伽善見陳甌籠土。能作除病利益者。漁獵殆盡。傾潢倒海。拆骨刷髓。諸門徽腐。不留剩迹。吾故曰炮儒者莊也。炮教者宗也。茲帙雖曰炮莊。實兼三教五宗而大炮之也。耆婆國手時縛藥人。愈出愈奇。向秀郭象。噤口咋舌。非千百載下又一大快乎。雖然。莊則炮矣。誰其炮。炮炮炮之一字洗脫不下。猶是癡人前說夢。青原室中痛捧吃未得在。

雲居山志卷之九

啓

請晦山大師住雲居

果日中天。仰獅猊之瑞相。紅爐片雪。鑄龍象之金鎰。鐘鼓載振于祇林。雷轟電掃。塵拂高揮于歐頂。海沸山騰。恭惟晦山禪師默契真宗。別傳教外。鍾婁東之靈秀。寶筏渡盡迷津。印臨濟之正傳。慧日高懸祖域。胸羅彩鳳。舌吐蓮花。慈音響萬壑松風。妙偈飛一天花雨。惟此雲居古刹。夙稱歷代祖庭。不有領袖宗工。誰克津梁後學。側聞香象。近在匡廬。聽瀑布而望香爐。目空四海。踞五峯而棲三峽。氣冠諸方。然異草寒巖。真人豈宜久坐。荷衣松食。古德亦或回機。敢藉瓣香。前窺丈室。途遙三舍。到可一肩。請仍棲賢佛印之風。來繼昭覺高菴之席。祇園載闢。無心杏雨露滋新法苑。重開明月湖烟塵頓洗。陽等久淪塵濁。猶當鐵壁銀山。遙聽鍵椎。專恃朝提暮喝。場開選佛。敢妄擬白太傅之當機。座擁法王。願竊聞老南泉之說法。佇看儀範。聊布悃誠。臨楮曷勝翹企。法弟熊德陽。熊維典。張士璠。吳之翰。袁懋材。吳孔安。徐觀。

徹熊土愷熊土夔熊土亮熊土龍熊元哲熊維玟熊虞牧全具

請雲居晦翁和尙住東林啓

文德翼

伏以古德以一大事而示現。分化無方。群生仰三世佛爲依歸。投誠有地。覩茲東林舊刹。匡
阜名藍。創自前朝。興逢此日。恭惟臨濟下三十三世雲居晦師大和尚。親持瓶錫。大展門庭。
從維揚四五千衲子。踴踏掌中。翻身又乳向歐峯。七八十祖師熱忙隊裏。豎指開雲。坐聽虎
谿亭內。重宣睡下之威音。神蓮閣前。再覩眉端之彌勒。此地乃舍衛城耳。能示無亦能示有。
禪師洵金鶴鳥然。解入靜卽解入喧。凡此溪濱牧唱。何殊昔年三更蓮漏之因。竚觀座側禪
燈。共沐今日五葉果成之澤。翼等丹誠一片。素業千生。自真公梵廬借榻之時。已識鄰候芋
熟。晦禪師福田分耨之日。敬聽山谷樨香。借裴相國牙笏供養齋厨。卽此是離此是解蘇學
士帶圍鉗錘聲色。觸者非背者非。久瞻歐月。移照匡雲。願期堂上鼓轟。便望嶺頭鐘送。特啓

請圓悟和尚住雲居

德洪

地號雲居。非石梁隔。分凡境。世傳天上有山神常護法幢。須求魁壘之耆年來轄英靈之衲
子。恭惟圓悟禪師。具豎亞頂門之眼。行全提祖令之權。舌覆大千。入語言之三昧。身分剝海。
爲游戲之神通。豈暇奪人境於笑中。何止分賓主於旬內。願垂方便。俯徇時機。大震海潮之

音用祝後天之筭。

請晦山和尚住雲居

佛心圓具。猶假修證於明星。祖印初提。必發懇誠于積雪。衆思潔心而潔慮。仰祈逗教以觀機。大闡宗風。重輝祖刹。恭惟晦翁和尚臨濟正脈。靈隱嫡傳。聲光久播諸方。衣鉢獨傳法窟。幽棲廬阜。高追古德之風。坐斷金輪。遠異時流之燄。然摩霄威鳳。豈宜久滯林巒。透網金鱗。應用奮興霖雨。茲者雲居道場。真如古寺。二派五宗之法。將四十餘代以雲興。幸遇真傳。忍令虛席。敬攀法馭。來震圓音。俾老夫佛印。重開生面于雲門。圓悟高菴。再扇真宗于濟上。且象龍高步。尙遍被于三千。香華勝因。猶遠求于萬里。況茲匡歐相望。喜雲岫之非遙。緇素同心。幸名藍之得主。削牘以進出之一卜再卜之誠。排闥而來。必有翻然勃然之幸。伏望雲端振錫。座上浮香。垂彌天之法雨。普潤靈苗。操蓋世之洪鍤。遍烹偉寶。續佛慧命。南宗唱而北教隨。挽世頽波。權實融而玄要具。敬伸積悃。用叩洪音。曷勝歎依跂切之至。雲居監院音住。偕合山宗學音健寂印海堂音洽祖星福行寂湛崇學等頓首拜。

賀燕雷和尚繼雲居席

伏以千里同風。遙聽雲獅之吼。一枝現瑞。重增歐阜之輝。曆數攸歸。謳歌有自。人天共快。瞻

注同心。竊以授受之際。今古爲難。隆紹之間。續承不易。惟此雲居之法窟。實稱天上之禪關。歷代古錐。雷震霆轟于此地。五宗俊傑。龍騰鳳翥在當時。惟我老人。宿秉願輪。孤行正令。宗傳濟北。弘恢鄧尉之風。律本南山。擊出千華之月。烹鱗鍛象。五湖衲子雲從。裂石崩崖。天下宗師避席。門庭峻嶮。施設天然。匪稱嫡骨兒孫。終屬難勝大任。迨茲膺命。夫豈偶然。恭惟燕雷座元大師。學秀儒林。行嚴密地。才儲八斗。飛傾灑瀝于筆端。宗透三玄。親印滹沱於棒下。研盡五家莞籥。窠臼掀翻。拈來七事鉤錐。金圈脫穎。一向深藏頭角。爪牙驚人。今日推出人天。一家繩武。父作子述。側聆塗毒吼雲中。舊令新行。爭看象龍奔座下。元樹等欣聞千里。拘桎一方。久懷慕蘭之私。徒切瞻韓之念。無由趨賀。聊竭寸衷。臨楮不勝翹企之至。謹啓法弟元樹智鎔。元輿正瑞等頓首拜。

奉賀雲居燕翁和尚續席

伏以波澄秋水。喜明月之重光。瑞擁雲山。聽碧溪之新韻。笑焉山于昔日。猶費周遮。據歐阜于斯時。不資餘力。披衣就座。垂手相承。恭惟雲居新和尙座下。始博名儒。歸源選佛。契心宗于歐嶺。出語驚羣。傳法印于滹沱。尊居第一。撾七事之毒鼓。裂石傾湫。掃五家之葛藤。窮骨出髓。牙爪向傳于天半。聲名久播于諸方。今日令行。推門落臼。隨機唱和。虎嘯風生。條令斬

新收鳳麟于掌上。重開生面。擁龍象于臺前。挽濟水之狂瀾。鎮天山之砥柱。王老大任。果得其人。驚嶺風回。孰不從化。登破額遙望雲峯兩彩一賽。懷月湖迥超碧玉。青出于藍。良勢欲前而力不足。私心有餘。荷恩重而報未能。非筆可既。容後禮觀之有日。再聆法誨之無窮。臨楮神飛。不勝悚慄。戒弟子德。□

請雲居西泉寺起高和尚赴圓通啓

大成竺菴

切以祖庭寥落。秋深更覺荒涼。法社凋零。世晚堪嗟淡薄。誰能降尊就卑。多因居先啓後。恭惟起高法叔大師。骨格天然。操持超放。德響雖潛山谷。法音已布人間。成忝同一脉。自愧雙貧。信宿雲居。相見處原非逆旅。訂盟匡阜。到來時總是家山。幸承菊蘚花香。莫待風林葉落。寒爐柂枯。已教童子安排密室巾瓶。佇待小師指點。恭裁短札。遠迓高輿。下盡殷勤。臨楮戰慄。謹啓。

雲居山志卷之十

疏

奏請藏經疏

洪斷

江西南康府建昌縣雲居山真如禪寺住持臣僧洪斷謹奏。爲乞恩頒降藏經事。臣本草野微僧。荷蒙聖恩洪庇。萬佛堂裏。金碧晶輝。九品道場。森羅梵侶。念載馯依淨業。自揣道行荒疏。御賜虛消。禪門再扣。瞻風撥草。尋詣雲居。光景依然。明月湖流。澄若鏡。遺風未泯。趙州關隘險可梯。晉有神僧。相傳杯渡。唐自弘覺肇錫金闕。歷朝敕建之什襲簡書。飛白御煤之光。留歐阜。佛印承金盂磨衲。圓悟蒙乎詔褒崇。欽聞陛下頒施龍藏。天下名山。咸被恩渥。臣僧所住真如禪寺。誠無忝供佛祝釐。是以昧懇聖恩。頒賜大藏奉鎮雲居。闡揚至化。汲引蒙頑。歲時檢閱。鐘梵莊嚴。則睿筭共乾坤。永固皇圖與堯舜彌新。臣僧無任激切恐懼之至。爲此具本親齋奏聞。伏候敕旨。

募建雲居大殿疏

戒顯

雲居古寺。歷代祖庭。五宗在此雷轟。諸方共所翹仰。佛印之聲光未泯。蘇黃之翰墨猶存。道膺道簡。宗開洞上。高菴大慧。法振揚岐。以及法眼羣英。龍驤虎驥。雲門諸老。玉振金聲。圓悟稱爲天上雲居。佛眼亦謂甲於江左。雖則奇聞。實非虛語。信象窟之蓬壺。而獅林之弁冕矣。第自諸緣老宿。奉神廟敕重建以來。歲月浸久。屋宇漸傾。昔年締構。雖係鉅材。山頂高寒。全殊平地。冰霜嚴于劍戟。風霧烈于雷霆。以致佛殿僧寮。咸憂圮坼。齋堂庖湧。悉慮崩摧。且以錦繡琅函。頒自御府。鐵瓦藏殿。冠乎西江。椽因差脫而星疎。經漸淋漓而腐敗。其餘從屋以達重樓。四時雨灌。則室內成河。萬壑雪飛。則床頭積縞。崢嶸祖席。致貽龍象之悲。奇突名藍。隱切荆榛之患。匪因巨闕。孰見改觀。茲者某禪人發真實心。立堅固志。誓以苦行。力爲鼎新。惟塔寺之莊嚴。乃佛法之標榜。卽小菴小院。尙宜創宜修。況雲居巨刹。天下禪觀。雲嶺擢羅漢之田。峯頂漾月湖之勝。石鼓聳於天半。鉢盂拱於當門。趙州關石闕儼然。佛印橋玉虹如故。禪流共聚。屬四海之英賢。古跡相傳。擅千年之奇秀。忍看頽敗。不念綢繆。豈惟海衆雲笠難安。抑且檀越福田奚種。所覩乘願宰官。具信長者。念茲勝地。慨發喜心。傾湘水之資財。捨鍾山之屋宇。共圖丹巹。立致輝煌。澤留祖刹而無窮。碑勒名山而不朽。願恢檀度。請着先鞭。

歐峯高頂。天半孤村。與雲霧而同居。幾星辰之可摘。資糧固罕。器用尤艱。高庵之大碗無存。佛印之銅盆久廢。賣來金牛飯。時愁鑽鉢之盛。烹出趙州茶。難得玻璃之蓋。某禪人欲募千僧磁碗。用嚴萬仞雲居龍象無窮。先備五千之數。琅瑯有據。聊成一藏之緣。又以虛盃回山。勝心未滿。思營妙供。以結奇緣。瓦盆以薦羹。笑雲厨之太陋。銀椀裏盛雪。又冷淡乎一堂。齋與器而相成。兩彩並賽。法同食而俱轉。一串皆穿。盃旣脫丘。幸饒州之不遠。索而奉器。必仙陀之有人。菩薩子請喫飯來。切忌云討甚麼盃。

雲居山真如禪寺募緣疏

王肯堂

紫柏大師嘗爲余言。雲居名叢林。唐宋以來。以祖師禪預傳燈者。四十有八人。其境亦勝絕。而以久湮。莫克興復爲歎。余存之於心不敢忘。今法侶繆仲仁自山中貽余書報。余以雲居之復已有緒。則京師萬壽堂諸緣師之力。而持書來者。卽其徒也。時已創建禪房三十六間。且次第建大佛殿。將化木於贛州。而屬余爲之疏。余方有奇冗。而來僧告去甚急。聊走筆草數語以塞其來意。夫閻浮提衆生。以財爲命。而施者不乏。故佛種不斷也。然吾聞之。造寺法用。不可楷定。隨其施主。物有豐儉。雖量力而作。然須用心精誠。故須達爲凡之時。賣肉得財。居錢當是賤出貴。常願荒儉。雖富於財。勇於義。由穢心故。以此造寺。終遭煨燼。祇陀心淨。樹

還爲生。由是觀之。化者施者。可不慎乎。若夫所在護持佛法僧伽藍。以輔儒教國法而行。則固吾高祖成祖二聖之意。而賢牧守化民易俗事也。余何贅焉。

募造釋迦佛銅像疏

于玉立

林間錄云。金剛般若經。以無住爲宗。破相蕩有。纖塵不立。而乃快說福德。至以三千大千世界七寶爲稱量。宗鏡錄云。菩薩行般若時。火燒三界。內外物俱盡。於中不損一草葉。夫如是。直得維摩默地。猶隔一塵。而更說有說無。妙智徒勞。劍去久矣。卽今諸緣師募化諸善信。造丈六金身。直下與林間宗鏡所說同一時節。諸人若欲薦取。但發盡施心。發盡施心。卽施心不可得。卽釋迦老子現前矣。願諸善信深究予言。何止破憚吝城。當且徹法源底也。伏維珍重。

題雲居寺疏

董其昌

諸緣上人弘法于京師之萬佛古刹。遂爲寶坊。旣又去喧就寂。振錫之建昌雲居。膺簡道場。但存廢址。上人憫焉。誅茅結宇。得三十楹。夕梵晨鐘。安處徒侶。稍還舊觀矣。惟是鼎新古殿。鳩工爲難。是在十方助成勝果。請予一言爲之前導。夫智波羅蜜。娑婆勝于香積。則檀波羅蜜。雲居必勝于京都。何則。財施雖均。難易區別。京都所藉者皇宮內院。雲居所藉者十方信

心士大夫故耳。諸緣其永肩之。

又

楊繼禮

諸緣上人飛錫滿天下。意欲普度衆生。其功行較著者。一在京師之萬佛菴。一恢復建昌之雲居寺。蓋不難勞苦一身。爲大衆造無量福業。余願十方大衆。各自造無量福業。

又

羅大紘

不入名山。令人品低俗遠天邇。氣味自殊。諸緣禪師再興雲居。雖未落成。然其規模弘遠矣。不佞于此山有宿緣。落魄數年。然終不敢以貧自恕。且卜最勝庵于上頭。爲異日晏息之所可也。

雲居茶菴募蓋禪室疏

熊維典

邑西高山大川。縣亘百里。奇峯絕壑。迤邐相屬。然而雲居稱焉。以其蓄渫雲雨。神者棲之。故爲一方名勝云。夏之日。四山杲杲。望者徒勞。惟雲居一縷。突起晴空。不崇朝而澍矣。以故旱而禱之。雲居。然而應否。不齊者何。土人之言曰。禱者初不甚詳。至則挹溪流之活活者。瓶挈而馬逝而非其石漚。適與雨會。便云響應。而不知非也。石漚者。其一在碧雲峯之阿。有碧焉。箕張而斷領。中有聯凹。約可壺漿。澄鮮而碧。炯若雙瞳。而門徑湫隘。非髫鷁者不能達其奧。

以故甚秘。山塢如楊梅隴。耕頭源諸家歲必負釜持梁就磐作供而因以釜實之枯潤爲雨暘之占往往中焉丙戌之旱諸禱雨如二塢者始濟蓋其所丐取者真靈液云今之旱予擬轉如土人言未果會某募蓋禪室見屬爲疏師室乃在碧雲佳處嶺下人稱雞籠山一云茶菴者是也其登峯之一徑適當暑側爰蓋斯室以識其處度亦望雲者所共歡喜豈有斬乎予又雲霓之最渴者於是乎書。

雲居募造千華閣疏

朱徽遂初

余昔遊金竹坪望其前遠山橫空白雲縹緲掩映於蒼翠有無中僧指曰此雲居山也是日方取道含鄱嶺造五老峯探奇抉勝顧盼不暇而一抹歐峯又隱然添予遐思矣祖庭莫盛於西江其最著者青原百丈黃檗洞山大愚灘集雲峯等處雲居亦其一也自道膺道簡相繼出世蓋在唐宣昭之際嗣後則清錫曉舜了元道齊善悟法如德昇自圓德會四十餘人傳持大法亘古鑠今比他叢刹爲盛末法凌遲鐘魚岑寂求其寢削萬機壁立千仞亞一眼而當頂設三關以驗人者不道全無大都較少明時有諸緣斷公奉敕重建扁其堂曰寡過未能聯其柱曰智水消心火仁風掃世塵皆神廟御筆及所賜滲金聖像大藏等經寵錫輝煌嗚呼盛矣近日則晦山燕雷二尊宿意者殆其人乎膺簡父子薪盡火傳予雖未之見庶

幾旦暮遇之。會其徒元善募修千華閣。蓋卽曩之所謂熾然建立。海印森羅者。而今皆已漸就堙替。雖虛空何有起滅之殊。而世諦未免盛衰之愴。昔東坡爲懷璉作宸奎閣記。而欲錄入英宗手詔。孝宗賜寶印。圓覺經註。及別峯二字。陸放翁於記與誌銘兩書之。且曰。雲漢之章。下飾萬物。其重如此。今雖時移事易。而扁而聯星垂璧燦。劫火洞然。大千不壞。天龍神鬼。默護持焉。況今開朔之初。諸當道大宰官。皆般若香中聞熏已熟。從果位來。現身救世。輔助聖化。振錫宗風。斯千載一時哉。予聞雲居舊有古鏡。未了公案。請元善特出吹毛劍。一斬葛藤。令劉居士輩作禮設供。歡喜開疏。何須洞山老人別代轉語。余旣積慕其勝。今讀歐峯吟偈。并諸語錄。直下全提。却似法堂前早相見了也。因識數行。爲擇木堂結緣。他日至雲居。知是自己家裏人。更不勞明窗下安置。

臥龍菴募疏

熊德明石照

雲居之臥龍菴。蓋熏修之勝地云。往予冒赤日。走山中。喜其涼生竹戶。潤滋苔徑。趺坐膝輪者累日。意猶不能別。頃下第還里。未解裝。卽趨山間臥龍謀分一席。而菴已作火中蓮矣。菴主指灰燼爲訊。曰爲屬色義。爲屬空義。予妄應之。曰燒空不壞。此真色義。因相顧而笑。已而嘆曰。剎那三載之間。兩入臥龍。變幻已若此矣。今者灰燼滿前。金碧亦滿前。昔者金碧滿前。

灰燼亦滿前。予烏知其孰成孰壞哉。然則自金碧而灰燼之可。卽自灰燼而金碧之亦何不可。有代菴主募財者出冊示予。因書以勸助。

雲居山志卷之十一

銘

傘居顥愚大師塔銘

熊德陽

神駒冀產。大鵬圖南。息以六月。妙發祕函。圓通啓幢。醒夢之靈。天下一家。不立門庭。以人治人。以心傳心。往虛歸實。高足如林。生也自古。死也長今。億萬年兮。鎮歐阜。百千戒法兮。演慈雲。道人言。何足爲輕重。聊以寫道人佩服之襟。

味白老宿塔銘

余自丙辰後。兩遊雲居。時以禪悅接四方縉紳學士者。則諸緣和尚之高足味白禪師也。師故南昌胡家坊胡氏之子。夙有風尚。不屑于流俗。十五歲祝髮於其里中千佛寺之月堂。雲遊四方。多所自得。吉州善羅匡湖先生。留吉數月。戊戌諸和尚以西昌張洪陽相國之故。力主修復雲居。師以是時參和尙。和尙興復費繁。朝燕暮吳。堂構之力。委于其徒秀峰。而疏通大眾之脉絡。應待四方之往來。唯師是賴。雲居業就。和尙仍歸燕之萬佛堂。以事業付十方。

善知識。以菴住其眷屬。師得白水祇樹堂。時十方善知識無善者自相攻擊。當事擇諸緣徒之能者掌寺。署曰慧錦。慧則師諱。錦則秀峰諱也。丙辰余給假將歸。諸緣謁余而請曰。雲居賴居士之力。得底績。初爲十方計。而今屬之兩徒。非本意也。仗居士護法如初。爲善卽兩徒。亦煩顧復云云。歸以此告之。未幾秀峰入龍溪。師未能承十方之人不可得。至丁丑秋始得顛愚和尙。遂以禪院付託。欣然捋鬚曰。今可以下報老和尚矣。師退老於祇樹堂。又六年。示寂。蓋年已八十七。整潔雅飾。數十年如一日也。故其徒子徒孫皆翼翼有致。余知師習詩。今八月十三之吉。歸傍於祖塔之左。其徒孫默慈持其詩稿求誌。得讀其影圖贊及修塔紀事銘。乃始向知師者未半。世人固易知乎哉。師僧臘凡七十三。其孝徒有四。孝徒孫有七。及玄孫見其靈骨所歸艮山坤向之銘曰。味白味白。慧先人百。推儒之理。壽佛之脉。藹藹津津。飲人以醒。規規矩矩。示後以格。付託事重。如護拱璧。及得其人。如委重責。老安祇樹。歸而展事。佛子佛孫。綿綿奕奕。承先守訓。永世無斁。

大殿佛座下地宮碑銘

洪斷

萬曆壬辰二十年春予至山。有髮僧戴明賢遺徒二三人。固守寒巖。因思雲居爲江左禪刹。何期廢之掃地。喟然嘆息久之。遂立誓閉戶三載。跪墮華嚴。而僧足半百。欲發心興復。卽化

丹陽將墅檀越賀學禮學易學仁共建大佛寶殿。未幾聞於上。遣官施金。建藏經閣方丈。天王殿。鐘鼓樓。三門左右禪堂四所。伽藍祖師二殿。真君龍神等祠。齋堂厨庫茶寮養老延壽堂。旦過退居知恩齋皆遂落成。蒙上復鑄度金千佛毘盧像。甚奇偉。丙午年間。又化金壇于玉立繆希翁丹陽賀學仁等。共施金鑄釋迦像高丈六。雄麗而四方法侶。亦不我棄。衆常盈四五百。飲啄同時。共田產茶園炭山竹木數數蓄置也。將安立佛像。先築壇座。座下有鎮有古滲金釋迦一軀。原地宮中。舍利牋與後殿少分許。磁瓶盛之。古爐鉢。梁公硯藏于佛座地宮之中。銘于石。以記歲月。度未來劫。因知其爲大明萬曆丙午歲也。而亦倣法始禪師佛圖澄事蹟云。銘曰。

真如非相。法爾隨緣。生滅興廢。覩體湛然。唯斯二者。天人想緻。但能領畧。虛空落地。于新古刹。辛苦萬端。患難雖多。三寶消歸。我願常堅。明安鉗記。曆代古今。始終堅固。光境交輝。無前無後。當人洞明。法身甲冑。未來劫中。知音得遇。吾銘斯曾。繼往貽來。因然果熟。優鉢花開。

傘居顥愚大師塔銘

道 盛覺浪

一代時教。我佛爲宗。開創在德。保守有功。法久成弊。挽救猶難。不有作者。誰勝暴殘。巍巍五臺。有獅子窟。能跳入者。決非他物。空中一印。文彩已彰。印泥印水。首楞是王。一親紫柏。猛歎

鐵漢。再參慈山。執破流汗。痛念恩深。傳經授戒。觀音大士。今何所在。普門洞開。無機不攝。如木人歌。有口無舌。湖南江西。風行草偃。未後金陵。忽然電捲。紫竹林中。可留瓜髮。骸歸雲居。塔標明月。吾作此銘。寫師生面。所關法門。千古如見。

雲居山志卷之十二

天上雲居賦

戒顯

雲居去匡廬百餘里。雄踞洪州。秀出天半。外望聳峻。中實坦夷。五宗禪祖。已住四十八代。佛眼謂雲居甲於江左。蘇黃題詠。及圓悟語錄。皆稱四百州天上雲居。又云。天上雲居古道場。余挂笠以來。六經寒暑。不揣荒陋。稍爲鋪陳。仍從古名。稱天上雲居賦。

佛燈西燦。祖印東流。嶒峩大夏。壘塞神州。二派五宗。麗名山而樹刹。馬祖百丈。獨傑出於洪洲。四海仰宗風兮。日月西江稱法窟之金甌。維此雲居。卓出天衢。挺海昏之秀域。隸洪都之巨區。外萬仞以壁立。中平衍以膏腴。媲越州之紫闐。韻海上之蓬壺。仙人歐岌。始寄雙冕。爰著名於歐阜。遂並美於匡廬。脉源衡嶽。坪接大洪。匯千巖與萬壑。迅奔走而趨東。據正龍兮俯羣岡。控蜿蜒兮秀芙蓉。左孕同安。右發寶峯。後枕雲門之翠辰。前橫象王之玉虹。儼蓮華之城郭。圍梵闕而崧龕。列岫崔嵬。層巒迴複。鉢盂拱于明堂。石鼓架乎嵒曲。當門漾明月之湖。水口飛五龍之瀑。波光瀲灩。以浴日遙射山門。華幢杳靄。以浮空雙懸石屋。星辰可摘。鬱五老之嵯峨。雲漢爲隣。駭仰天之聳矗。趙州關峻兮。雙闕峙乎層雲。佛印橋橫兮。碧溪瑩其

如玉羣峯倒影于湖心。祖塔嶙峋而肆屬。青疇綠畝繞禪舍以如帷。牧唱農歌徹雲端之邃谷。雲開西嶺講經臺出於青冥。塔涌孤岑羅漢奇彰于嶽麓。安樂公之翊衛樹蔚神村臥龍菴之幽深門藏鳳竹。鷄峯五墮窮怪石之奇仙脚石船豁幽尋之目黃荆有樹兮手植于前賢銀杏無心兮參天而翠簇遙瞻祖席梵宇輝煌畫棟飛翬兮樓臺聳于天半雕甍耀日兮殿角踞乎中央玉軸琅瑠兮頒自御府鐵瓦藏殿兮冠乎西江鉗錘則雲獅有室毘尼則明月爲堂供列伊蒲二庫基留艾治田充香積諸庄碁布雲鄉宸翰龍文琳堂懸神廟之筆錦旛繡篆璇題荷聖母之章若夫名人躡訪妙韻鏗鏘貞白遺咏襲美流芳詩篇燦于白傳翰墨醉于蘇黃晏相之豐碑文高燕許天童之題壁字重琳琅蔣運使之雄書怒猊渴驥張洪陽之巨碣豹炳龍驤鑿厓藏書垂禪林之寶訓擘窠鐫石署弘覺之道場擅四百州天上之雲居地靈人傑產五十代諸宗之禪老積厚流光開山伊祖厥惟道容全慶全誨繼續宏功初築瑤田次建歐峯上下兩刹屹然雲封泊乎膺祖天縱真龍一燈不振大顯新豐不滯玄微鉛碎琉璃之殿通身尊貴簾垂翡翠之宮三十載之弘揚道敷域外千五百之參衆聲播寰中道簡道昌親傳鉢袋懷嶽懷滿遞闡真宗德緣承嶽而主七鬯智深嗣滿而扣洪鐘高建雲居之軌共稱洞上之雄自茲以還燈弘法眼連綿數傳聲光互顯清錫至廣平而玉振

金聲。道齊出法燈之門。風馳電閃。義能踵金陵以重光。慧震躡清涼而載闡。迄乎契環。大見改觀。弘開華構。肆敞名藍。銀榜騰輝于嵒谷。芝泥降澤于林巒。讀龜螭之巨作。嘆龍象之雲攢。鼉鯨震吼。鼎簾堅完。義德承其末葉。紹遵振其將殘。繼而肇起。厥有雲門。匡真卜靜。古寺猶存。至于雲居脚下兒孫。舜老輩聲于朝野。佛印靄譽于乾坤。三峽未遷以前。在此龍騰獅吼。八坐道場之暇。于斯鳳逸麟奔。思文仲和。洵稱的骨。波公涪老。交頌奇人。曰寶曰舜。留金章與玉句。爲億爲慶。唱白雪乎陽春。心印名猶題柱。融公塔尙比隣。斯宗既往。濟北雲興。仗錫見谷隱之傳。眼空虎豹。元祐大黃龍之派。雪壓麒麟。佛果圓悟。策杖來登。紫賜簾前。浮玉遠飛。弓虎錫。僧來天上。形庭親奉。兮鸞音。瞻鐘樓。而鼻孔打翻。喜宗振之電捲。挂眉劍。而梵天血濺。快妙喜之霆崩。高菴主席。英俊如林。讓尊行。而東堂退處。辭臥龍。而華頂高尋。天下嘆雲居拄杖。至今稱法窟金鱗。法如香積。悟啓聖僧。與圓與祖。俱出龍門。幸高菴之有子。獨著美于普雲。自茲踞座。知識繽紛。法嗣龍翔。頑菴德昇。光延佛照。梵琮是稱。蓬菴與如山。爲石頭泐潭之後勁。掩室與普莊。號松源天目之明燈。志禪於仗錫爲接武。卽菴以一粥而標名。歷二十餘傳。皆滹沱之香象。與三宗諸宿。並歐阜之金鵬。其餘過化。指不勝屈。趙州親貲艸鞋。韶石深藏鐵骨。薦福古稱塔主。徹見雲門。洞山聰爲燈頭。片言破的。明珠在掌。投機賞

佛日之空。版響明心。阻雪傳塗毒之策。竹菴同妙喜以編書。覺範載羅漢之遺跡。甲於江左。佛眼之鼎呂常新。高齊北斗。真淨之球鍾在昔。慨從元末。以逮明初。獅弦響息。驚嶺燈蕪。歐阜遭咸陽之烈炬。紫柏以憑弔而唏噓。爰屬斷老。來奮誅鋤。喜巨鰲之能載。捧帝簡而披圖。畫拱雕楹。敞精鑿之廣廈。髹形縷彩。復巨麗之靈都。載挿竹竿于蔓草。重開明月于天湖。中興異勸。籀篆難磨。繼而卓錫。聿有顥愚。唱圓通之教海。燭道俗于昏衢。德重峯居。永羅漢壇。之手澤。龕藏東塔。垂竹林集之遺書。方師繼席而高蹈。遜公推轂以相扶。愧余小子。自鄙荒疎。閱六霜之荼蓼。已累啓乎洪爐。吁嗟乎天鍾奇秀。山湧扶輿。江南首刹。蔚然名區。玉線金針。宗開於洞上。綈龍角虎。道盛於馬駒。法眼英靈。道齊清錫。雲門領袖。佛印老夫。怪聖賢之繼起。甲海嶽之禪廬。何期明葉幾至模糊。三百餘齡。岌岌乎祖燈墜地。四十餘代。危乎至德將孤。而今也。奮蚊足與螳臂。勉嘘朽而吹枯。望宗風之載烈。殫手口之卒瘞。思前哲可師。忍聽銷沈于烟艸。名山多勝。敢令湮沒于丘墟。懼靈蹤之漶滅。以韻語而塗汚。億萬斯年。覽余作而興起者。亦知此爲西江之最勝。而卓然稱天上之雲居也歟。

雲居山志卷之十三

書問

答雲居佛印禪師

蘇 軾

軾啓。歸宗化主來辱書。方欲裁謝。栖賢遷師處又得手教。眷與益勤。感怍無量。數日大熱。緬想山門方適清和。法體安隱。雲居事迹。已領冠世絕境。大士所廬。已難下筆。而龍居筆勢。已自超然。老拙何以加之。幸稍寬假。使得欵曲抒思也。昔人一涉世事。便爲山靈勒回俗駕。今僕蒙犯塵埃。垂三十年。困而後知。反豈敢便點涴名山。而山中高人。皆未相識。而迎許之。何以得此。豈非宿緣也哉。向熱順時。自愛不宣。軾再拜。

又

經年不聞法音。徑徇荒澀。無與鋤治。忽至手教累幅。稍覺灑然。仍審比來起居佳勝。行後二年。水陸萬里。近方弛擔。老病不復往日。而都下人事。十倍於外。吁可畏也。復欲如去年相對溪上。聞八萬四千偈。豈可得哉。南望山門。臨書悽斷。苦寒爲衆珍重。

答佛印禪師

黃庭堅

啓。往來雲居廬山之下。聞道譽籍甚。不得不讚。文句多傳中朝士大夫門。望風懷想則勤耳。忽辱示書存問勤懇。小人沉迷俗狀去道甚遠。何以得此於善知識也。未緣參對。願爲甚忍世緣。謹奉狀。

與雲居教首座

伏奉禪師七月七日遺書。承卽以是日薪盡火滅。魔事熾然。法幢摧折。人天所共悲仰。伏想山中異類悲鳴。草木變色。凡諸外護仁賢。誰不哀痛。聞闍維有偈。恨以世諦束縛。不能往同法會。今送香一盒。并燒香頌去。幸爲告白。匆匆萬不一陳。

與雲居高菴禪師

耿延禧

演祖自海會遷東山。太平佛鑑。龍門佛眼二人詣山頭省覲。祖集耆舊主事。備湯果夜話。祖問佛鑑。舒州熟否。對曰熟。祖曰諸莊共收稻多少。佛鑑籌慮間。祖正色厲聲曰。汝濫爲一寺之主。事無巨細。悉要究心。常住歲計。一衆所係。汝猶罔知。其他細務不言可見。山門執事。知因識果。若師翁輔慈明師祖乎。汝不思常住物重如山乎。蓋演祖尋常機辨峻捷。佛鑑旣執弟子禮。應對稍緩。乃至如是。古人云師嚴然後所學之道尊。故克嗣門下。子孫多賢德而超

邁者。誠源遠而流長也。

與雲居妙喜禪師

韓駒子蒼

邂逅金陵。雖適我願。然始不謂遽往廬山。故對床夜談。不過四五。自離岸至今。不聞消息。極以憂懸。得書乃知到山旬日。道路安穩。又知便首眾雲居。與老和尚分座說法。良深慰喜。昨煩作覺範行狀。及出世入寂月日。欲爲作一銘。託同安入石。切不可緩也。

又

昨顏知藏歸。附書奉勸。以彼太閑寂。山下時有劫掠。似非禪定之所。不若與衆來此。或須卓菴。極易事耳。不知何故。了不見聽。今郡守欽仰道德。且采衆論。特屈公高躅。說法廣壽。不肖語之曰。此公誓不出世。雖堅請必不來。然自聞議定。一方道俗。無不延跂。昔汾陽累請不出。後來自要住院。乃知通人或出或處。豈嘗固執。況今禪道頽壞。所以圜悟望公振起揚岐之風。若孤峯頂上。草衣木食。終不爲人。此則獨覺行也。豈圜悟之意哉。

復雲居諸緣和尚

張位

從來勝刹。必待名僧。向聞駐錫雲居。有意闡教弘道。祇誦拱手希有。來示上遺衆公營建佛日光輝。雨露恩宏。一溉奚有。薄具白金一封。少助齋供。青布二疋。少資綴衲。見意而已。其四

十二章經領謝法施。諸未敢登。附謝不宣。

復雲居諸緣和尚

劉日寧

別如許年。每從風塵勞擾中。何日不思方丈清風。以及上人玄誨也。勝遊欲再。尙未可期。不審機緣。何時可遂。頃獲承遠問。玉麈如捉。復辱清睨數種。何啻菩提甘露。薄儀少申候愫。佳葛二端。仍藉乎完謝。辯色遙瞻。曷勝睞結。

上雲居顥愚大師

劉同升

同升望大師遠臨如渴。敝邑瞻仰無不同然。以爲青原一燈續在大師。茲住持發願來雲居求戒。蓋其絲衷之誠。升所深與者也。九日後通郡有公會于七祖之山。倘大師是時至。尤屬奇緣。升已約寨雲伯玉梅公諸君。掃徑而俟也。敝郡吳公祖素心慈行。真護法人。思見大師之切。去歲卽爲升言之。非世諦也。願大師速慰衆望。

復雲居晦山和尚

王時敏

搔首停雲。高足忽至。承手書累幅。誨勅勤拳。並賜語錄佳章。捧讀再過。仰見老師以正法眼藏。接引羣機。妙選人根。紹隆佛種。將來龍象蹴踏天下。豈止江介一隅。大振宗風。而普說三則。更爲末法良砭。近虞山錢牧翁。凡有譏著。必極筆詆訶宗門。謂棒喝如戲劇。付法如酒籌。

斥爲引薑導瞽。其言不無已甚。但邇來此道。實覺太濫。凡街頭坐募之徒。幾月不見。必得付授揚揚稱心空及第而歸。鬢髮留鬚。望門投止。不論荒祠廢圃。偶集市兒村嫗數人。輒開堂說法。在在皆然。吾鄉現前充滿。非獨爲識者非笑。卽愚人亦知所厭。陵夷屑越至此。無怪乎有魔民波旬之日。今老師此說一出。使諸方各知慚愧。皆務真實參究。留禪門真種子。一雪此言。則吾師爲大法砥柱。所謂孟子之功。不在禹下矣。敏門外漢。何敢饒舌。但憶往年竊贍緒論。嘗以宗門衰替爲慨。故因來教不覺曉曉如此。希恕狂率。

復雲居晦山和尚

張有譽靜涵

古稱成佛須是慧業文人。然從來慧業。從佛道而來者甚多。向佛道中去者絕少。至西來一脉。理難論窮。文人到者裏。往往反多一層障礙。乃若今朝名播儒林。明日風馳祖域。如龍女鶯子刹那間不知何以轉身。則方今大善知識雖多。不得不讓大師放出一頭地。此善法堂前。闔門選佛。特以四百州矣。上一座首相引重也。有譽秉戒千華。得附師門之末。又時侍靈峯老人。得耳高風甚悉。客從江右來。頌雲居法道。不減膺祖當日。恨不得親承道範。及乎象駕南來。又坐失良晤。至今耿耿。忽奉慈諭。兼惠鴻編。恍如瞻德容而聆至教。兼命作天寧香雪和尙塔銘。憶昔日謬題先師片石。不過以大師來狀。依樣葫蘆耳。年來目昏嗽劇。筆墨俱

廢。文字之委。一概謝却。獨香和尚是己卯江上戒壇羯磨師。聲白公又素深道愛。力所可及。其敢不竭蹶以報先師。先此謝復。諸容續布。臨楮翹跂。

復雲居晦山和尚

吳偉業梅村

五老峯歌奇哉高於五老矣。道兄于道力禪理所不必言。惟此事當放弟出一頭。今覩此作無文士氣。並無高僧氣。乃知心地光明。洞徹了當。俯視一世。直以爲蟪蛄鳴蒼蠅聲耳。雲霞吐納。豈亦得山川之助耶。□□□□道法履甚悉。聞已得天上雲居古道場。開宗設教甚善。吳中法席。比因歲荒。機緣落落。吾兩人連床讀書。忽忽二十年。老兄跳出塵網。在萬山之上。而弟獨守其腐鼠。雲山渺默。相見何期。臨紙三嘆。

復雲居燕雷和尚

熊維典

昨荷杖錫見過。以得聞所未聞。慰藉殊深。常欲棲遲嶺上。親教明湖。而衰鈍淹積。翹跂無已。要須果此願也。靈隱之貺。遠賁蓬茅。法撰炳煥。道雅便繁。何克當之。然世俗繁縝。誰能得此。喜何如之。謹拜嘉感戢。容改日耑啓附謝。其新刻二種。已昭回禪宇。不待駢致。又綾偈蒙題名。合張齋閣。謹珍藏之。其如意印匣。紫布護膝。竊敢貢入常住。作鎮山門。欲以藉乎遠珍。永留佳話。後之覽者。必有俯臨平墅。顧念幽踪。則鄙爲不孤。與此種種並傳。不尤幸歟。伏惟驗

存秘貯。不勝跂感之至。

復雲居燕雷和尚

李道泰菴思

叨蒞修江。便馳心雲居嶺上。不謂俗吏無解縛法。第從縣門向白雲頂禮也。勞勞此心。何時得了。想□□□垂教之。漕米無多。不難填補。乃煩和尚錫以法諭。□□法賜拜受慚愧矣。尙冀偷暇。得聆雷音。非波上人與小兒有廬山之遊。容回日致謝。臨啓瞻溯。

又

積想兩載。始得一至明月湖隨參謁之末。然此緣不惶矣。通省奇旱。滿邑皆爲饑鄉。然嶺道方窮。衣相無恙。清涼法界。自與下方迥殊。乃知下方之旱。心旱耳。心苗已枯。田稼隨之。不到雲居。不知此言之真也。傾聆法語。雖鈍根難發。然恨信宿卽別。不得常側獅座耳。那日西龍潭嶺中。徑路俱絕。歇足無地。每仰嶺上雲。便療心渴。不知勞倦也。山志已盡。和尙較勘中。何能復罄一辭。容稍暇勉書以當噴飯。不敢附諸序也。法味香孟。日夕沾嚼。尙俟馳謝。臨復瞻注。

與雲居燕雷大師

袁懋芹伯采

今秋末有弟姪兒輩。同吳叔吉社兄浪遊雲居。晉接芝宇。蒙出示志稿一冊。鴻裁鉅力。非燕

公誰任。歸道詩卷題欵內。列及賤名。更承索舊詠。寄語懸切。感謝感謝。雲居一志。久成缺典。揆厥所由。蓋緣此山得名在唐宋之際。而興復于神廟之間。其中廢革多年。斷碣殘碑。而爲豪門埋棄。以滅其蹟。前有志而不可考矣。興復者諸緣和尙。則長于行業。以恢建祖席爲已任。日無寧晷。繼有味白老人。似能捉筆。又爲院務會計了却。一生至嵩大師雄風掃霧。猛虎驅魔。心坐無畏之牀。身披忍辱之鎧。振祖庭于下劫。還叢林于諸方。其如關茸之後。繼以兵荒。工役煩興。食輪難轉。百計週遭。目不暇給。融公親承顥門法乳。竊慕他山名勝。加以孱弱之資。嵐瘴爲厲。暫留京兆。放失典文。晦大師承紹尼山正宗。宣揚天童密諦。讀儒書五千卷。通禪門八萬條。稽傳燈而清道統。考方輿而正山源。綽乎有餘。于焉是賴。而又以創建大雄。勞費相牽。雲居無志。坐此種種。恭惟燕大師晦山嫡子。雲居主人。道開泰而八面風光。法轉輪而千山月曉。冠裳頂禮。龍象皈依。于斯爲盛。山志一事。厄千載而留其會。更數代而待其人。光增闔邑。喜動崇朝。其山形道源。建置興廢等條。各有成憲。不煩游夏。獨藝文一則。請得而參其旨。一人一時之見有限。無力之文不彰。方外之人。而作不朽之書。尤當另具隻眼。洞見□□名宦如巫穉巒司理。文名播遐陬。事業先上臺□□一一巒以光全瑜者矣。至熊于岸學博司鐸修水挂冠。介壇江右之潛德所仰。儒林之碩學攸關。豈可因其去國多年。遂

爾沒乃芳踪。僕前有書往徵其舊作。覆云弟別雲居久矣。小作皆已散失。況云修志。先後名篇彙集。安可標瓦礫于珠林。以供後世揶揄。來詞固本自謙衷。實亦未深詳乎秉筆。故不輕出其珍藏。尙容再圖以報。若本郡本邑之搢紳先生無論矣。如潯陽之文用昭承明著作之才。星渚之宋未有大儒理學之宗。俱曾久駐雲居。必多發之吟咏。用翁之文。熊約翁必有記錄。未翁現設教于淦姓。皆可訪而致也。此中學詩之人不乏能詩之家甚少。以弟所推轂者。有杜虎子之逸邁。熊木升兄弟之博雅。吳叔吉之醇樸。鄒成初之清警。置之三唐可當一面。可曾得其遊山佳什幾許。流寓人品。如胡博水總戎之忠介自持。諱學海胡古石明府之廉退有節。諱學磐蔡天際經魁之蘊藉風流。諱開生皆表表羣倫者也。人雖物故。名亦當存。僕更力搜其遺文。遇一有得。卽當郵上。至于慎筆削而嚴去取。砥硯當前。王公必黜。珠玉見贈。芻賈亦收。此在大師之威明並濟。吐納□□。無庸瑣說者。逮如僕者。念年前辟兵入山。以姑親泛宅峽坪。放浪雲居三四年。所到處有題。逢僧必贈。月宵雨夜。霽日風辰。所爲長韻短韻。有律無律。以寄其浩歎者。不知凡幾。然投之甕中。蠹魚所蝕。授之梓人。祖龍見災。今卽稍能記憶。而物改人遷。世殊景異。與當年情事。杳不相協。漫錄四首。爲前刻所未載者。以應大命。幸改正而酌留之。聞近來雲居諸刹。一新人物。一新禪林詩社。一新。僕雖偃蹇。當必負瓢戴。

笠與大師策杖把臂。遇刹遇人。遇禪遇詩。重新廢唱。以了雲居近緣。完此修志大事也。何如。唯燕公許之。主臣。

復雲居燕雷和尚

吳孔安叔吉

苦爲病纏。歲月不休。意者諸大菩薩知我向道念切。將速我轉輪。得蚤入佛門乎。三教同源。異流殊塗。一歸我孔子。雖嘗曰攻乎異端。斯害也已。然觀其尊老子以猶龍。則其不以老氏爲異端可知也。不以老氏爲異端。則其不以釋氏爲異端。益可知也。究尋一部論語學庸。其指歸所有。與內典諸書。若合符契。而儒氏之徒。各自樹立門戶。專事攻擊。彼飲酒食肉之人。苟能一語詆佛。卽引之爲正學。祀之于廟廷。忠孝廉節之人。苟有一語尊佛。卽斥之爲異學。擯之于門外。嗚呼。大道坦然。人自生畛。余卽指一端。而論儒者所重者爲己之學也。至其攻佛。又曰自利自私。余甚笑之。今讀屏山劉氏所辨程朱諸說。俱是天地正理。非關聚訟。私說爲之捲卷服膺。故亦自抒其平日揣摩之理。以復于方丈之前如此。臨風可勝贍注。

候雲居燕雷和尚

熊遠寄武章

一落塵網。馳驅可以數千里。而咫尺雲居。邈若河漢。至積寒暑。絕不一相經過。山靈笑人。無可解嘲。乃慈悲法門。更不以此鄙遺。而飛錫荒鄉。俾得沐浴塵教。洗脫鄙吝。所謂現身說法。

者非耶。感愧之懷。如何可云。雲居一志。幸際真人疊出之會。宗風不振之日。直令山川增色。雲物改觀。此而書不成。不可謂非千古之缺事也。頃讀輯稿。覺古今之高人韻士。岩棲川觀。雲臥霞餐。朗然如接晤於明月湖畔。碧溪橋頭。而相與領畧歐峯本來面目者。其爲開悟。可使山下諸人直造巔頂。洞見十方。此和尚又以文章而作佛事。普渡一切。功德無量。不佞前擬日旦入山。分督工匠之役。因天雨淹滯。尙未能策蹇。然瞻依之情。時刻以之。終不出月內也。謹便鴻附候。餘容造晤。不盡縷縷。

候雲居燕雷和尚

許延邵

兩度入山。俱牽世務忙迫。不得隨杖履遍踏勝林。惆悵曷極。閒官小官尙如此。況要津人機務集身。而能趣向宗乘。毋論古今慚愧多矣。蒙和尚賜大慧錄。開卷自生歡喜。但間閱問答機鋒。茫然如未閱時。及讀與士大夫往復處。畧識此老苦心。循循善誘。覺塵勞中人不能薙草披緇。亦自有向上事分也。延邵幼從先嚴遊于天隱玉琳兩大師之門。知有此一大事。中間出門從宦。漂流二十餘年。至今未有歸宿。茲幸謫罰此地。密邇禪林。想不便作官。而便作佛之處。和尙自具大慧手眼。未審肯爲鈍下人通一消息否。幸邀弘慈。望垂法語。秋望感懷。並龍潭詩三首錄呈爲笑。詩文卽工。知無益本分事。況不工耶。然度和尚當不較工拙者。前

禱兩詩。祈芟削之。立秋早涼。法體珍重爲慰。餘不瑣瑣。

請大定師回山監院書

熊士龍季納

別後尋思教言。不啻日奉提誨。又每望五峰頭。猶與老禪兄形骸相親。乃居諸流換未幾。仲春。今且秋孟。可勝嘆哉。雲居地脉凋衰。祖庭剝落。初夏大師事。想得聞矣。頃方丈虛席。監院無人。諸方來者。無不感嘆歎歎。弟十餘載心力。固無足惜。將老和尚中興一段光明。亦歸銷滅。度非爲弟子者所忍也。此事他人不可告語。惟老禪兄受老和尚之恩甚厚。爲雲居之心獨切。聞此當必惻焉傷懷。請踐仲春之約。慨然爲此日之行。慰安未散之數衆。扶植垂衰之祖庭。大衆咸賴。諸佛生歡。弟卽累劫犬馬。亦皆報效。肅介恭迎。無任翹跂。

與蘇子瞻

了元佛印

嘗讀退之送李愿歸盤谷序。願不遇知于主上者。猶能坐茂樹以終日。子瞻中大科。登金門。上玉堂。遠放寂寞之濱。權臣忌子瞻爲宰相耳。人生一世間。如白駒之過隙。二三十年。功名富貴。轉盼成空。何不一筆勾斷。尋取本來面目。萬劫常住。永無墮落。縱未到如來地。亦可驂駕鸞鶴。翱翔三島。爲不死人。何乃膠柱守株。待入惡趣耶。昔有問古德。佛法在甚麼處。德曰。佛法在行住坐臥處。着衣喫飯處。屙屎撒尿處。沒理沒會處。死活不得處。子瞻胸中有萬卷。

書。筆下無一點塵。到這地位。不知性命所在。一生聰明。要做甚麼。三世諸佛。則是一個有血性的漢子。子瞻若能脚下承當。把二三十年富貴功名。賤如泥土。努力向前。珍重珍重。

與龍圖學士耿公延禧

克勤圖悟

妙喜示來教。見矻矻於此。意況甚濃。真不忘悲願也。而以宗門正眼。照破義路情解。透見肝膽。何明如此。禪宗久寂寥。後昆習窠臼。守箕裘。轉相鈍置。舉世莫覺其非。大家隨語生解。祖道或幾乎息矣。不有超卓穎悟之士。何以規正哉。此真正念乃真外護也。果佛日一夏。遺參徒踏逐山後古雲門高頂。欲誅茅隱遁。其志甚可尚。今令謙去。山叟爲書數語。及疏頭。亦與輒長財成之可取一觀也。渠欲奉鋤。正在高裁也。

與月堂禪師

師一水菴

昔遊雲居。見高菴夜參。謂至道徑挺。不近人情。要須誠心正意。勿論矯飾偏邪。矯飾偏邪。則不中。正與至道不合矣。竊思其言近理。乃刻意踐之。逮見佛智先師。始浩然大徹。方得不負平生行脚之志。

諭眷屬常慧常錦常潮常鍊常因暨合山大眾當家師

洪斷

我九月十一日省城起身。一路疾病延纏。一日只吃一兩碗清湯。直到桐城。方好些。到鳳陽

方大好。家中新舊碑俱要磚封。大小等護常住如護眼目。比我還要用心。益米常住租穀。俱在錦慧身上。後日方見人心。各處燈火門戶人境一切事體。俱要小心。凡事不必我細囁。十月初十前後准到京。

答熊青嶼居士

觀衡

捧讀來諭。理事雙彰。語義俱密。何當執事殷勤至此。無乃爲雲居祖席久虛。欲衡酒掃以待來哲。又似求硃不得。暫借赤土。以應其事。此執事爲雲居求人切實如此。爲國爲家爲身。無以二之。欽服欽服。衡雖沈冥。寧不感悟。卽至薦先一事。乃衡生平本事。住邵陽二三十年。唯以此事上弘佛化。下導有情。尤望執事廣此一行。以爲雲居護法。甚妙甚美。祝祝。

與端伯黃元公居士

禪門淡薄甚久。幸得執事與集生余翁同心此道。爲今日大法旗鼓。前仗雲居之靈。得瞻光明。曾不知一語請益。亦可謂當面錯過。別時面諭雲居休夏。今歲將更矣。不聞消息。何知不知大徹悟人。亦有妄語否。幸示我。

復味白老師

座下肝膈。衡已盡知。乃殘病之軀。以閒放爲樂。本無住意。昨登上刹。因見座下爲祖庭一片

真心。謂大衆少相精進。自己年邁難于支持。承面諭衡以委其事。衡亦爲祖庭恐致寥寥。謂座下與合山大衆。肯歡喜各歸退居。衡捨了幾支病骨。先爲打掃以待大手眼知識。方堪任其事。量自力實不能也。如合山大衆有一人不願歸退居。不樂從其事。衡決不敢輕諾。此事全在座下與令高足善爲調停可也。古人云。歡喜名爲道場。我輩名佛弟子。舉止豈可令人生惱耶。昨會熊老護法云。待他再到山中。料理看。如座下調理之方。都同熊老護法商議。衡唯聽護法肯擔當則可。如不肯擔當。衡又再別爲請教。或可借三兩間房以結冬爲事亦可。總在座下高明。裁度是復。

與味白老師

久未就教。冥頑日墮。適接佳製。恍如瞻對。衡今歲多病多事。叢林重大。難以支持。欲與老師商議。別求大福慧者相續此道。則不幸老師五十年一片苦心也。倘暇。六月內幸進常住一晤。衡到七月後。方敢頂禮。新茗一甞見意。洒掃觀衡九頓。

答晦公方丈

弘禮

監院來得書。知公補住四祖之詳。並讀屏孫上堂語。反覆數四。慰喜不已。每觀近代宗匠。自謂得說法三昧者不少。考其實據。不墮陳腐率意。便落偏奇雕刻。唯偏則不斷人命根。腐則

不能開人生路。捨此而求殺人活人有效。是除飲食而欲不飢不渴。此從上所以貴師承。真師之所以不易得也。老僧數十年曲體先志。臥薪嘗膽。實有望焉。今觀新雲居。纔一墮地。便覺聲異凡鳥。其本固者其枝蕃。不但靈隱爲得孫慶。且爲先老人得曾玄慶矣。良驥雖神。不費控勒。五丘之大。更在雲宵。又不可以爲賢于今時。遂自足也。至于年歲豐儉。人事響應。惟我盡我心。頭上無負人之龍天也。兩殿告成。舉無不利。實賴佛天默庇。但靈隱爲禪社都會。一往困于土木。疲于應酬。波波挈挈。頭顱白矣。若更老不休心。則天下但知有靈隱之大。而不知有能大靈隱者。續佛慧命之人也。故于去冬十月朔日。搃鼓告衆。謝退院事。今暫居方丈偏室。俟議定新住持。尙欲于山林深邃處。另覓一院子。單爲一二本色結定眉毛。以試老年操刀之一割。果再撞出幾個咬人底。一手推出。然後父祖債。兒孫債。一時完却。則將摩娑雙眼。稱無事人矣。其他細碎。不足道也。

復晦侄和尚

弘儲

三峯老和尚。矢願起末墜之宗。上抗前古。炤曜百世。世復有龍門以孔子世家例作老人年表。所謂當世則榮。沒則已焉者。豈能彷彿其萬一哉。我家兄弟赫然在天壤。至我與靈隱。更體師心於最後之悲。護法命于艱難之日。不同安享太平。黼黻文藻。兩家脚下。騰踏于江楚。

閩廣吳越。剝竿相望。而老侄天上雲居。雄踞兩世。聲光洋溢。監院不遠山水。于歲寒中。情文
隆備。雖老人面厚。然如赭矣。千佛伽黎。平昔珍重。送披法體。鄭重三峯道法。能不鄭重傳特。
三峯道法者。老和尚法寶。并新刻附覽。此千佛衣永留破額供養四祖

復晦兄和尚

正 岳巖堂

聞問久疎。殊甚寂寞。手翰適來。親于音度。喜慰無似。加之兩上足。皆據一方。雲居新方丈。語
赴來機。時有革新之句。拈槌豎拂。扭捏鼻孔。可謂強爺勝祖。然與湖南朽人。往往不約而同。
卽兒子爲吾子可也。豈止猶比而已乎。大爲萬峯加額。有兄若此。其弟可知。古云不謂雙珠。
近出老蚌。吾當以此轉調四祖乎。畱張斷以來。僅得數人。大概皆出槌拂。所餘雖各有所長。
緣多不勝。未知能副四祖老叔之望。將爲奈何。師資之際。惟有謹慎法門。無隨時風。當與共
之耳。冗促未盡。

復晦兄和尚

濟 麟一足

後五百世。荷任法道者。毋論城市山林。多衆寡衆。苦樂遙同耳。況江廣廻祖宗遺跡。文獻俱
在人境且佳。兼有老弟大方家能現補天浴日之手。遍歷殆盡。名播寰宇。雖時運乖違。在有
福人自不難爲也。若愚輩蟬臂負山。朽木支棟。爲衝要作接待主。真不啻孕犧嘯沉。苦何如

哉。接手翰。慰我殷殷。荷極荷極。尊錄已妙。而令徒屏公猶妙。上雲居三四層天。可賀可喜。容俟面再伸加額。總此統復。餘不盡。

復雲居燕雷和尚

音 可元白

歲底接封函。啓而讀。神明交會。猶明月於天懸之湖。見契深矣。然天坪浮圖。實非地湧。皆從至公至道而成。金湯無縫。保護始終。此所以仰望惟座下也。但奎章之塔未整。諸緣之塔未建。此我胸中不了事。如欠人債不速還。其奈在窮也。倘得如願。雖老雖病。不辭千里而來。而座下不亦扶我於五峯頂上。目視霄漢。徹見今古。公心猶日月在天。永無暗時也。其恐不如願。則諸緣恢復雲居之功。終是埋沒。此言或在座下大爲不然。蓋座下道隆德富。必使前人之功。而使後人共知共見。此不在我。謂爲不了事。以是遷塔緣起。庶幾了事之時。乃刻於石。敢冀座下然否。上元前三日呵凍以復。不宣。

復雲居燕雷和尚

明 洪非波

未到修江。已耳風操。思欲早扣禪扉。少聆馨欵。奈山靈未洽。遂使鈍屐秋筠。始獲瞻謁。故知萍蹤傾對。緣非偶爾。茲又作經旬別矣。耿耿積悰。徒勞夢寐。想法屬昆季。濯濯如兄者。指不多屈。卽敝檀越公事之餘。促膝談衷。未嘗不想慕風采也。漕米一項可存常住。爲雲厨微供。

原摺已批據并附覽。弟碌碌無似。埋拙海邦。不意雲鶴舊痒。竟被匡山名勝冷地抓著。正在料理游蹤。了此葛籐。適聞會下人至。草陳數語。道味情深。紙墨爲淺。輕寒惟珍重自護。西望雲關。但增悵仰。

答雲居燕公方丈

戒顯

久隔音問。甚爲懸切。得書喜慰。下江今年苦大水。淹沒叢林。是處愁慘。卽靈山夏秋。竟苦在陳。予以冒暑領衆。持鉢秋來。多病久未平復。念公在歐峯真安樂國矣。壽塔事煩公費心。遭時艱難。亦不無着累。且存之懷抱。緩緩圖之。不必急急。塔基二處。九月朔吾虔卜之。韋天鑿然許青龍窩。而駁鉢孟峯。吾已定主意。斷在龍首矣。其籤訣云。青山綠水兩有情。花放泉流月更明。可惜往來遊覩者。不知石內有黃金。門前有流泉下有明月湖塞水口泉流月更明奇合但凡事須從簡省。不可奢泰。致傷物力。內開金井。聞稍在高處。更妙。論理止造一露天塔。不必造屋。聞地師皆言前面水去胸膛甚遠。不名洗脚。甚妙甚妙。或令水唇稍圓。一繞塔門更妙。若費事亦不必改作矣。總在公從長裁酌。志書吾已細細翻閱幾過。稍爲動筆。點竄似有成規。更須加工校讐。使成善本爲妙。所欲書者皆已寫到。玄墓志與先老人塔銘附足。山頂高寒。百凡謹慎。人回頗促。不及縷縷。

復雲居燕侄和尚

濟 璞剖玉

客艖念間有僧自修江來。傳云歐阜頂上虎生獅兒。此誠吾門盛事。何期好風吹送入我門來。一衝一突。便覺奇異絕倫。跳躡可畏。是皆雙徑老人盛德舒祥。安樂堂前鉗錘神妙。故天下第一流座下得之矣。儂年來漸見老懶。知識名目。修造擔子。屢思一齊卸却。然後曳條輕杖。過從雲居峯頂。與老侄坐石看明月。湖傾倒其細大。詎知業緣易牽。快便難逢。日復一日。而球瑣之章。百朋之惠。已先自天上傳來。在老侄篤重宗親。誼超雲漢矣。如儂之聞問迥絕。不亦開世相之罵門乎。至于草木之齡。深愧年屆耳順。猶然德薄前賢。道遜哲。乃勞海公破雲稱賀。慚愧中重添慚愧矣。來□□豐欲藉手完趙。恐落虛偽。謹命侍司肅登以誌高雅。容圖耑人走謝。不盡。

雲居山志卷之十四

詩

雲居寺孤桐

白居易樂天

一株青玉立。千葉綠雲委。亭亭五丈餘。高意猶未已。山僧年九十。清淨老不死。自云手種時。
一顆青桐子。直從萌芽拔。高自毫末始。四面無附枝。中心有通理。寄言立身者。孤直當如此。

遊雲居贈穆三十六地主

亂峯深處雲居路。共踏花行獨惜春。勝地本來無定主。大都山屬愛山人。

寄雲居諸長老

王貞白

嶺路躋雲上。來參出世僧。松欹半巖雪。竹覆一溪冰。不說有爲法。惟傳無盡燈。了然方寸內。
應祇見南能。

過雲居寺玄福上人舊居

皮日休襲美

重到雲居獨悄然。隔窗窺影尙凝禪。不逢野老來聽法。猶見隣僧爲引泉。龕上已生新石耳。

壁間空帶舊茶烟。南宗弟子時時到。泣把山花奠几筵。

和黃山谷遊雲居作

蘇軾子瞻

一行行到趙州關。怪底山頭更有山。一片樓臺聳天上。數聲鐘鼓落人間。瀑花飛雪侵僧眼。巖穴流光映佛顏。欲與白雲論心事。碧溪橋下水潺潺。

登雲居作

黃庭堅山谷

瘦筇扶我上稜層。眼力窮時脚力疼。天上樓臺山上寺。雲邊鐘鼓月邊僧。四時美景觀難盡。半點紅塵到不能。白髮龐眉老尊宿。祖堂秋鑑耀真燈。

此作唐名僧皎如晦公。咏荆溪正觀寺也。唯起結稍更幾字。後修縣志者。夫考晦詩載春花集。因傳流既久。存此。又韓敬登雲居作。亦類是。乃蘇子瞻禮曹溪六祖詩。因刪之。

送雲居佛印禪師

秦觀少游

抱包初捨蔚頭藍。江月松風處處參。他日惠林爲上首。幾年彌勒作同龕。真珠撒帳開新座。飛鳥啣花繞舊菴。雲散虎溪蓮社友。獨依香火思何堪。

送妙喜禪師歸雲居

李彭商老

落絮霏霏攬客心。鳴鳩歷歷喚春陰。未於蓮社添宗炳。先向蘭亭減道林。遠嶠雲屯鐘磬晚。

諸天日斷薜蘿深。詩緣病廢苦無思。爲子送將聊一吟。

送惇上人之雲居省師

呂居仁

果公昔踏胡馬塵。城中草木凍不春。胡兒却立不敢問。其誰從者惇上人。袖手歸來兩無語。而今且向江西住。雲居老人費精神。送往高安灘頭去。

贈別妙喜禪師

韓駒

幻世吾方夢。迷津子作舟。禪心如密付。當爲少淹留。

贈雲居雲門菴空首座

曾天游

江西句法空公得。一向逃禪挽不回。深密伽陀妙天下。無人知道派中來。

望雲居

陸深

道遠山初近。天長晚更晴。水從星漢落。舟在畫圖行。擊楫吳郎計。乘槎漢使情。難將物外意。空博世間名。

過建昌望雲居山

王在晉
詮雲

天落屏星石磴平。青山匝匝向重城。晴嵐夕照開千紫。明月清溪浸一泓。丹鼎玉爐傳大藥。瑤宮貝闕擁蓬瀛。風雲吐納迎佳氣。汗漫扶搖鶴羽輕。

仙仗高凌度闌風。山家雞犬白雲中。重巖飛瀑一簾雨。斷磽橫杠百尺虹。霞落空蒼晴點翠。
苔侵太古澗摩銅。大開天牖窺彭蠡。五老峯頭看轉蓬。

五龍飛沫泡塵寰。松火爐烟石點鍍。問道欲尋歐岌嶺。乘風思度趙州關。月明黃鶴不知處。
洞冷青泥剩此間。匡阜仙人任來往。碧溪橋畔我心閒。

雲居山寺

朱謀瀧

香刹絕塵氛。蓮臺控紫雲。燈懸三界覺。聲報九天聞。龍藏開宮錦。鸞書疊御文。願言多寶地。
千載奉明君。

遊雲居禪院

張位

百里遙瞻紫氣攢。杖藜春色踏晴巒。今朝紺宇焚香地。昔日金仙說法壇。天眼一觀空世界。
人情萬事總波瀾。龍潭水潤無塵鏡。就作當年面目看。

初至雲居有感

沈灌

緣山興雲雲無心。緣雲團居居無住。澹然一屋白紛紛。山頭明月和雲貯。萬綠山人不夜行。
投明恰到孤雲亭。一瓢何處隨緣去。白日青苔雲半局。

前題

羅治

迴峯曲礪繞潺湲。碧磴丹梯縹緲間。泉石幾人逢勝地。烟霞今日領名山。湖開明月飛鴻過。
林定微風倦鳥還。敷演不煩勤萬象。六時鐘鼓白雲間。

前題

曹學佺能始

客愁當雨度。僧梵出雲居。借問何明月。湖光一片餘。馬頭驚翠落。夢裏得鐘疏。相伴朝將夕。
能禁回首虛。

諸緣上人自京師往建昌雲居建刹賦此送之

余孟麟

曾記當年錫挂。不知何處杯浮。一塔空花古寺。雙林積蘚清秋。但向法門重叩。應教心印長
留。老衲蒲團定坐。潺湲石瀨聲幽。

前題

余作

遙飛錫杖天邊下。內殿靈文自捧來。湖色重開明月印。山光獨領白雲迴。孤鐘日暝聞清梵。
雙樹年添護舊臺。我已逃名修淨業。遠公蓮社幾時開。

前題

馮有經

山中雲來復雲去。山僧去向雲中度。行看閒雲何所生。坐對空山名無注。蠡湖一點映禪房。
廬山半咫接雲床。鉢中咒雨買何日。錫下神泉飛幾霜。澄空碧落澹如洗。雲去雲來老衲子。

間將雲影證真如。悠悠虛映澄江水。

前題

黃汝亨貞甫

曾到九江上。不到白雲居。聞有老衲子。諸緣恣所如。
□□是處依雲臥。歷歷山光潭影過。回首白雲無盡期。縱橫始覺乾坤大。

前題

朱之蕃蘭嶼

聞君再剏白雲居。古寺規模迥自如。三藏舒風炎火息。五門搞化涅槃餘。諸緣寂靜依靈鷲。萬籟空清混太虛。花市城中歸去後。靈襟草忌論交初。

前題

湯賓尹霍林

飛錫曾從星渚去。雲居重剏舊招提。慈悲盡破慳貪網。功力全開法慧基。甘露水施三世業。火蓮花觀七珍池。於今陀國伽耶寺。寄語摩伽好護持。

題雲居寺

朱統鉉堅白

靈山萬疊繞禪宮。景物烟霞迥不同。岩岫龍吟晴忽雨。巢林虎嘯夏生風。金身玉笈皇封重。鐵瓦銅駝后澤隆。身是天宮培造化。白雲持護碧霄中。

題雲居

蒲秉權

白雲爲闕石爲宮。湖色山光四際同。曲徑猿聲啼竹雨。上方鐘韻度秋風。一龕烟鎖閒房寂。
六代燈傳淨業空。西望匡廬如比舍。飛泉應在翠微中。

上雲居

紺地三千界。丹梯幾萬重。側身緣石磴。緩步入雲峯。樵子偶相引。世人那得逢。褰裳披峭蒨。
躡屩破峯茸。絕頂禪居寂。橫空鳥道封。巖扉烟漠漠。溪澗雪淙淙。窄徑難迴眼。孤筇暫息踪。
趙州茶渴想。宋碣蘚蒙籠。行李煩疲馬。攀蘿代短筇。交眠荒壠犢。衆響古潭龍。翠壁晴嵐合。
青林晚樹濃。徘徊殘照裏。隱隱上方鐘。

夜宿雲居

偶逢暇日向雲居。一宿山房意自如。想是當年行脚地。于今挂搭且躊躇。

望雲居寄徐司馬

每向雲居望五雲。赤松黃石幾爲羣。經時共計山中相。制勝難忘海上軍。秋月菊英宜泛酒。
烟晴竹篠好論文。臨風欲借仙人驥。三石梁頭一訪君。

夜宿雲居有懷社中諸子

雲飛千尺碧嶙峋。重叩禪關別有春。日透林光通鳥語。雷喧潭影鑑龍鱗。來參貝葉龕中字。

徐中素

曾鳳儀金淘

朱謀壻

遙憶蓮花社裏人。借宿繩床成夢覺。一聲清磬絕囂塵。

夜宿雲居有懷

朱謀渾

古刹溪橋澗道幽。上方信宿白雲留。祇因尋藥來歐嶺。恰悟傾茶到趙州。樹杪烟濃孤磬晚。天高月滿一湖秋。石床倒臥龍潭影。夜半誰閒與夢游。

登建昌城望雲居山

朱謀轂

泊舟海昏郭。負笈覽諸景。一眺城西樓。始見歐仙嶺。靄靄雲氣密。光若瓊琚靚。蒼翠渺且重。峯巒總迷影。秀色宜孤懷。結廬此山境。

登雲居山寺

姜輔周

飛磴千盤疊翠層。白雲清淨叩山僧。一湖素影窺禪寂。明月長懸不夜燈。

登宿雲居元日值雪有作

周國庠

歲晏蕭條百慮捐。衝寒直到白雲邊。碧溪橋架諸天上。明月湖開萬仞巔。律轉青陽梅破玉。日蒸丹壑雪生烟。登臨信宿渾忘寐。贏得枯心對老禪。

登雲居步前韻

周國廉

尋山已自俗塵捐。況復登臨近日邊。橋隱碧溪凌峭壑。湖含明月動危巔。上方凍合千峯雪。

下界春生萬井烟。衲子者誰堪晤語。跏趺相向一參禪。

登雲居山

汪應婁魯望

爲尋安樂上崔嵬。挂錫來參第一機。佛印竹枝符古識。趙州茶味發春暉。龍華親捧標金字。鳳藻新傳賜紫衣。成就勝因旋解脫。西山遙對有餘輝。

前題

廻住山前冷閑身。猛然絕項意清真。恍如廬嶽初開徑。直到天湖欲問津。雲裏耕田僧稼熟。波中看月佛光新。擬尋高士同蓮社。漏滴蓮華十二辰。

前題

古刹重興處。澄湖萬象臨。龍宮傳寶藏。雁塔遶珠林。洗鉢忘前景。逃禪只此心。幽然塵世外。日暮白雲深。

朱議徹

袁伯采鄒次公諸文學家重姪約生暨諸子集雲居真如寺

熊德陽青嶼

霜鐘聲徹雁聲號。聚桂風催萬樹濤。顚氣直開雲嶺霧。德星光聚月湖臯。環宮紫竹人何在。是處青山屬我曹。幸得葫蘆纏解脫。乘閒茗飲日陶陶。

遊雲居雲門菴

門讓雲霞相逼迫。乘風直下九溪陌。回頭一望白雲門。始詫昨宵天上客。

雲居蛟頭菴

初入雲山路。覺賒盤空石磴倚雲斜。笙簧淅瀝風邊竹。圖畫冥濛霧裏花。靈境妙開千古跡。瓊枝笑採幾人家。武陵何必桃源路。洞口長教護片霞。

宿歐阜蓮花菴

薄霧輕雲靄夕陰。雨餘荷氣座中侵。秋來却病移僧寺。夜靜聞經清道心。天上月華濃欲滴。草間蛩韻細如吟。援琴一曲風雷引。水蓼汀花半不禁。

七里松夜坐懷雲居顥愚大師

劉同升

與君長夜憇松棚。又見涼風八月生。幾度冥隨思慧遠。空令座上有公榮。乾坤細細容三笑。草樹茫茫話五更。除架好看圓魄曉。買山山下石田耕。

得雲居晦山禪師書并詩却寄

顧夢麟
麟士

江南昨大浸。沃壤化爲水。糠穀盡不給。屋舍半沉毀。僧寮亦蕭然。門有閉窗紙。江西歲兩穰。共說匡廬美。師入乃更深。雲居嗣先軌。豈徒領巾錫。復得課來耜。自然人天供。一鉢二千指。招我爲宗子。道遠詎能爾。憶與師少時。微尚畧相比。逡巡坐失計。輾轉迫莫齒。擬報不成章。

含心託行李。

昔聞紫闈村。亦在萬山巔。五洩五百仞。舉頭龍蜿蜒。攀蘿幾登頓。直上疑至天。豈知白雲層。中有綠野田。壓廬俯良苗。漫水流涓涓。散落卽爲泄。永失旱澆愆。別峯互低昂。四望屏風連。人間定無是。言者或過傳。昨日發師書。載覽雲居篇。叵如歐仙人。復住紫闈邊。何緣定中念。還得記衰孱。

乾坤道邊店。日月水上沫。剎那不自保。何況三年別。書束檢書尾。名氏故舊列。各問少病惱。師關道情熱。前書及數人。二人已云歿。今書數人內。三人亡也忽。王吳周白首。唐鄭尙玄髮。其餘書不言。指復三四屈。王鑑明朱昭芑鬼伯一催促。如燈自吹滅。因書發深省。師意至痛切。卽此是雲居。聞師已說法。

懷雲居願雲和尚

彈指名聞滿十方。隨身竿木自登場。都將處士冰花國。別現空王水月堂。石裏嶙峋呼弟子。蓮生安養憶家鄉。攢眉有例吾何敢。已辦秋期一瓣香。

贈晦山大師

吳偉業梅村

晦師二十而與予游。甲申聞變。常相約入山。予牽師不果。而師已悟道。受法於雲門具和。

尙今夏從靈隱來。止城西之太平菴。云將遠遊廬嶽。貽書別予。以兩人年踰不惑。衰老漸至。世法夢幻。惟出世大事乃爲真實。學道一着。不可不勉。予感其言。因作此詩贈之。并識予愧也。

曉雨西山來。松風滿溪閣。忽得吾師書。別予訪廬嶽。分擣出苦語。殷勤謂同學。兄弟四十餘。衰遲已非昨。寄身蒼崖巔。危苦愁失脚。萬化皆虛空。大事惟一着。再拜誦其言。心顏抑何怍。末連初迤邐。達人先大覺。勸吾非不早。執手生退却。流連白社期。慚負青山約。君親旣有愧。身世將安托。今觀吾師行。四海一芒屨。大道本面前。卽是真極樂。他年趺深巖。白雲養寂寞。一偈出千山。下界鐘磬作。故人叩松關。匡床坐酬酢。不負吾師言。十年踐前諾。

喜晦山大師從雲居歸

并序

晦師住雲居十年而歸。出其匡廬詩。道五老石門九奇三疊諸勝。飛泉怪瀑。不可思議。而尤以御碑亭雲海爲第一觀。竟似住鏡光白銀二種世界。不知滄桑浮塵爲何等事矣。晦師贈予五十初度詩。其落句曰。半百定將前諾踐。敢期對坐聽松聲。蓋責予前約。會時方喪亂。衰病無家。顧以高堂垂白。不能從師以去也。乃爲此詩答之。

勝絕觀心處。天風萬壑聲。石門千鏡入。雲海一身輕。出世悲時事。忘情念友生。亂離兄弟恨。

辜負十年盟。

得雲居晦山大師書

絕項誅茆處。蒼崖怪瀑風。書來飛鳥上。僧出亂流中。世事千峯斷。鄉心半偈空。却將兄弟夢。烟雨問江東。

己亥肇秋奉祝雲居晦翁大師

文德翼

遙望星柯已是秋。吾師拄杖何方遊。種松也記前生未。點石曾虛大地不。木鑾堂中提不起。油鬆山下食纔收。故人膜拜無奢祝。耳髮莊嚴只趙州。

懷雲居晦山和尚

洪周祿半石

恒沙諸佛行爲先。無礙光中攝遠天。說戒夜移山樹北。乞書人踏鐵門穿。鳥依方丈窺禪定。花雨虛空供法筵。察變那容心識到。雲居淨界迥無邊。

寄雲居晦山和尚

顧渭伊人

不得雲居信。高懷阻翠微。閬風天半至。瀑水谷中飛。經難儒冠裂。安禪梵屨依。寄言方外士。桑梓故人稀。

登雲居山訪晦大師

許縵安絃

捫蘿躡險暮雲開。漸入雲居山頂來。身到寺門山不見。却疑平地起樓臺。
龍潭百頃水瀠洄。噴玉飛湍響怒雷。雁宕東西曾一見。誰知轉入此中來。
地設天開明月湖。山中玩袞等盤盂。灌田五頃伊誰力。鱸吏無煩問索租。
生涯全在鑊頭邊。石屋忙忙未息肩。一榻危然終夜坐。始知不事口頭禪。

遊雲居呈晦山和尚

韓本駿易菴

盡道西江此席無。千山遶項擁平區。雲耕十里歐峯鉢。雨漲雙溪明月湖。佛印留橋當古杏。
東坡遺碣枕青蕪。攜來孤笠嵒前挂。疑是匡廬天半圖。

題雲居山

張士璠大石

雲居雲鎖任雲開。野鳥窺禪過講臺。百畝稻花香入杖。一籬筠粉膩浮堆。青峯卓漢酬詩筆。
碧澗流霞遞茗盃。攜去鐘聲湖上垂。靜觀日月鏡無埃。

初入雲居

亡名

踏斷孤危數頃烟。振衣高躡萬峯巔。路開石峽臨無地。門到雲居又一天。嶽色飛來歐嶺下。
鐘聲流出月湖邊。揚眉盡是寒松吼。留我山中過舊年。

冬至後二日觀雲

龔蕃錫福求

向道歐峯冷。今年獨不寒。開窗薄夕同僧坐。樹色曦光處處攢。忽見隔山雲氣吐。一縷一縷復一縷。縹渺仙旆千丈飄。蒼鸞陣陣齊飛舞。誰將淡墨潑晴空。遮住尖尖數點峯。遠看層巒懸半截。攔腰橫跨海東虹。鉢盂對面香糜熟。冰鏡湖中蛟鰐蠹。隣僧晚竈有餘烟。飛入斜斜添半幅。斷弓續弓出青嶂。彷彿後浪催前浪。雲居山下看雲居。祇說雲居在天上。

雲居霧景兼懷晦山和尚

黎民貴天錫

半霧迴峯入畫圖。蒼蒼嵐氣日初晡。岸邊鳥宿泉聲細。洞口花飛客影孤。天遯山中高士臥。雲屯石上野人呼。此間仙跡惟歐岌。曾許尋真視壁無。

懷雲居晦山和尚

樊維師海逋

自笑行來路幾重。人傳師亦去雙峯。遙知夜靜同聞雨。何處雲深獨聽鐘。空谷有聲疑虎嘯。浮生無病已龍鍾。早歸尚擬攜筇杖。從及相尋拄箭鋒。

望雲居山

米漢叟紫來

雲居秀絕東南表。拔地擡天氣象尊。鳥道半穿松作逕。人家率以竹爲垣。鼓鐘不斷前朝寺。花柳依稀避世源。幾欲攀躋牽吏役。幽尋終擬踐斯言。

辛亥初秋祈雨雲居五龍潭謁方丈燕雷和尚

李道泰

我懷明月好。光影在雲端。豈謂天上闕。今日生羽翰。湖中五老人。精靈依講壇。平疇時風雨。不同世俗乾。鞭龍久無術。秋陽困黃冠。雲山膚寸雲。爲我起泥蟠。

聖水塘祈雨應夢詩

空山入夜叩龍家。天井渟泓水一洼。記取作霖非夢語。雨中香氣是蓮花。

祈雨雲居龍潭謁燕雷和尚

許延邵

客師飄笠宰官身。同上雲峯觸熱塵。赤日忽沉千嶂外。白雲應笑兩忙人。
背井沉牛信羽流。鞭龍不起長官愁。如何踏遍空潭曲。不向澄公鉢裏求。
谷口重重翠靄收。誰知海眼在峯頭。鷓鴣刷羽驚初見。不見山翁日弄鷗。

奉祝雲居晦太師

姚佺仙期

相攜何幸過天台。親證摩耶聖母胎。支許敢云塵外狎。神師實有霸王才。三乾竺鎖龍宮靜。雙鳳凰飛玉匣開。德杖一條青眼上。江西今喜在黃梅。

請雲居晦山和尚開法薦福

史白白也

閒雲未許戀蒼蘿。寄跡江干古樹多。師自吾無隱乎爾。我將如此良夜何。殘山剩水幾回夢。皓月清風時一歌。坐久寒濤落松杪。經聲憶到遠公鵠。

晤雲居燕雷和尚話舊

十年松下說經臺。風月淒清夜幾回。絕嶠孤雲同所慕。長川一葦獨能來。蕭王宅外空芳草。
漢帝池邊有劫灰。誰與斯文堪入社。任他陶謝不須排。

遊雲居山次子升黃社兄韻

馬驪

誰挿雲峯修水頭。幾人選勝幾人遊。左瞻彭蠡海天合。北望匡廬翠靄收。羅漢日來明月照。
鐘聲夜度碧溪流。僕夫共指顥愚塔。爲伴歐山作畫儔。

晤雲居燕雷大師兼之靈隱

史簡文令

湖上山峯依舊青。流留爲我話深庭。摩來松頂風聲遠。洗去鉛華兩脚零。各向中邊參至理。
誰將絕續證遺經。芒鞋竹杖今何處。靈隱雲居作典型。

寄懷雲居燕雷和尚

吳孔安叔吉

千仞歐山立。異人在上頭。翛然人跡遠。時與白雲遊。竹外鐘聲去。湖心明月流。時時景道範。
空自老浮漚。

與顥愚大師夜坐明月堂

袁懋芹

明月堂前月滿堂。遠公方外說無方。影橫荇藻移心靜。話到瞿曇徹骨涼。忙裏閒情隨處足。

儒門佛性不差行。相逢未許攢眉去。蓮社于今更有香。

晤雲居燕雷大師

咫尺雲居見面艱。聲聞久接趙州關。塵緣未許分除易。道力還疑賦予慳。不向石湖親法諦。誰將磚鏡啓蒙頑。怪來詞翰光星斗。玉屑金容萬仞山。

家大人拏舟偕星渚。宋未有業師入雲居。訪燕雷禪師兼休夏山麓之休菴避暑。

夜行臨別命賦

熊遠寄

李郭同舟擬遠遊。江干夜氣碧雲浮。數聲柔橹滄浪外。一壑風烟歐嶺頭。自古高僧契韻士。相看名理闡荒陬。此行不獨冥鴻意。知到休菴心日休。

庚子遊雲居

路遶之玄三萬尺。崖懸布練百千層。湖光夜鬱魚龍氣。野火宵燃聖佛燈。石榻埋雲眠駒鹿。溪橋落日遇高僧。松扉晝掩鳴泉亂。色籟同歸最上層。

辛亥初夏重遊雲居甫登絕頂覺雲鬟烟樹秀美加昔而寶閣方丈長廊輪奐頓
新於是嘆燕老和尚以廣大法力擇持祖庭使一時山川增色良可敬也率成

俚語用誌欣羨

一別真如寺。長年闕往還。山深仍太古。佛老只清閒。覓路增新徑。尋廊改舊顏。經營欽願力。
仰止叩玄關。

奉懷晦老和尚

文行遠允言

法窟開荒徧。辛勤二十年。學書兼種樹。說法且耕田。坐冷雲裝衲。遊深錫阜泉。雁堂從不戀。
隨處有奇緣。

其二

文苑執牛耳。禪林捋虎鬚。頽波饒砥柱。大冶見昆吾。法亂人難辨。風高道不孤。誰言只慧業。
流播在東吳。

重陽登雲居山

袁懋芹

勝遊酬令節。況復入名山。蕭氣澄湖面。高風瘦石顔。六朝僧未老。九日我猶閒。乘健對樽酒。
籃輿過趙關。

遊雲居石屋

劉盟欽蘇菴

石隙藏環堵。何殊小有天。青來能祛俗。玄賞不知年。列坐金蓮瓣。共鋤玉茗田。思廢招隱賦。
幻寄勝遊仙。

秋日登雲居呈燕雷和尚

李鼐梅子

入嶺蕭騷悵暮遊。羣松蟠翠盡分秋。底將城郭空塵裏。來浣峯巒綠樹頭。連畝荒雲虛瓦下。半釣澹月對湖收。相逢未說機前話。已向樨香報一籌。

毆山漫咏

郭賢操天琴

素未經過處。胡然路不迷。好山羣似揖。野鶴近如攜。松險乘崖出。雲閒戀壑棲。新知殊莫逆。遮莫自成蹊。

山勢周遭處。幽人卜築奇。但教容几榻。不復設籬籬。補罅縫穿石。傳神月浸池。何當深結侶。長嘯茹仙芝。

寄石與上人 時參學雲居

蒼鬍林中慧劍孤。黃金地上葛藤無。懸知貝葉翻纔罷。指點雲霄教鶴雛。

雲居山志卷之十五

詩

寄懷縣令

昌水賢侯德澤深。舊山間與縣僚尋。剛腸可奪相如玉。重諾能饒季布金。黃菊謾勞誇栗里。白蓮休更問東林。與君共結詩禪社。何日松闕話此心。

次韻雲居詮上人有感

了元
德洪

招謗坐多談。近稍違寡語。仰嗟濁惡世。友道終愧古。君獨無所營。誦經如布穀。見人作白眼。此意吾亦與。十年雲水間。所至每同處。舊遊雖陳跡。歷歷尚可數。更期秋風高。結伴湘山去。我生無寸長。百事仍莽鹵。不知獨何修。得與君輩伍。無乃造物者。不殺念癡魯。雲居無所爲。粥飯聽鐘鼓。不材獲飽暖。此德荷佛祖。詩成自誇笑。聞者亦驚顧。已決寡語堤。事過乃知悟。畢卓臥甕邊。謝琨挑隣女。見之獨傲然。真情人不怒。君能識此意。吾語亦可恕。

清侍者自長沙歸雲居來辭且乞偈余歎曰想見清侍者自篤田莊拄策而上將

及到天亭回視諸峯如關種所作廬山夕陽圖

到天亭下開春曉。叢搘萬峰螺髻青。瘦策緣雲上峰頂。爲誰粧點夕陽屏。

贈成上人之雲居

天上歐峰寺。人間無事僧。偶從白沙岸。步入碧螺層。服匿連空鉢。敷羅挂瘦藤。遙知雲起處。一室掩香燈。

太原還見明於洪水上。蓋問明別後嘗寓則曰十年客雲居。感嘆其高遁作此

清軟吳音笑展眉。芳鮮猶在雪霜姿。十年不下歐峰頂。一旦肯來漳水湄。湘獻春深重記處。風甌雨歇對聞時。紅塵未可因藏跡。要卜雲泉結後期。

示若平禪人住雲門菴

克勤

贊弼住山功已立。荷擔長久志彌堅。雲門菴剏歷歐阜。天上高天更有天。追復古來清淨刹。他時會見美聲傳。賓主相投膠漆合。相與弘持臨濟禪。

題雲居寺壁

圓悟密雲

不到此山遊。不識此山美。此山霧騰雲。明月一湖水。

遊雲居懷古

真可達觀

千尺盤桓到上方。雲居蕭索實堪傷。趙州關外秋風冷。佛印橋頭夜月涼。唐宋碑題文字古。
蘇黃翰墨蘚苔蒼。最憐清淨金仙地。返作豪門放牧場。

示雲居常元禪人

德清慈山

出世原爲究此心。非圖名字挂叢林。話頭參到無心處。不向他家外面尋。

過雲居真如寺

圓信雪嶠

屏開亂點春枝月。空夢隨雲去路賒。花木不須猜似畫。一林長水古人家。
特出無依接遠峰。幾多樓閣舊時踪。鐘飄韻落石橋外。尚有餘音道者風。

雲居復古二首

洪斷

夙志雲居選佛場。登臨風雨倍淒涼。當年有客聞高座。此日無人到上方。太史碑橫芳草蔓。
頭陀路滑蘚苔蒼。碧溪明月知多少。古木蕭蕭挂夕陽。
誅茆劈棘搆禪栖。首尾相將十載餘。病骨扶筇程萬里。柔腸結屋幾千迴。披雲躡磴穿峰頂。
破浪中流墮石磯。三已輕生生不泯。殷勤留與後賢知。

初遊雲居作

觀衡

路入雲霄山外山。幾人曾過趙州關。碧溪流水隔塵遠。明月湖光自古閒。千載樹神靈有在。

萬年香火信無惶。徘徊祖道重輝日。杖鋏相期去復還。

淨土咏

逕想西方大導師。夜來月上珊瑚枝。玉京吹徹無生曲。正是蓮開上品時。

圓通頌

欲問圓通何處是。行來舉步住同居。穿衣吃飯憑誰力。休更騎驢又覓驢。
雲有深山鶴有林。我唯安養是歸心。夜來月照長廊下。一句彌陀劫外音。

訊候顥愚大師

道 盛

雲居特地禪床動。彌勒誰云不下生。明月湖邊孤鶴遠。清風江渡古帆輕。五臺有會堪成臥。
千里同堂可作盟。却惜謝公能折屐。何妨大傘此中撑。

同青嶼先生五龍潭看水

音 可

與君把臂看流水。水到懸潭勢愈高。人影如龍連瀑起。聲無消處霧空濤。

雲居山咏二首

常 慧昧白

半肩風雨半肩柴。竹杖芒鞋破碧厓。剛出嶺頭三五步。渾身都被亂雲埋。
經行彷彿近諸天。月上山崕半缺圓。聽得上方相對話。星辰莫闋五峰巔。

挽顚愚和尚

通 茹古雪

諱居常閉戶。語默悉圓通。但願精三學。無心繼五宗。石城花正萎。歐阜月當空。恨我生遲暮。區區仰德風。

山 居

如 墾方融

居山十五載。一字與人無。茆屋藏疎拙。松燈照影孤。道從貧處徹。情向老邊枯。回顧誰相識。惟應月與湖。

題聖水塘

具 圓下菴

壁立峰頭現小塘。釣龍須用探竿長。一輪古鏡涵千影。萬載晴光浴太陽。開眼不從人力鑿。高流豈逐世情忙。鉢盂擲在清霄上。亦任烟雲作布囊。

寄雲居願侄和尚

弘 儲

破垣老屋壓群峰。我所思兮上古風。庭際草深雲臥影。牕前石冷雪埋踪。祖燈遠接雞山燄。寶印新開鷺嶺封。絕妙郢歌知善唱。願君乘便寄飛鴻。

讀天童老和尚壁間句 有引

戒 顯

天童老人年五十二。初住龍池。因謝事策杖登匡廬。隨過雲居。目擊湖山奇勝。慨然樂之。

於彌勒殿壁題一絕句手墨儼然與東林影堂題壁無異癸巳六月下浣余恐字畫模糊久而蠹蝕因爲標出且附一律於後千百載下瞻之仰之祖庭增重。

五十龍池說法餘匡廬歷徧到雲居初瞻蓮社影堂句又讀歐峰蘇壁書心醉湖山留翰墨字經烟霧未蟲魚暉光冷照同明月萬古當門挂碧虛。

復次一絕

歐峰高且雄匡廬並云美獨怪萬山巔雲擎一湖水。

祝熊青嶼老居士八十

我愛歐樵翁盛德古莫比八十正童顏眉光照窗几陶然樂天真澄湛心如水巖巖五老峰雲居衆仰止嶮嶒聳霞表今古一彈指機忘息幻輪心空洞淵底方外問翁年庭前柏樹子。

請兩轍驗紀事

余以辛卯冬住雲居次年壬辰楚豫大旱余集衆誠求甘雨隨澍今癸巳又苦旱修舊歲故典雨復響應大澍盈尺謂至足矣乃撤壇場次聞山下亢旱又白衆虔請專修利他行是日天青如鏡殿鐘纔扣空雷陡發七日之中四鄉大霑田疇優渥蓋以道場去五龍潭不遠禱兩轍驗雖僧衆之蟻誠實佛祖龍天之好生也聊存一詩用紀殊遇。

花宮喜傍五潭龍。每快甘霖啐啄通。紺殿鯨鐘纔吼地。青冥雷杵忽轟空。高低田潤千峰雨。
遠近村涼萬壑風。禱祝三番皆答響。莫驚蟻蟻說天功。

收禾苦雨行

峰頂種田風氣難候。癸巳七月十日至八月朔。早稻臨割。陰雨連旬。禾半生耳。瞻仰高天。
杲日難望。作苦雨行以紀時節。

疇昔夏秋交。四鄉火雲赤。悲深禱龍潭。日夕望雨澤。胡爲收成時。反爾恣淋溢。連旬念宵晝。
沉霧時蒙翳。飽飯散禾鎌。魚貫將刈獲。踉倉返禪居。已見衣帶濕。香稻總過時。枯疇亂狼籍。
未割驚颶風。已臥痛芽出。以此進退窮。師僧類失色。吁嗟太陽功。萬族倚成立。平時誰悟恩。
秋收乃驗急。仰視天夢夢。欲往又停笠。坐悲廩囷虛。饔餐漸煎逼。吾觀歐峯田。有得還多失。
雖省桔槔勞。乃有風雨泣。半憂沙礫崩。半畏鹿豕食。九夏荼備嘗。三秋寥方集。豈云天不仁。
實由業自積。慚我數窮寒。雲水多累及。搔首問高旻。杲杲在何日。

答太倉顧麟士寄詩

昔讀歇菴作。紫闕嗟奇觀。蘊懷凡幾年。愧未登巒崿。今來歐峯頂。坐臥烟雲巒。直上千萬重。
峯翠微攢。豈知半天空。內逾數里寬。豁然溝塍平。古寺青疇盤。當門懸天湖。明月蕩清湍。

舒爲五龍瀑。飛洒百村寒。方訝逼五泄。所悲知者難。開緘得新詩。比況豈無端。彼此無異口。長吟伴眠餐。置之巾瓶側。清音響珊瑚。何當望雲居。長風振羽翰。白首同蓑笠。共作老農看。

除夕

雲居獅窟蟠天盤。三載湖農一夢看。毳衲破來知住久。冰華歷盡却心寬。孤峯傲發烟霞面。隻眼雄開海嶽觀。義聚不辭揚素拙。夜深燈火話高寒。

元旦

雲居西嶺有羅漢塔講經臺。二大聖蹟。歲月浸久。塔頂墮榛莽中。經臺面石皆四散。元旦適同禪衆三百人出。方至彼。一時發興。兩功齊就。亦一異事也。事畢衆請余隨事說法。余爲口占法語二則。載在語錄。

趁晴西嶺撥蒼苔。今古靈蹤似暗催。揭石話圓羅漢塔。登壇識應講經臺。雲飄雷動天華吼。仙梵空鳴林霧開。最喜關門無片雪。兩功奇就踏春迴。

酬南康徐伯羽太尊

跨絕東南擁翠屏。池陽靈鳳此中停。天推彭蠡五湖長。人仰匡廬六老星。石洞有書看鹿白。訟堂無事對山青。尋僧遠踏歐峯上。雪曲傳來萬壑聽。

咏靈居

雲居端的勝人間。剝啄無聞日月閒。峯頂湧來天上地。湖心收盡水中山。五龍飛吼匡廬瀑。
雙塔高浮雁蕩灣。更看平疇遶煙寺。農歌聲出趙州關。

其二

遙望崇山萬疊尊。誰知上有避秦源。別開世外青牛塢。共住雲中白鷺村。長夏翠帷封梵寺。
高秋珠穗繞湖門。一犁此日吾真足。好把宗風百丈論。

贈黎天錫居士

歐峯兀笑畫圖浮。名嶽應遲有道遊。久向石城分紫氣。幾年彭蠡臥清流。案頭瀑布三千丈。
筆底江花百二州。引領蘇黃看繼勝。天湖明月話高秋。

栽禾

久住西江寺。湖田學稼通。僧禪舒雪壑。農唱徹花宮。僧笠千松雨。新苗百畝風。躬耕初夏罷。
高臥亂雲中。

贈建昌令魏竟甫居士

長安紫氣禁城浮。會有真人出上流。三輔聲名雄北鎮。一壺冰雪照南州。艾城臥聽樵漁頌。

蓮社時攜琴鶴游。萬仞雲居雲外迥。論心喜坐碧溪頭。

登雲居五老峯絕頂

何人同此膽。孤杖出雲關。天地浮幢外。江湖匹練間。螺青封古寺。雉堞走群山。三載斯游壯。高空萬象閒。

答史白也居士來韻

久依統壑臥青蘿。自笑聞名惹事多。足跨兩船猶叵耐。網來三面更如何。重拈濟北當頭喝。再唱關南舊日歌。萬頃湖光明似鏡。也知好放右軍鵝。

祝熊季納居士六十

我所思兮修水曲。老龐乘願來金粟。耳根久順圓通宗。片片赤心爲歐谷。閉門酣讀于氏書。種得藍田一雙玉。與余膠投十載餘。不覺春秋旬已六。童顏黑髮渾天趣。放浪青流快濯足。骨節珊瑚本自然。翻笑留侯事辟穀。來我黃梅兮梅尚青。君食蟠桃兮桃已熟。靈椿何止八千齡。坐看仙籌塞海屋。

返歐峯宿熊約生大居士齋閣

去年夏之初。箭浪返鄉隅。今年春之半。重問故人闈。去時雷雨撼山谷。今來星月滿平畬。一

陰一晴如昨日。不覺歲籥移天衢。故人相見談笑樂。祇歎白髮增寒顱。滄桑如動天仍定。風鶴頻驚淚欲枯。青山笑我歸來晚。耕蓑久晒犁將扶。百城走遍心在此。忍使天湖明月孤。鍾山移文幸免作。彭澤田園尙未蕪。休歇狂心歸洞壑。收回浪影依菰蒲。舊山咫尺天地曠。峯巒翠如攢圖。自憐癡鈍老更適。樂近賢哲聲相呼。卽此便爲江海客。安用方外尋蓬壺。山頭幸留十笏地。吾將歸去兮挂起當年五石瓠。

丙午冬到雲居喜新禪堂落成

重返歐峯鬢已蒼。心知熟處老難忘。桑乾渡去栖三楚。華表歸來隔六霜。山水儼然明月練。樓臺依舊白雲鄉。兒孫得力吾真足。喜見禪堂湧上方。

訪雲門祖剎

傑峙歐峯後。青蒼萬壑奔。名高昔妙喜。聲振古雲門。法器洪鐘在。宗書寶訓存。爲償十載願。肯惜杖頭痕。

寄雲居願兄和尚

正畝

西江法道久荒蕪。且喜雷門吼應桴。居占白雲高立地。堂開明月快吞湖。晉鋒八博揮千仞。鼎足三分併一盂。爲問趙州關下路。幾多金佛度紅爐。

訪雲居晦兄和尚

濟潤十力

幾年夢作此山遊。今日攜筇到上頭。玉殿珠樓橫鳥道。雄風浩氣壓神州。堂開明月魚龍夜。橋鎖清溪鶴鶩秋。話及近時禪院事。弟兄相對淚交流。

寄雲居晦兄和尚

濟弦五嶽

不莊珍服論家常。時演宗風示故鄉。黃鶴孕靈鍾寶掌。紫雲團蓋識獅王。十千魚化清波水。百萬人皈覺岸場。籌室正添英傑子。紛紛花雨自來香。

書贈雲居燕姪和尚

濟萃谷庵

仰止歐峯爲聳然。于今祖道肯誰肩。刹竿影動騰吳楚。甘露垂時溯後先。抽換象爻旋日月。奔馳麟鳳亂雲烟。天山盛續家聲舊。喜振宗風響大千。

寄懷雲居晦山和尚

法淳古水

寒崖經歲夢。無夜不歐峯。東海來玄鶴。碧溪臥老龍。燈傳三世火。濤吼萬株松。汗漫雲居賦。全提濟上宗。

讀諸緣和尚詩書感

元鵬

紫柏悲歌荷策東。行高冰檗動宸衷。鑿開湖月千峯眼。擎出樓臺十載功。恬退孤風標豫北。

逸群聲價響燕中。璽書妙麗懸天上。王氣輝騰貫白虹。

元旦禮顥愚和尚塔

貞風私淑念霜餘。灌耳聲傳舊傘居。行重北臺標鶴骨。道高南國響鸞輿。乾岡石捫團蕉影。明月堂開減筆書。窣堵稜層師表在。一年一度禮精廬。

卽韻酬史爾力先生之贈

匡歐我客久。詩出亂流中。喜誦柴桑韻。何嗟白社空。乾坤雖日暮。心眼未雷同。誰謂臺荒落。翻經又謝公。

酬熊季納居士

草堂風雨淡高秋。往緒低徊歎異籌。匪第鹽梅今法鼎。還期黼黻舊宗猷。潭龍瀑瀉三千丈。湖月光寒四百州。傲盡冰霜慚妙喜。伯莊道韻播滄洲。

喜悟史白也居士

琉璃古殿月啞臺。皓影遲遲引夢回。緣在湖關航笠至。懷從蓮漏袖詩來。十年道話風猶古。此日論心趣益灰。莫謂白公空禿隱。真人無位可安排。

奉迓老人開法薦福次史白也韻

閒心枯盡臥籬蘿。繫虎橋陰悵又多。一自退庵休住後。再來古塔主如何。難禁此際烟波韻。
忍聽當年雨夜歌。江上瓣蘆風信好。相看王老出瓶鵝。

答袁伯采居士來韻

悵望雲泥不憚艱。陰晴翠濕下嵒關。棊盤熱鬧人爭勝。鹽醬風規我弗慳。婚嫁如翻龐老案。
車牛應笑住菴頑。談鋒喜對澄湖上。峽倒詞傾疊亂山。

奉送老人由安國赴四祖請時辛丑二月朔日也

不分吾師住。歐峯已十秋。六年三楚國。四海一堂頭。園解黃人望。鉤垂碧玉流。歸歟天上寺。
石室又盈籌。

辛丑秋山堂 禪師塔頭上供

日覩雲霄孰漢秦。祖翁田地自來親。草深三尺迷青屨。笠下千峯薦白蘋。擬共尙書嬰難骨。
重來太守蕩魔塵。寂光大有靈長祚。羅拜東西南北人。

掃保安壽椿禪師塔

蕉疃沿徑入。塔影挿雲層。石捫前朝字。碑垂耆舊藤。孤錐千指繞。數篋一毛登。風雨催歸路。
烟村隱暮燈。

丁未春方丈落成次韻

柳色依依弄晚春。靜觀新閣自宜人。高齊北斗標真淨。影對東軒憶穎濱。雪牖幔迎雲背月。天門練截世間塵。摩娑碧眼空今古。誰是雄才探逆鱗。

賀贈熊武章居士北上

爲霖法戰昔人龍。又喜嘉音報早鴻。子夜藜燈輝雪閣。孤懷桃醴點青筒。簪纓德霈江天上。鸞鳳名新宇宙中。欲作狀元山老詰。有時亦得跨宗公。

酬李蘿翁邑侯

誰謂仁人撫字艱。海天佳氣滿江灣。蕉花雨灑宮袍綠。荔子霞蒸几御斑。衡鑑一新文苑藻。謳吟四出訟庭閒。溪橋遙待宗雷韻。漏滴蓮華響萬山。

登歐頂五老峯

壁立中峯勢獨尊。珠聯絕巘逼天門。開遮面目煙霞冷。唐突虛空日月吞。五頂霜顱連伯仲。千重青嶂列兒孫。地靈托出蓮花國。法道雷驚響五燈。

庚戌除夕

年來履歷得人憎。道話何緣逼翠層。玉殿爐熏時掃雪。雲堂茗戰夜敲冰。半生心緒孤嵒斷。

一斬名根萬慮澄。事逐歲除蒙衲坐。空明練影對寒燈。

辛亥元旦

祖塔燒香祝聖餘。凍深難比昔年初。冥濛喜看天花雨。落寞時翻竺國書。二十春王爲客主。三千世界作籬廬。厓關潦倒何新舊。一任人來較佛驢。

山居四咏

我愛山中春。蒼崖鳥一聲。桃花源裏住。罕見問津人。

我愛山中夏。空冥花雨下。行吟屐齒肥。樹色麗而野。

我愛山中秋。黃雲稻正稠。鐸聲連振起。鐮子刈禾頭。

我愛山中冬。冰澌疊亂封。地爐無品字。一榻冷千峯。

宿雲門寺喜佛殿藏經閣山門僧堂簇新書贍映明禪社兄

風高天下古雲門。曇晦重尋法道喧。妙密爐鍊師匠擁。荒寒杜火俊英援。花攢殿角懸星斗。榛劈田疇繞梵壇。已構叢林宜有致。更掀祖令象龍蕃。

贈友詣雲居晦和尚席下秉戒兼度三旬

天植直本

衣瓶絜志上雲居。直踏蒼茫力有餘。語扣老人三聚說。身酬甲子半周虛。碧溪竹過橋爲識。

明月湖深水自如。正欲疑情知落處。莫教岐路問家書。

夜話雲居方丈

定 嵩聞極

丈室梅香雪復催。夜來燈火影徘徊。寒交徹骨雙眉結。話到衷腸萬事灰。祖道任君先授記。法門嗤我本無才。今宵共作家山夢。注意匡廬祝笑臺。

賀雲居燕兄和尙

超 宗異目

雲嶺甲江左。名高四百州。石垣依古樹。湖水映層樓。陰壑長餘雪。熏風却似秋。端居兄果稱。宛爾芥針投。

寄懷雲居燕兄和尙

半湖明月照窗時。猶憶當年共侍師。別後病深成弟懶。居來道重與兄期。山高睡虎出林早。晝靜寒猿下嶺遲。竹杖每思衡嶽去。未知他日更何之。

祝雲居燕兄和尙大壽

智 鎔石房

垂念支那法運秋。象王雄踞萬峯頭。克家機發天山令。振祖源迴濟上流。吳楚同條慚破額。門推高調誦歐丘。笑看知命渾閒事。趙老應須遜一籌。

客靈山送燕兄和尙歸雲居

元 遠廓聞

違君七八載。此日幸相期。共祝獅王壽。同敲鶯嶺詩。冷泉看越地。明月似歐時。分杖歸天上。何勞悵別離。

賀雲居新和尚繼席

元器頤西

九載同聚首。愧我守愚拙。列祖把臂行。唯君孤迥絕。胸臆八極吞。頂顙三眼徹。跨天上雲居。震五宗法脉。把定趙州關。釣錐如電掣。 啄露吹毛。當陽如截鐵。忒殺踞虎頭。天然真高格。
誰識迦樓王。橫身滄海竭。晦老和尚感夢謂衆曰大鵬所居止斥鵠不謂然胸吞華藏界眼蓋古皇前故云

次韻送燕翁法兄和尙歸雲居

元輿載堂

招搖金地望多年。此日風高一會前。靈鷲雙留華雨几。月湖歸去錫摩天。光寒寶劍三千客。調琢獅筋五十絃。怪瀑何時重眺詠。鶴鵠響徹碧潭邊。

己酉立秋二日送燕翁和尚歸雲居十韻

德良以貞

師歸雲居嶺。舟櫂勞二千。金風吹衣襍。悵望西湖邊。我登趙州關。挂笠已七年。披蓑學農圃。冒雨鋤雲烟。峯高面骨冷。五月種石田。採薪上絕頂。肩背摩青天。月明吞碧漢。石鼓半空懸。天地鍾靈氣。聳秀在林泉。杳然非人境。三登歎無緣。何日理方筇。相依伴枯禪。

又

元廉卓源

歐阜欽風久。靈山若有期。錫飛凌漢影。囊貯逸羣詩。傑閣來新佛。獅林覩異枝。不圖千里會。交臂卽分離。

己酉季夏喜雲居燕翁和尚詣靈山恭祝老人大壽承賦飛來峯行一篇次韻奉

酬兼惜別

正瑞慧麟

方內論山川。浙東稱第一。對峙兩高峯。今古分南北。中有秀芙蓉。傳來自竺國。玉鏤千佛面。端嚴歎奇特。爲探此孤踪。一日杖幾策。江潮壯靈山。聲名高四百。師從天上来。相攜訪幽蹟。鐵壁怪玲瓏。石筍爭突兀。談笑風雷生。林巒一變色。穿崖登絕頂。一覽湖天窄。俯視衆壑攢。乳泉竇門滴。吹瞰呼猿洞。幽峭藤蘿織。疎鐘動初秋。涼飈起天末。雙橋合澗流。晴空走霹靂。冷泉清且徹。臺殿浸虛碧。六月山暑空。寒風凜毛骨。笑彼勞勞者。沉酣戀火宅。顧予桑梓同。彼此恨作客。一會儼然存。高吟響法窟。白雪與冰壺。一傾舊肝膈。人生貴曠觀。良晤誠可惜。未卜是何年。再話三生石。

別雲居燕翁和尚

元斐文石

攜筇解袂出高峯。回睇巒萬壑深。孤去雁翎蘆渚雪。雙懸雲榻月湖心。谷泉友誼期攻玉。支遁山盟志斷金。毒手今將歸興挈。來秋洗耳聽鳴琴。

寓靈隱送雲居燕翁和尚歸西江

海遂豈章

碧溪一別悵何窮。喜晤飛來舊嶺東。父子聲傳喧海內。祖翁道合播寰中。歐峯有待歸遼鶴。越嶠無從問雪鴻。回首錢唐帆去遠。獨餘明月照長空。

登雲居山

顯赤允中

頗年有夢上歐巒。忽地親從絕頂看。千仞面朝雙象迥。萬峯頭湧一湖寬。僧堂樹擁烟光翠。佛殿門開日色丹。傑出雲居天上寺。白雲飛到也知難。

己酉秋日送別燕翁和尚

等璉疊印

欣師兩度到靈山。冰雪家風孰可攀。席繼歐京新殿閣。宗承慧日振瀛寰。雲帆去國三千里。榔櫓橫肩百二關。正欲空亭同夜話。誰知又逐別峯還。

重遊雲居

本翔

誰信雲居頂。湖天更有山。蓮城堪俯仰。鳥道絕躋攀。古塔蘿千匝。碧溪水一灣。因思尋舊約。重話趙州關。

靈隱老和尚壽塔建在雲居辛亥冬杪垂成恭賦志喜

成殊

凌虛削出玉芙蓉。寶塔青螺涌萬重。明月湖光千古鑑。華城山色四時容。最欣回顧朝關象。

猶愛奔騰到穴龍。佇聽法雷天下震。他年祖脉鎮歐峯。

和前題

元鵬

兒孫早計卓芙蓉。鰲背掀開最上重。碧水周旋新樣子。靈山指點舊形容。其兆靈應本師自卜九霄飛舞來巒鳳。千里嶙峋盡嶽龍。四十八錐添一座。蓮花臘月播湖峯。

和前題

常源

歐京預兆削芙蓉。嶂列兒孫遶萬重。層級鑿開金石面。危尖冠絕海山容。閑閑且置雲中地。簇簇高蟠天上龍。卓出古今稱第一。再興臨濟響三峯。

和前題

常樣

蓮城自古繡芙蓉。歷代經看不記重。十字弟兄高拔地。千年木石盡開容。華幢絕頂超羣象。明月當軒豢老龍。從此鳳麟應徧界。都盧瞻仰在雲峯。

和前題

願成

團團珠頂逗芙蓉。多子機先啄啄重。鑿破青山虛補處。樓空明月鎖閑容。孤標此際奔麟鳳。正脉他年踵象龍。震起南陽無縫話。聲高天上壓諸峯。

寄懷晦山和尚

正智木立

杯渡乘風山亦浮。雲居破額幾春秋。太阿鑄就光千里。毒鼓撾時碎九州。採藥不辭經虎穴。
負薪只得反羊裘。炮莊且寄呵呵笑。放下泥盤看水流。

奉輓晦山和尚

超直問石

直指堂前話別時。慇懃贈我五言詩。還期黃鶴去應返。不料白雲空復思。濟北宗風推領袖。
嶺南衣鉢見提持。最憐千古華亭事。鐵笛橫江歷亂吹。

丙申秋登雲居兼贈燕翁和尚

元迴異峯

曹源探罷嶺南來。一到歐峯眼豁開。山頂湖澄千頃雪。洞門潭迅五龍雷。禪承弘覺宗風遠。
道振黃梅法運回。最喜鳳麟能繼步。獅絃響徹亂雲堆。

寄懷晦山和尚

讀徹蒼雪

特地西江尋古寺。崎嶇歷盡路夷然。疎鐘半度平湖水。好鳥斜飛翠嶂烟。面面流雲生畫筆。
青青喬木拂炎天。宗風快覩香秞熟。欲買山鋤學種田。

雲居山志卷之十六

集景詩

溫 泉

王安石介甫

寒泉清聽永。獨此沸如焚。一氣無冬夏。諸陽自廢興。人游不附火。虫出又疑冰。更憶驪山下。鏗然雪滿塍。

溫 泉

朱熹晦菴

連山西南來。中斷還崖起。千霄幾千仞。據地三百里。飛峯上靈委。衆壑下清美。建茲勢力窮。猶能出奇偉。

講經臺

蒲秉權

白馬西來後。蒼龍護法車。憑誰珠繫袖。若個舌生花。苦海從無岸。恆河幾聚沙。欲知三乘諦。一字了空花。

咏雲居高橋

雲居山志

卷十六

熬背跨清流。嶙峋幾度秋。繁花迷鳥道。疎雨疊魚漚。風勁蒼梧冷。雲橫碧澗幽。何來空谷響。云有客鳴騶。

講經臺

朱統鉞

千秋高廣座。六代演三車。鳥跡留經偈。苔痕綴雨花。遊行憑寶石。僧梵總蒸砂。田宅均爲計。誰攀理法華。

五龍潭

鄭州璽荆名

石橋浮碧半天臺。猶領歐峯白浪來。兄事匡泉雲亂潑。兒名呂水練排瀝。分流月窟飛香雨。直瀉龍湫響法雷。疇把空明拈作印。明明一鏡自非臺。

雲頂田

誰遺種子上方巔。春草閒門接大田。苗欲懷新迎寶所。耦先求舊種壺天。星纏直逼陂流影。香炮遙憐野燒煙。最好農歌和梵唄。幾聲清磬隴雲邊。

復合神鐘

咄咄霜鐘廢更存。幾年閒放臥江村。亹開示寂雲亡岫。縫合完真月在瓶。自吼連朝悲舊事。一槌破夜到家門。還看寶偈毫間授。珍重蒲牢覺大昏。

雲頂田

楊士元

誰知峯律亂山巔。上有青疇數頃田。餚來犁維墾地。歌聲徹唱似耕天。荷鋤獨早迎朝日。
住耙尤先帶晚烟。暫向農家課晴雨。前村犬吠白雲邊。

明月湖

趙之俊叔登

一泓銀漢注雲端。舉步誰知卽廣寒。桂魄翻從天半現。平湖忽在嶺頭看。山僧畫伴魚龍宿。
野客夜驚星斗盤。香海無塵何處覓。普陀水月此中觀。

五龍潭

亂峯堆裏境偏幽。幾個深囚最上頭。霖雨蒼生瀰赤縣。風雲白日會歐丘。玉簾不捲千年雪。
銀練長懸一派秋。聽法曾經傳五老。養成鱗甲度神洲。

羅漢塔

十八神人天一鄉。託迦遊戲到雲房。南臺飛像當年異。西嶺遺痴今日香。青眼到逢新慧了。
龐眉再接舊緣長。浮圖晚映霞棲處。顏色猶疑見上方。

雲頂田

一犁春雨萬峯巔。霄漢何人事。耦耕稻穢不須謀。栗里桑麻到處卽桃源。牛郎果見來天上。

布穀分明向日邊。若是青疇需灌漑。銀河平挽月湖前。

碧溪橋

朱門馴季馴

白雲深處萬山巔。一段晴虹駕碧泉。斜抱明湖連彼岸。遙通覺路到壺天。溪邊竹影曾留偈。石上苔痕欲化僊。只爲風流從此去。寒光猶鎖舊時煙。

神宗御筆

人間劫火徧桑丘。天上招提御蹟留。額表名言淘帝度。聯傳真語本儒修。宸章烟泛霞霞齊。漢藻精騰湖海秋。爲憶宮幢迎院像。慈光飛白五雲頭。

明月湖

陳忠獻赤

山涵湖水水涵天。別一乾坤在嶺巔。星燦冰壺珠萬點。月明玉匣鏡雙圓。不存朕影全真照。獨有寒光涌巨川。香飯每餐常淨鉢。幾番驚起毒龍眠。

羅漢垣

熊士龍

神工聳上萬年防。外道豺狐孰敢當。一片石心無內外。巍然法苑樹金湯。

鉢盂峯

熊維孜文玉

高擎點化幾時休。總爲諸方不自由。看取當前人飽足。何須托出問閻浮。

五龍潭

雷之朝
吉臣

空明未許更徘徊。非影非潭境自開。伸屈不隨濤浪轉。飛潛時任海天回。洗心幸有千華雪。
醒耳欣逢萬壑雷。一生擊孟底現。虬松百尺劍光來。

溫 泉

一眼湯泉流過東。浸泥燒草暖無窮。驪山溫水今何事。流入金鋪玉砌中。

溫 泉

石龍有口口無根。龍口湯泉自吐吞。若是衆生本無垢。此泉何處有寒溫。

碧溪橋

水碧天空氣瑟蕭。松聲萬壑捲秋潮。溪邊黃石如相遇。不道茲橋讓圮橋。

五龍潭

潭底曾栖五法龍。夜深風雨聽禪宗。一從龍化潭封也。雙井於今碧蘚封。

石 鼓

扣之剛不鳴。圓體憑誰琢。悟得無聲聲。點頭者是覺。

碧溪橋

青青楊柳竹蕭蕭。萬丈飛泉噴海潮。五戒了元禪喜去。碧溪橋似虎溪橋。

五龍潭

清潭稽古五神龍。曾聽真僧演五宗。契得禪機歸正覺。空留雙井碧雲封。

明月湖

熊德陽
青嶼

山頭雲霧割然收。縱步湖邊取次游。忽獲玄珠真罔象。一團湖水一輪秋。

石鼓峯

友麋藉草恰藏身。鎮靜渾忘宇宙春。自奏鈞天呈響後。不將聲色駭時人。

雲居山志卷之十七

集景詩

明月湖

戒顯

激灔湖光數頃浮。誰知却湧萬峯頭。豁開古殿當前月。散作空山不盡流。金碧影搖冰鏡底。魚龍身在廣寒秋。一輪直接曹溪話。白浪宗風遍大洲。

五龍潭

瀑泉今古說廬臺。頓向雲居絕頂來。潭擘五龍時怒吼。勢擢三峽更喧逐。橫奔月窟千堆雪。倒軋天河萬道雷。鎖斷歐峯懸白練。遙看珠網挂層臺。

趙州關

法戰諸方老趙州。爲尋勝祖踏歐丘。草鞋人去三千里。古話雷驚數百秋。雙闕蠹天秦塞險。五龍扼隘劍門愁。金鎗袖得能衝破。許到雲居最上頭。

佛印橋

蘇黃勝蹟照層巔。佛印風流萬古傳。丈室久沉明月面。石橋猶鎖碧溪烟。開先瀑口虬松吼。楊子江心玉帶懸。更有雲居佳話滿。一生心事醉湖天。

石鼓峯

峻嶒石鼓一峯尊。佛印當年異蹟存。恰似海東懸雪嶠。何妨天半布雷門。禾山擊着收槌影。象骨敲來絕響痕。縱是希聲難側聽。灼然塗毒吼乾坤。

鉢盂峯

蓮峯簇簇遶華臺。一鉢中央倚鏡開。對寺面看雲捧出。當湖直逼海浮來。波心影落潛龍怖。洞口香熏羅漢迴。挂起德山難着手。昂頭何處拶如雷。

羅漢塔

託迦昔日此盤桓。留得形模與後看。虎錫六環搖界外。浮圖一柱卓雲端。烟霞孤嶂天華暗。風雨空山石磬寒。渡海神通瞞未得。至今飛翠滿湖灘。

雲頂田

雲居高鎖亂雲巔。雲外浮空滿綠田。誰是五丁開梵塢。坐看百畝湧湖天。星河夜接袈裟影。鸛鵠朝衝犁耙烟。肯學耦耕霄漢上。僧農一笠夕陽邊。

蓮花城

崔嵬雲頂湧平蕪。面面青峯拱一湖。雉堞天然成繡郭。龍蟠空外似蓬壺。千層臺擁浮幢寺。十丈蓮攢泰華圖。豁達門開通衲海。西江冠絕梵王都。

羅漢牆

嶙峋高壘寺門橫。面揖湖光一派清。鼇背鑿開羅漢字。龍鱗幻出梵天城。縱經風雨周繚固。坐擁雲山保障平。詢是傘居真手澤。萬年屹立壯歐京。

神宗御筆

昔年風雨廢僧廬。神廟恩光賜劈除。形殿遠飛天上藻。雲堂高榜聖人書。儒箋四字空秦篆。佛語雙題冠石渠。盛事真堪追大覺。煌煌奎閣照坤輿。

復合神鐘

峯頭猛簾廢興存。寺剝鐘移聖水村。去後盡看拇指縫。歸來驚合破瓶痕。湖天獅吼開雄殿。月夜鯨鏗出嶺門。更爲通身書梵偈。霜槌一擊洞幽昏。

明月湖

元鵬

一泓虛碧萬山攢。空裏湖邨異衆觀。疊嶂眼開冰雪鏡。青冥光瀉水晶盤。春喧玉兔儲霜魄。

浪鼓金鱗鬧廣寒。宕活關門時縱望。浮幢輦藻海天寬。

五龍潭

危峯陣出割鴻溝。峽底潭奔絕壑流。五勞王困翻鐵浪。千尋珠瀑挂雲頭。晴空錦嶂飛雷雹。夏半天門噴雪毬。極目巉嵒人罕到。幾能挈伴瞪龍湫。

趙州關

老不休心赤縣城。歐京旅迹韻偏清。關津天上風流古。唱拍雲間海嶽鳴。峭壁苔荒名已遠。壁窠墨瀋石猶橫。芒鞋影逐烟波渺。千載湖崖法調驚。

佛印橋

覺老當年倚杖藜。石梁千古令名題。風姿蓋代山留骨。砥柱狂濶竹過谿。水落碧灣聲斷續。烟橫岑崿岸東西。寒崖不盡滄浪韻。騷雅長虹鎖築隄。

石鼓峯

兀突孤岑架碧空。關南戰鼓響雲中。形圓圖畫欹秋月。面對嵬峨霹怪風。石竅怒號虛谷震。松濤浪擊遠山聾。天教橫在歐峯半。萬古希聲吼大雄。

鉢盂峯

峯青孟湧梵宮牆。大類吳天就覺場。湖口白盛雲作供。山齋清借樹爲香。音窮鷺嶺僧沿錫。
影伏龍門蹟未囊。更喜華城圍四面。青林玉鱗宛中央。

羅漢塔

西岡訣別豎浮圖。歐阜青林隱現殊。拊藥萍踪僧惠渥。炙瘢香洗道風孤。國清山路譚今昔。
方廣堂中像有無。身剩南臺奇未了。飛來名勝播江湖。

雲頂田

天半平疇剝啄稀。孤邨寬衍亂峯圍。烟蓑雨趁巢鳩喚。籜笠雲隨水鷺飛。翠陌離披禾浪碎。
香光浮動稻花肥。躬耕自昔家聲舊。歸路農歌放落暉。

蓮花城

空盤崖谷列城渠。萬壑樓臺瞰十虛。五葉鳳麿騰祖窟。六朝烟雨繪僧廬。芙蓉翠削鴻濛擁。
雉堞山開混沌餘。尤快地靈呈幻力。華心擎出古皇居。

羅漢牆

運築堅墉曰應真。傘居匡衆策功頻。垣壘帶礪風幡影。鮮剝方圭鸕鷀春。鐵石千鱗鞭華斧。
天城半落涌湖輪。鶩行環障雲端上。不問中原漢與秦。

神宗御筆

寺經明葉住山氓。再闢華宮神廟勲。聯署古籀鐫聖語。顏垂雅篆繡鴻文。宸章日月摩青漢。
御翰淋漓濕白雲。更錫琅函三萬軸。佛心天子海山聞。

復合神鐘

華鯨在扣怪痕斑。破落荒塘韻已刪。徑寸壘開移聖水。瀰漫縫合轉雲灣。自鳴累夕喧孤月。
暗渡餘音響萬山。物貫盛衰峯頂寺。丹書梵咒燭天關。

石雞峯

雞石孤危甚。奚緣立地高。不餐丹鼎粒。豈逐翰音號。 啓啄何年殼。湯燁遠世庖。昂昂青漢表。
萬古莫籠牢。

明月湖

音住遜菴

應是圓湖愛上流。不然奚湧此山頭。泉飛雪練三千丈。月吼雲居四百州。空谷冷吞冰嶠古。
亂峯擊出石盂秋。寒光吸盡歸何處。萬壑奔雷一鏡收。

五龍潭

何處濤搖萬杵春。月湖飛出五潭龍。觀齊雁宕珠泉落。影對匡廬瀑布重。青峽界開傾海軸。

怒雷時吼咽鯨鐘。風吹不斷歐峯練。十里烟村霽雨封。

趙州關

趙州遺蹟壯崖標。恰似天城斷石鱉。三字榜來秦篆古。五龍飛出禹門高。尋常月鎖人難渡。却有鐘聲夜半逃。腳底無私應徑過。不須重學曉雞號。

佛印橋

斷痕曾記再來朝。海內風傳佛印橋。山石枕流依虎骨。雲根跨澗束龍腰。鐘聲幾度晨昏遠。瀑影前飛雪翠瑤。時想東林三笑路。歐峯送客出青霄。

石鼓峯

嶺頭閒立聽烟巒。洞壑風桴響更寬。懸起恰同落日觀。架來曾不受人鞭。何須蜀木敲聞遠。舉似南泉打破難。無孔鐵槌輕一擊。直教響澈腦門寒。

鉢盂峯

鉢盂雲捧萬峯巔。惹得師僧望眼穿。湖面洗來龍怖影。翠囊收貯雨餘烟。藏於嶺外誰能掇。挂起岩頭妙不傳。松粉任教狼籍甚。古今函蓋梵王前。

講經臺

不知何代講三車。更有荒臺卓漢斜。苔古誤看遺梵字。雪飛還訝落天花。聲餘碧落風雷吼。
石作參徒歲月遐。吾欲坐邀峯說法。暮鐘敲起嶺頭霞。

蓮花城

壯哉空外萬峯靈。四望葱葱秀郭形。擎出化城天上翠。廓開蓮國海門青。芙蓉自古晴橫蜃。
雉堞從來夜接星。高臥不知何世界。梵王都裏夢魂馨。

雲頂田

梵塢天城遠世緣。湧來空界綠浮田。獅林坐話千疇雨。鶴背耕開數頃烟。童牧笛歸湖月上。
老農歌徹傘居篇。誰能學稼雲霄外。笑傲滄桑便是仙。

羅漢牆

減筆書來虎碣刊。石駁羅漢亂雲攢。半鐶屹立金城骨。一帶平開鐵筆觀。形拱寺前欺鬼築。
勢橫天上幻龍蟠。吾師知有重來願。幾望峯頭月色寒。

神宗御筆

紫柏曾嗟放牧場。幸逢明主更鋤荒。四山春色來螭詔。萬里恩光被雁堂。宸翰影搖湖底月。
御煤朝落嶺頭香。重興祖令崩霆遠。永仰高旻靈藻長。

復合神鐘

梵鐘神合舊居場。恨殺師僧聖水塘。移去暴開窺石亹。復歸鳴似向東方。松醒鶴夢巢飛雪。
嶺度鯨音夜落霖。羅睺一搥山月顛。亂峯堆裏吼獅王。

五龍潭

智鎔

翠疊危巒聳碧空。側開小徑見神功。油雲突突迷青麓。石闕團團有臥龍。晴雨練飛千仞雪。
電門冰響一溪風。應須奮鬚澄潭起。攬動滄溟萬派通。

石鼓峯

參差怪石亂峯攢。一鼓圓形快異觀。因布希聲傳刦外。盡看高架在雲端。頻橫宿雨從教爛。
縱有頑皮豈受瞞。惟許衲僧敲得着。須彌椎動打鹽官。

明月湖

元輿戴堂

平湖湧出亂峯頭。一派浮空壓衆流。萬丈冰濤奔月窟。千重雹雨撼龍湫。橋橫古岸沉溪碧。
鉢拱當門倒影幽。絕頂廊開青嶂眼。團圓占斷海天秋。

前題

海曙樂屋

湖開峯末海門寬。鑑着行人骨膽寒。天上兔烏波競浴。水中星斗夜誰看。鏡痕洗盡雲千樹。

殿影搜空月一團。鯨浪有時連瀑吼。攬翻澤國動層巒。

蓮花城

壁立金城遶梵村。圖開太華等兒孫。嵒芝百種侵香座。夜雨千峯鎖石門。繡蝶聲流天闕磬。珠林花宿海螺軒。湖關不掩星河上。放出浮幢定月痕。

五龍潭

常源海目

百尺寒潭水自洄。常年匹練挂崔嵬。崖飛翠濕晴霄雨。瀑濺聲喧白晝雷。曉霧浮沉龍殿穩。春流澎湃海門開。波心新月長垂釣。看幾金鼈躍浪來。

羅漢塔

方廣雲居隱現來。幾番踪迹令人猜。秘遺瘞蛻香千古。占得空山土一堆。錫杳南臺眉影斷。攜分西嶺話如雷。都盧收拾湖天上。塔石嵯峨繡碧苔。

明月湖

常駿天駒

數頃雲濤水拍天。一湖銀練湧歐巔。蓮城倒影冰壺內。桂魄留心玉殿前。魚躍微風隨淺浪。龍看皓月戲深淵。當門碧鑑輝今古。不盡寒流洒百川。

五龍潭

峻嶒石崿蟲歐丘。五穴心連曲礪幽。練挂雲嵒奔虎瀑。珠飛絕壁迅龍湫。晴空峽迸晶簾雨。
日暮煙寒霰玉流。側足搖搖遊況異。崩霆響徹亂雲頭。

前題

常樸去浮

幾隨月礪出關前。石峽欣看五竇圓。半壁綿雲含暮雨。一條銀練挂飛泉。冰潭浪捲層岩雪。
龍瀑光騰邃壑天。山嶽撼搖霄漢上。風帆望眼往來穿。

雲頂田

常楷石唯

歐阜聲稱別一天。怪來峯頂湧平田。東西翠浪蓮城裏。上下青疇月瀑邊。徹耳農歌連梵起。
渾身蓑笠帶雲穿。相依博飯生涯古。誰聽諸方浩浩禪。

石雞峯

法讚密宣

塊石禽同類。昂然不世羣。危冠時障月。距爪欲擎雲。染雉真難辨。冥鴻勢莫分。假聲豈逐響。
杜口息紛紜。

和晦和尚雲頂田韻

德大冰壑

未陟嶙峋最上巔。寒雲漠漠鎖平田。春高布穀聲離地。日傭新苗綠到天。報雨聽鳩啼碧樹。
轂轝放犢憩芳烟。兔園有冊閒相課。晚看桑麻落照邊。

客壽樟菴望雲居山奉次晦翁老人雲頂田韻

昌 裴星蕊

客窗心賞碧峯巔。雲頂奇觀世外田。嫩草鋤翻丘壑雨。落花耕破杜鵑天。稻苗傍日懷春暖。
麥浪浮空媚曉烟。未粧頻年非着地。徒教夢遶月湖邊。

明月湖

元 凤展超

澄湖高湧亂峯頭。照徹晴空古鏡浮。杳靄銀濤翻碧落。衝開玉浪瀉鴻溝。蓮城環映三千頃。
月練平吞四百州。天上雲居真絕景。一泓收盡萬山秋。

前題

常 楷石唯

圓湖怪底湧歐丘。倒吸西江吐上頭。印破乾坤天不夜。洞開雪壑水長流。一輪收盡空山影。
四面翻成古鏡秋。最喜廣寒傾白浪。派分濟北滿神州。

石鼓峯

德 大冰壑

峯鏤奇形峭蒨中。儼如石鼓嵌寒空。固宜影靜潛歐阜。豈屑聲長借蜀桐。幾度恬依孤夜月。
有時怒擊五更風。雖驚塵夢非關響。恥與羣蛙一部同。

複合神鐘

頑質由來具性靈。鑄從鳩氏豈長冥。含瘡暫去依人境。清韻終歸舊祖庭。臺合自徵興廢兆。

默喧漫許鬼神聽。豐山乍似霜先降。嗚幾晨昏未肯停。

石鼓峯

宗本圓照

造化功成難可測。不論劫數莫窮年。如今橫在孤峯上。解聽希聲徧大千。

無心杏

真可達觀

有實無心事最真。難將此語對傍人。只須自己親嘗嚼。始信歐峯別樣春。

講經臺

老僧曾此說楞伽。朝暮諸天雨寶花。莫道卽今消息斷。登臨依舊搭袈裟。

石鼓

懸空架地力能移。怪石爲匡蘚作皮。無孔鐵鎚敲便響。傳留直下不須疑。

石船

船子石天然。飛流對面懸。不須篙櫓力。撐出竹林烟。

前題

戒顯

元鵬

竹林烟裏石船浮。萬壑奔濤砥逆流。分付篙郎齊着力。莫教泊在半山頭。

明月湖

音可元白

無心照出青山面。今古何人作眼酬。光影分明瞞不得。峯頭月冷一湖秋。

趙州關

明月湖頭一轉語。趙州到此絕思惟。尋常把斷藏身處。綠水青山放過誰。

安樂殿

怪石奇松非殿閣。樹神斷不住人間。長年安樂知何處。五老峯前一帶山。

石鼓峯

設立何年不記時。聲音從未露人知。團團獨架崖頭上。今古誰能下得槌。

碧溪橋

石梁橫跨碧溪央。勢若虹霓接上蒼。四海往來俱着便。免教厲揭濕衣裳。

雲居石船

渡生已畢似閑舟。恆泊雲灣溪水頭。不住中流藏此壑。何年擰出竹林秋。

前題

音 明晦之

性 儂令儀

日篩竹影疑帆影。風捲山花似浪花。不假人間舟子力。烟霞滿載卸誰家。

趙州關

智 浪起高

河北曾聞趙老闖。倩誰移至在雲山。須知不涉關津者。拍掌呵呵去不還。

碧溪橋

應接人天續斷途。腳跟步步望來蘇。碧流響處千層浪。縱使王維世莫圖。

前題

性照光遠

石梁把斷在孤峯。名播諸方迥不同。佛印光騰今古罕。曹源澄徹貫天虹。

石鼓峯

疊石毬堆峯外攢。何年勝蹟挂層巒。虛空響徹天魔碎。華藏聲傳海嶽寒。

雲頂田

通徹拚癡

怪來阡陌在山巔。四面春犁別一天。翠浪連雲時作雨。僧農歌徹月湖邊。

復合鍾

輶去他山數十秋。懶將聲響駭神州。如今塵合歸叢社。月皎鯨鏗徹嶺頭。

石鼓峯

定圓德操

天然石鼓架雲霄。風雨頻撻雜梵謡。往往遊人齊側耳。希聲不受棒槌敲。

歌

插田歌

觀衡

君不見世出世間達道人。不言妄想不言真。但知有生無生意。平常日用無疎親。無生安生
生無生。本無聖解與凡情。着衣喫飯生活計。拈來無事不圓成。能衣能食生之本。春耕秋穫
快如滾。一飽高眠佛不爲。於中受用難思忖。難思忖。離言說。根本法輪無間歇。日出月沒恆
自轉。寒來暑往何時輟。諸佛子。聽我說。佛與波旬俱妖孽。絕聖棄智民自安。古人不是無根
舌。諸佛子。同我住。莫將文字求歸趣。閉目暝心寂滅魔。談玄說妙閒家具。正法輪田一片。諸
佛衆生同一貫。百千三昧此中生。性德恆沙不可算。諸佛子。同我去。深泥田裏好相聚。拽耙
鞭牛真快活。拖泥帶水渾無顧。畦畔分明水路通。泥水平如掌面同。拈起禾莖次第插。寬狹
橫豎須合中。田角斜。禾路直。橫豎成行若絲織。畦似如來福田衣。禾像梵王網孔密。諸佛子。
同我來。及時應節莫挨排。挿得一莖一佛現。千莖萬莖皆如來。放去拈來無別物。能拈能放
又爲誰。超然頓入不思議。那嫌日晒與風吹。釋迦師。曾示此。末後拈花露全體。兒孫只向花

頭覷。拈起禾苗迷宗旨。鴻山老。有生涯。父慈子孝甚堪誇。南山大有人。插禾。荷鋤能有幾作家。洞山聰公妙處多。趁閒蓋屋晴割禾。納輸王稅無餘事。水邊林下任高歌。識得心。無寸土。古人早向諸君吐。爛泥田裏豈無刺。分付閭黎莫莽鹵。日出作。日入息。野老昇平忘帝力。縱使文章沖北斗。還須男耕女仍織。此一莖。正法眼。法界照來全不見。不但魔外絕踪跡。佛祖光明俱不顯。此一莖。涅槃心。山川海嶽盡黃金。雷震長空浪泊天。無起無滅無浮沉。此一莖。菩提樹。根盤無始葉繁聚。開花結果劫前香。起死回生超靜慮。此一莖。寂滅海。萬象森森俱不閱。若有若無無出沒。無彼無此無雜壞。此一莖。如意珠。百寶圓明光自殊。隨求隨應應無息。無欠無餘同太虛。此一莖。清淨戒。酒肆出來欠肉債。腳尖踢倒毘盧師。拳頭打破華藏界。此一莖。無盡藏。生生不已無遮障。取之不盡用不竭。小大得之隨心量。此一莖。大導師。生死涅槃路不迷。資糧具足隨所往。風光到處有高低。此一莖。大醫王。佛魔都來買藥嘗。沾着通身冷汗出。不復爾短我猶長。此一莖。慈氏閣。善財登之大開豁。無量無邊三昧門。門門得入大解脫。此一莖。空王殿。坐斷十方光始現。無壁無門任往來。莊嚴無量香雲徧。此一莖。大梵刹。梵王曾將供釋迦。百草頭邊安樂國。大地無處不金沙。此一莖。光明幢。搖邪顯正標無雙。崔嵬高起金剛嵌。八面玲瓏若虛窗。此一莖。太阿鋒。揮空寒燄若飛龍。是佛是魔未敢觸。吹

毛利處沒行踪。此一莖塗毒鼓。耳其聲者全身腐。死後再甦方始知。個裏原不容住顧。此一莖。榔標棒。黃蘂拈起大愚唱。打得臨濟顛倒顛。殃及兒孫沒了當。此一莖無縫塔。南陽國師是先達。對御曾將此樣呈。湖北湘南漏七八。此一莖玻璃蓋。文殊舉示識者罕。能溫能涼妙有餘。日用不知空自賺。此一莖乾屎橛。臨濟將來作禪悅。從古至今咬未碎。其中滋味自然別。此一莖獅子吼。百獸聞之皆遠走。餘音落處韻猶長。知者還他出者口。此一莖大白傘。一切蓋。覆能徧滿法界。合來一處收。本然清淨無雜染。此一莖大方廣。花雨松風發幽賞。就裏本無元字脚。非縱非橫絕比況。此一莖大圓鏡。法界圓明性清淨。情與無情影現中。重重無盡無偏正。此一莖大法螺。聲震十方演摩訶。四句俱離百非遣。不存一字義猶多。此一莖優鉢花。奇香瑞色有靈芽。三千年到時一現。春種秋收果未差。此一莖本來面。一年一度爲誰現。春時青色秋時黃。莫把靈光逐境變。此一莖如來藏。一物不有含萬象。非卽非離非離卽。語言知見成冤謗。此一莖無垢識。吞吐十方絕消息。識神佛性兩難分。唯佛與佛知端的。此一莖金翅鳥。橫身宇宙出頭少。身壞雙睛堅不壞。龍王得之無價寶。此一莖瓶內鵝。陸亘將來布網羅。入時容易出時難。南泉妙有冲霄鶴。此一莖水牯牛。溪東溪西任優遊。水足草足真法樂。不犯他家苗稼休。此一莖野鴨子。馬師扭得鼻頭紫。當時飛去未飛去。今日同參此。

田裏。此一莖。獅子王。睜睛奮爪勢難當。千里往還須臾間。懸崖返擲力獨強。此一莖。鱉鼻蛇。毒氣熏人性命絕。兒時做處老知羞。老來更見皮無血。此一莖。鳩毒鳥。遺退落處不生草。沾着一塵全體膾。那覓菩提與煩惱。此一莖。出谷鶯。高遷喬木發新聲。燕雀寧堪追芳躅。狐兔望影不復生。此一莖。婆竭龍。萬子千孫遼幾重。凡聖隱顯不可測。海門深處水雲封。此一莖。白面虎。峭壁嘯風長威武。獐鹿驚逃沒踪跡。利爪剛牙靡敢觸。此一莖。衝天鵠。面前飛過見也不。捉鳩捕雀甚疾溜。來去難窺多恍惚。此一莖。大力鬼。忽現頭時忽現腿。去住出沒無處覓。移山驅嶽抒海水。此一莖。野狐精。爲妖爲孽動人情。本源佛性何曾二。邪正從緣莫強諍。此一莖。西施女。天然美貌花能語。雲外姮娥誰欲效。影落波心取弗舉。此一莖。共命鳥。兩首一身同飢飽。法界圓明無隔礙。不見大兮徒爭小。此一莖。兩頭蛇。見者必死行路嗟。舌尖休挂兩面刀。從來果報毫無差。此一莖。千頭魚。頭頭口目能吸覲。大士八萬四千臂。業報圓通殊不殊。此一莖。大頭鼈。偷生水底幾千年。碎身片片能舒縮。一性圓明無變遷。無變遷。任成壞。萬浪千波光自在。無聚無散無去來。何生何滅何驚怪。此一莖。三脚蟾。吞霞吐瑞有奇瞻。能變化。廣包涵。從來無處下鉤探。此一莖。九耳熬。天生靈物出神胞。能捕獵。善吼曉。偉然不與犬同毛。此一莖。無足蚓。土裏化生土裏寢。截身兩段俱能行。佛性那頭應可審。此一莖。百

足蟲行時俱動動還同。自性神通真三昧。昭然無處不圓通。此一莖。獨角麟。紫燄紅霞光滿身。大似優曇時一現。現時必有大緣。因此一莖。六牙象。凡聖參差不可量。帝釋窟前瓔珞身。普賢游行法界藏。法界藏。語意絕。充滿刹塵水底月。一塵徧入一切塵。塵塵玉象無差別。此一莖。一馬駒。踏殺天下人也無。初得金雞一粒粟。大作鹽醋盛豐餘。此一莖。獨眼龍。作家手段自從容。頭正尾正輕輕點。頓見鴻山笑裏鋒。此一莖。岑大蟲。兔子翻身虎勢雄。大用現前無軌轍。令人千古仰真風。此一莖。這瞎驢。主賓名位無實虛。漫將語意求端的。濟上宗風韻自殊。此一莖。赤稍鯉。禹門未過浪不起。搖頭擺尾直南去。必落他家蘆甕裏。此一莖。端獅子。顛狂老大學兒戲。直饒弄到未生前。不免傍觀笑落齒。此一莖。政黃牛。孤標不與世同游。自來自去誰相識。橋上清風水上鷗。此一莖。活跳蚤。筋斗連翻徒賣巧。縱使一翻遍塵刹。祇中世界無多少。此一莖。金獅子。身高丈二威無比。牙爪剛強無所畏。嘯天伏地能調子。此一莖。銀獅子。霜滿眉毛雪滿體。智勇能爲百獸王。金鎖玄關留不止。此一莖。玉獅子。飛行獨步絕依倚。一吼能令千里聞。野干狐狼都嚇死。此一莖。銅獅子。張口伸腰威欲起。遺糞能令百物畏。孤踪行處絕虎兕。此一莖。鐵獅子。咬人先咬咽喉始。猛烈能令行路絕。醉象惡龍靡敢抵。此一莖。石獅子。抱子能藏深窟裏。有時臥。有時起。千里尋食如咫尺。此一莖。雪獅子。寒光凜

凜難近視。睜睛奮爪勢威獵。瑞物從來無倫比。此一莖木獅子。十字街頭能舞戲。能躋跳。善進止。惡發無物堪相似。此一莖泥獅子。食人不厭肉沒齒。入海飲水魚龍驚。一吸能令乾到底。此一莖磁獅子。爪牙未露惡未已。輶球大似花貓兒。狂性一發震天地。此一莖石秀才。一筆千行不剪裁。博盡古今墳與典。文光獨耀廣寒來。此一莖石和尚。曉夜尋經知向上。能戒能定能神通。自有天人送供養。此一莖石將軍。封疆展土立功勳。長戈短戟威千里。能鎮中華絕冠羣。此一莖石宰相。日月爲心海爲量。能章禮樂文華國。調鼎雄才居衆上。此一莖石夫人。雲髻霞裳冰雪身。能向寒崖獨自立。花朝月夕不知春。此一莖石童子。拾薪汲水能隨使。更有一能人不及。學書日寫千張紙。此一莖石女兒。月下彈琴調新奇。纖指弄花香滿袖。粧樓高望採蓮池。此一莖石漁翁。垂絲千尺意何窮。披星月。歷霜風。能將釣餌博鮮烹。此一莖石樵夫。擔柴換米供餽厨。山下能知山上路。幾迴曾到葛洪居。此一莖石仙人。雙髻鶴衣雲外身。呼風雨。驅鬼神。能將黃土點金銀。此一莖枯江濤。巨浪無風三尺高。百谷到頭終入海。萬流下落總歸漕。此一莖枯湖泊。船到中心隨風蕩。夜來明月正當天。一波一月無遮障。此一莖枯川灘。瀑花如雪聲如喧。人多易推順流舵。舟子難牽上水船。此一莖枯潭漩。千洄萬渡如螺轉。深難測。

底未見船。到中間看方便。此一莖。枯溪瀑。長湍如帶。曲如抱。石上騰。石下繞。流遠應知源處。浩。此一莖。枯池流。奔波泛漲不藏舟。瀰野澆漫渠溝。漁人無處下釣鉤。此一莖。枯澗泡。大似玻瓈光可好。時生時滅。本無根。內裏虛空。人難到。此一莖。枯井波。萬疊千層。泊天河。蛟爲隱。龍爲窩。出沒縱橫。有若多。此一莖。枯泉湧。石罅迸出。清且冷。一點沾人毛骨蘇。脫凡入聖爲灌頂。此一莖。劫火光中一株草。根不燒。葉不燎。春生未萌。秋先老。此一莖。劫火光中一片雪。鵝毛輕。銀花結。烈燄之中寒逾冽。此一莖。劫火光中一莖毛。重鼠鬚。輕兔毫。舞空上下不能焦。此一莖。劫火光中一滴露。任燒然。無遮護。懸空經劫。濕如故。此一莖。劫火光中一浮漚。當處起隨處流。烈燄狂風未卽收。此一莖。劫火光中一跳蚤。亦能躍。亦能翻。踪跡疾溜。無處討。此一莖。劫火光中一火螢。身帶炬。飛若星。飄風驟雨更光明。此一莖。劫火光中一小蚊。行作樂。飛成羣。如鑼如鼓。鬧黃昏。此一莖。劫火光中一細蠅。何處生。空裏閑。性貫蜎飛與蟻動。此一莖。劫火光中一微蟻。識猶昧。形尙菲。不辨頭兮不辨尾。此一莖。晴空電。紅燄金光千里現。雷火同燒。神鬼驚。來時恍惚去不見。此一莖。炎日霜。六月當陽結白光。寒最冽。冷非常。行人不必問清涼。此一莖。暗室影。左回右轉時無定。相婆娑。性清淨。箇中不許分偏正。此一莖。地中天。張羅萬象。目森然。高無上。廣無邊。幾人踏破劫空前。此一莖。中夜日昇天朗曜羣昏失。

1
炤無私。行無跡。光明星月無倫匹。此一莖。冰河燄。燒空猛烈速如念。大千燬燼。沒纖塵。法界圓明不涉漸。此一莖。空華果。纍纍落落。葡萄朶。味極甘鮮。不墮莫昧。生前這一箇。此一莖。露柱卯。夜半初生光明燦。外邊圓。內裏輒。中有玄黃自充滿。此一莖。碌軸兒。初生便有大殊奇。語有齒。步能移。霜爲眉鬟。雪爲鬚。此一莖。木雞鳴。在殼卽能報五更。啼子午呼重輕。聲聲相續。劫前聲。諸佛子。信也。未何事。一莖賤復貴。世出世間一物無。千差萬別。何曾二。諸佛子。信也。不莫謂一莖有出沒。過去未來本一際。拈來放去勿輕忽。諸佛子。信也。麼。勿怪一莖名許。多。物本非名。名非物。將誰分。自與分他。諸佛子。信也。無漫擬。一莖有萬殊。識破萬殊名字相。吳牛元是跋黔驢。諸佛子。信也。非。好向一莖達所歸。透過這些真自在。橫來豎去不相違。諸佛子。信也。歟。諦審此莖果是渠。識得渠儂無彼此。簾條舉起是飛魚。諸佛子。信也。難實有一莖隔萬山。是有是無俱不住。優遊無處不通關。諸佛子。信也。疑。若執一莖事事迷。百草明明。祖師意。金身丈六古人題。諸佛子。信也。謗。豈在一莖生伎倆。是色是空清淨身。一華一草。如來藏。諸佛子。信也。漫。識此一莖唯一貫。提得定盤星子穩。何愁千轉與萬轉。諸佛子。莫恍惚。信則須教信入骨。離此別求玄與妙。玄妙應知盡鬼窟。諸佛子。勿猶豫。顥愚言說無虛句。此莖不了從何了。縱了還從這裏去。諸佛子。休懊惱。樂處何如苦處好。向此安閒真快活。天堂

地獄合身倒。諸佛子少驚怪。刀山劍樹蓮花界。佛祖都同如是說。放身向此脫皮袋。諸佛子漫去來。拈起一莖眼豁開。看去來無蓋覆。通天通地信奇哉。諸佛子離知見。知見不生全體現。此莖非教亦非宗。憎愛兩頭俱坐斷。諸佛子無疑猜。佛祖都從精進來。伸手屈腰全已力。別無聖解與凡才。諸佛子去恐怖。死生苦樂何依附。無修無證無染汚。何用將心求妙悟。諸佛子除顛倒。花自花兮草自草。雲在青天水在瓶。趙老屋中無王老。諸佛子斷分別。分別不生信口說。此莖說到未來際。大海波中點片雪。話到此應警地。再要依稀沒巴鼻。大丈夫漢休自棄。莫教辜負出家志。出家一事非細事。睜目看來難舉似。直超一念未生前。就裏那容佛祖計。佛祖計絕事如何。從來佛法無許多。明明白了了甚明了。一念纔生萬頃波。病僧不是強饒舌。句句傾心肝膽裂。只恐諸君信不真。忉忉不覺口出血。口出血爲君說。直下承當猶蹈轍。提起一莖凡聖盡。布毛吹處狂心絕。今是古。古是今。今古何曾有淺深。古能如是今如是。豈肯讓古而屈今。古是今。今是古。古人何強今何腐。人人脚底透長安。漫諉今人難比古。傘居不惜兩莖眉。再爲諸人重賣癡。彼此同安清淨界。不須更覓毘盧師。毘盧師光明滿豬是猪兮犬是犬。大洋海底火燒天。劫火光中洗木碗。放心裁莫顧慮。爲君再舉末後句。飯到大家同放參。泥深各自高揭褲。信得及。同我住碧溪橋畔雙杏樹。若有疑惑莫虛勞。且向

諸方托鉢去。

明月湖歌贈雲居晦兄和尚

濟潤

山上有山山最奇。山頭更有湖光飛。湖光萬丈爍丹壑。那用明月生清輝。湖浸樓臺層層影。魚龍日抱遊重蜃。昨有俠士欲破浪。一見此湖空嘆歸。不是此湖波濤惡。此湖接天絕四圍。天興湖面相摩蕩。九州四海一些微。晦老住此已十載。日日湖頭踏芳菲。千古牢騷方寸起。今朝恨事淋漓揮。四十八祖如未死。不必淚落如珠璣。我來恰值秋風後。千山萬山紅依稀。每攜青筇對湖景。幾回玩弄幾歎欵。那討漁父歌滄浪。但見白鷗來濯衣。迺知雲山最奇處。人間天上是耶非。嘆我生涯在途路。更欲沿江問釣磯。

詞

癸巳除夕禪衆烹露地白牛詞

滿庭芳

憶昔當年北禪分歲。曾烹露地白牛。雲居冷淡也用這珍羞。鼓起庖丁手段。脫剝好不剩絲頭。重經火紅爐猛焰。鎔鍊到全休。雖然只一味甘逾酥酪。富比王侯。盛來香積禪衲飽飼餉。更說諸方五味。食雖美。不中咽喉。乃召衆云。齊聽取幾年古話。拈出最風流。

從寒溪歸雲居道中和東坡赤壁詞

歸去來兮。吾歸何處。嶙峋天上雲居。人間雖好。苦熱似熬魚。幸爾驅車歐阜。重登眺萬仞匡廬。雞公畔。蓮華圭壁。錦繡一時舒。鹿池幽嶺下。臥雲深處。面對香爐。過虎溪三笑。憑弔欷歔。西指柴桑故里。伊人遠。五柳蕭疏。從此上湖天雪瀑。高臥翠芙蓉。

戒顯

雲居山志卷之十八

贊

雲居佛印禪師磨衲贊

蘇 軾

長老佛印大師了元游京師。天子聞其名。以高麗所貢磨衲賜之。客有見而歎曰。嗚呼。善哉。未嘗有也。嘗試與子攝其齊衽。循其鈎絡。舉而振之。則東盡嵎夷。西及昧谷。南被交趾。北屬幽都。紛在吾針孔線蹊之中矣。佛印欣然而笑曰。甚矣子言之陋也。吾以法眼視之一。一針孔。有無量世界。一世界。滿中衆生。所有毛孔。所衣之衣。針孔線蹊。悉爲世界。如是展轉。經八十反。吾佛光明之所照。吾君聖德之所被。如以大海注一毛竅。如以大地塞一針孔。曾何嶠夷昧谷。交趾幽都之足云乎。當知此衲非大非小。非短非長。非重非輕。非薄非厚。非色非空。一切世間折膠墮指。此衲不寒。燦石流金。此衲不熱。五濁流浪。劫火洞然。此衲不壞。云何以有思惟心。生下劣相。于是蜀人蘇軾聞而贊之曰。匣而藏之。見衲而不見師。衣而不匣。見師而不見衲。惟師與衲。非一非兩。眇而視之。蟻虱龍象。

顥愚和尚像贊

金之俊豈凡

有個頭陀。鬚髮婆娑。衲破不補。渾身灰土。是病非病。戒慧而定。欺詐百端。一味瞞官。閒去閒來。嶂巒波迴。不棒不喝。狠過蛇蝎。這是阿誰。顥愚大師。像也不像。半効八兩。

雲居晦山和尚道影贊

張立廉崑山

天半孤峯。披雲高眺。下視塵寰。鼓發狂鬧。法道傾頽。驚瀾旣倒。棟柱孤撐。狐狼迅掃。把住趙州關。龍象擒拏。踏翻明月湖。烟波浩淼。種田博飯。大好山農。入草求人。誰窺王老。威音王前。畔。猶是兒孫。道渠是雲居羅漢。塗汚不少。

雲居山諸緣大師贊

黃端伯元公

京裏來。京裏去。琉璃殿上親相遇。雲居老漢慣談禪。萬佛證盟宗眼句。主中賓。賓中主。那個師僧知落處。當時曾會紫柏道人。却記他爲一株大樹。要見大樹麼。問取苾芻菴上人。像供芙蓉山中人

自讚 梵思維那贊

克勤

單提臨濟。正法眼。當機密付。要瞎驢無位真人。乾屎橛。棒頭喝。下絕名模。當年海會大蟲敵。今日歐峯舉似渠。圓悟不惜兩莖眉。洪爐燄裏綻美蕖。

雲居佛印禪師贊

德清憨山

文字習氣。生來漏逗。橫口說禪。不落窠臼。預畫笑容。不知何爲。軒渠而化。只這便是。

顥愚和尚贊

道盛

稟童真身。奮大人志。參空印之無文。絜清涼之未墜。策杖撥天下兩眼。自奇退步。占寰中四
依獨貴。半生善病以破情。一味平常而得意。末後振作金陵。別有孤光照世。

憨山大師小像贊

觀衡

憨山和尚。大慾無狀。慣拋金剛圈。暗用生鐵棒。初在東海。鼓風作浪。後在嶺南。吞烟吐瘴。刻
人眼睛。食人五臟。但遭其手。渾身俱喪。多少癡人。被惑誑。我今識破你了。莫在這裏裝相。

諸緣和尚像贊

戒顯

貌類枯僧。心同古佛。以苦行爲爐錘。視世緣如冰雪。名動紫宸。行高京國。迺振錫于歐峯。不
負紫柏曉舌。瞿瞿苦心。稜稜鐵骨。擘迴萬仞雲居。鑿出一湖明月。雕甍碧瓦。變現天上樓臺。
玉誥金書。黼藻梵王宮闈。至今祖道重轟。宗風載烈。覩鳳逸以麟奔。致雷扇而電掣。孰知中
興蓋代之功。一樣一枯。一畝一畚。出前人之汗血。瞻之仰之。繄偉勣與殊勳。亘千齡而不滅。

顥愚和尚像贊

老古錐。號顥愚。古佛心。壯士鬚。骨剛如鐵。貌滿如癯。住遍名山。席主雲居。慣過無鹽日。喜作

減筆書。怪怪奇奇。大用不拘。真修行之角虎。法海之神駒。而不知是其緒餘。充其量。蓋將現身三十二應。而以圓通一著。破萬有之昏衢。何以似之。如井觀驥。

題雲居長老受業師太空老宿道影

這位老師。其德兮誠。其貌兮樸。天真自然。不假雕琢。內外一如。而克儉克勤。始終一節。而如金如玉。藏修于五老之巔。養道于青蓮之谷。百八珠輪是話頭。數到老來猶未足。獨有奇者。雖不奮獅威。而產出麒麟。不形鳳采。而養成鸞鶯。苟非積厚流光。那討雙雙異目。後人瞻之。仰之。孰不望喬木而嘆老宿也耶。

靈隱老和尚贊

元 謐

這尊慈。沒遮瓦。貪利生。施王饌。以療饑。喜燬禪。劈華峰。以巨斧。會茶佛。日碎文殊之玻璃。博飯雲田。鞭大鴻之水牯。昔也分靈隱之半院。全主副賓。今則朗慧鏡于當陽。轉身就父。更可異者。百萬阿修羅王。有時托動三有大城。叱咤奮怒。只消入慈忍正受。回機依怙。弗如是。其何能嫡嗣靈山。氣吞百四十傳之諸祖。

顥愚大師贊

真 果 嵩 圓

和尚傘居。遮天蓋地。貌出尋常。獅子法會。每稱病僧。無些病氣。不畏大風。唯嫌微細。印受圓

通。觀音子弟持戒頭陀。不墮尊貴。定逾長爪慧超寶誌。經註四依法傳閑語。南嶽天臺縱橫。遊戲拾橡歐峯。洒掃應對插田歌謠。闡揚三義無心何爲。木石非侶悟入參求。總不可思議。

跋

雲居豁糧公案跋語

熊德陽

歐樵子偶閱雲居寺豁糧公案。撫而歎曰。自歐岌將軍以懷王入秦。遂遯此山。仙隱始著。晉唐已爲禪刹。自道膺禪師住此。及佛印舜老夫圓悟大慧。先後入傳燈錄。高僧傳者四十餘人。山峻千仞。中稍衍爲田。載芟載柞。雨暘一恆則不實。幸實矣。與鹿豕爭。其餘粒與麤麌丐。其滯秕以果山中焚修之衆。已千餘年。額載糧壹石。捌斗。僧安其業。在明神宗時。令海內方田。雲居倍增舊額。未十年。業荒僧散。紫柏尊者有祖庭放牧場之慨。適張新建相公見而憫之。商于當事。蔡令公因立豁此。而以丈溢之米抵之。舊額米仍如故。是以諸緣杖錫來此恢復。流俗不察。猥以雲居享無糧田。誤矣。失五嶽四鎮間其香花幅韻。無論卽鄰之百丈青原。皆爲樂國。不然如楚粵封內山。稍磅礴者。多爲游丐。猺獞岐黎所據。官不得問聞。爲邊民害者。累累也。昔年梟風四震。樵走字問。顓愚大士功課。大士答曰。某無功可課。只數年山中虎狼。不敢肆。不可不謂微功在朝廷也。今日擊鳥魚之忽波忽風。則大士之說信然。因書於公案之末。亦以見此山之靈爽濬發代不乏人。張蔡諸公與紫柏尊者之功德不可受也。

雲居志跋

吳巒未淑

癸丑夏。余過瑤田。得閱燕雷禪師所修雲山誌。敘雲居之繇來。追崇往昔禪祖之卓錫垂謨。以昭先哲之令德。而啓迪來茲者。業詳且悉。若燭照龜卜。弗爽也。前乎此者。或有志焉。而未逮。唯燕雷禪師親受晦老人衣鉢之傳。而開堂說戒。主席雲居十有五載。槌拂之餘。殫衷竭力。采衆芳以集成厥美。爰鋟梓以永其傳。語有云後進者莫爲之前。縱美弗彰。先達者莫爲之後。縱盛而弗傳。殆此之謂歟。或其法裔有能悟學穎豁。嗣禪師而歸然踰起焉。俾後之視今。猶今之視昔也。抑是志也。殆與雲山修水並垂不朽云。敬爲之跋。

跋東坡與佛印帖

德洪

東坡騎鯨上天去十九日矣。平生文章流落世間者。所在神物護持。然士大夫罕蓄之。多見山人野士之室。汝水畋禪者。出此帖示予。雖其一期酬酢之語。而謙光燭人。三復之。想見幅巾杖履翛然行儕石水溢間。如淵明在柴桑斜川時。某題。

跋雲居佛印帖

祿宏蓮池

元禪師與東坡書云。時人忌子瞻作宰相耳。三十年功名富貴。過眼成空。何不猛與一刀割斷。又云子瞻胸中有萬卷書。筆下無一點塵。爲何于自己性命。便不知下落。以東坡之穎敏。

而又有如是善友策發。何慮不日進。今之縉紳與衲子交者。宜講此誼。

跋蘇子瞻詩

東坡詩有遠公沽酒延陶令。佛印燒猪待子瞻之句。予謂大解脫人不妨破格相與。然沽酒猶可。燒猪不已甚乎。假令俠客藉口子瞻。狂僧效顰佛印。初始作俑。誰當其辜。故此事未可信。古謂詩人託物比興。不必實然。是也。

跋陸大宗伯雲居募疏

真 可

昔如來不舍穿針之福者。良以福非積善而不成。善成則性有繼矣。故曰繼之者善也。成之者性也。卽此而觀。善固緣。生能乘緣。生而入無生。何殊因花而得春哉。若然則穿針之福。獨非花乎。今陸大宗伯養高綠野有日矣。年登九十。猶不以老却穿針之緣。爲諸緣山主敷凍雲之花。香浮遐邇。可謂給孤後身也。嗚呼善哉。

禪門鍛鍊說自跋

戒 顯

余實見晚近禪門。死守成規。不諳烹鍊。每致真宗寂寥。法流斷絕。萬不獲已。立爲新法。且作死馬醫。若論本分一着。言前薦得。猶爲滯殼迷封。句下精通。已是觸途狂見。悟卽不無爭奈。落在第二頭。汲汲乎講鉗鎗。論鍛鍊。豈非頭上安頭。夢中說夢。弄泥團漢。將來認爲實法。不

知通變。帶累山僧。生陷鐵圍矣。耽源圓相。倘遇仰山。一火焚之。山僧合掌云。作家作家。是真能善用孫武子而不爲趙括談兵矣。果有此人。殆研額望之也。

跋熊約翁家藏綸言

乙巳春余至撫州疎山。過修江。復訪約翁父子。讀家藏封誥。古雅高削。訓辭有則。余擊節數四。詢之則曰。倪文正公鴻寶先生筆也。約翁爲先生門下士。受知最深。故簪筆代言。尤爲親切。余惟熊氏以好善護法。世於修江。妙喜老人雲居錄云。總屬山前熊伯莊。自宋已然矣。今約翁一門茹苦食貧。束身勵行。跡厥素履。凜乎非今世之人也。宜其父母齒逼期頤。秩躋諫垣。貳封至再。咸謂天之報施優厚。實約翁一門修積有以致之也。木升彙季請余繕寫。以傳后裔。余不敢辭。聊爲塞責。亦以附縕衣之好云爾。

雲居山志卷之十九

雜錄

祭熊青嶼給諫文

戒顯

嗚呼正氣在地河嶽。在天星辰。養之浩然。與地廣大。與天高明。求之末礪。惟我居士。乃真其人。大造精粹。扶輿清淑。純被一身。束髮筮仕。圭璋犧象。薦之明廷。歷任中外。慈厚謙光。爲國典型。虛中以治。始終無二。執玉捧盈。讜言於朝。有勞不伐。諫草自焚。爲國捨才。焚香告天。桃李盈庭。閨禍旣作。奉身而退。以事厥親。服官多載。筐篋蕭然。四壁空貧。歸田園居。敦睦鄉黨。栗里躬耕。數厄陽九。濁流煽禍。移易人倫。公獨高蹈。手攜榔櫈。屏跡雲門。我來歐阜。見公談笑。渾然天真。盛德在躬。內外一如。介石惟貞。公好聞道。每侍傘居。片語服膺。學佛非跡。慧光圓映。內自澄瑩。視公矍鑠。當與洪崖絜美齊齡。何期厭世。遂騎箕尾。遄返蒼冥。公如精金。雖經百鍊。色質彌新。又如粹玉。雖火三日。不易光晶。累當國變。忠節凜然。不震不驚。疾風勁草。卒爲完人。以賦兩楹。高山絕仰。雲峯傷盡。五內摧崩。幽期雖迫。神靈洞格。鑒此荒文。

祭熊季納四居士文

嗚呼余與翁何因而聚會。夙願如雲居。千里忽相對。拈鬢擇歐主。余名進弗退。自此莫逆來。一十有五歲。余每任迂疎。翁亦忘忌諱。初余憂屋破。翁言此祥瑞。屋若造周圓。師必別化被。雙峯奪我去。知翁必憤恚。然翁每拳拳。望余一返旆。今春過疎山。一見傾腸胃。幸天假因緣。風雨連宵寐。五年未抒抱。豁如夏雨霑。授我青翁編。囑我摘瑕纓。期以秋再晤。視翁氣甚銳。何期流言至。白日忽西墜。法社棟梁摧。歐峯草木瘁。早知此露電。何忍便乖背。負此有盡緣。成我莫大罪。肝腸爲痛裂。號天暗洒淚。給孤遂云亡。五內欲摧碎。昏曉誦金經。祝翁登聖位。生芻薦翁帷。終身抱感愧。

奠季納熊居士

元鵬

臨行猶細語兒孫。再四叮嚀囑護真。報午不須靈照女。知時曾契住山人。安僧弗惜家珍盡。博誼能資衆刹均。獨有海昏遺燭遠。法燈處處見全神。

二十餘年衛法難。令人寤想骨毛寒。歐雲高鎖眉斯結。艾水長流淚不乾。一片冰心千古鑑。半生鐵面萬年竿。未闌雪調能相繼。喜有雙麟已並冠。

奠無回熊居士

曾話雲樓月轉廊。禪思力在讀書堂。于今暮直無回路。徧界明明不覆藏。

● 祭靈隱晦山老和尚文

熊維典

維康熙十二年十一月己亥朔越十九日丁巳平樂岸居士熊維典偕弟熊維珍熊維璫熊維璵熊維璗熊元哲
熊元璣熊元紳男熊虞牧熊苑新熊遠寄熊菽辨等謹以瓣香致奠於故 灵隱晦老大和尚大禪宗之塔而言曰
嗚呼。我師世之津梁。少而志學。聞博記彊。詞吐雕龍。隱同斑豹。樂志烟雲。沈酣墨妙。誕自名
邦。生于世族。察父哲兄。朱輪丹轂。而師清靜。蚤皈瞿曇。爰喪其偶。輒賦罷菴。初參雪嶠。許爲
法器。天童密雲。賜名授記。逮于甲申。大運遞革。師謝冠裳。去儒入釋。玄墓鉗錘。綱宗妙密。律
虎經獅。百不當一。師也登堂。龍象蹴踏。如鍼芥投。如水乳合。軍持應器。來我匡廬。含光寒兌。
懷瑾握瑜。賢聖所處。久而彌彰。蘭生幽谷。無言自芳。雲居虛席。渴仰上乘。縑素敦懇。繼此法
燈。興殘起廢。易故維新。得皮得髓。濟濟多人。典忝石交。請益就正。叩鐘必鳴。呼谷必應。奇岸
磊珂。偉哉男子。久而論心。幾忘爾汝。如師之度。掇皮皆真。和平坦直。宜躋遐齡。如師之貌。玉
潔金剛。大椿不渝。宜壽而康。猶幸百年。永言丘壑。何圖返真。雙趺示櫛。賢聖皆滅。師能不去。
櫛柄在手。浮漚世諦。撫今追昔。淚湧如泉。悲我離索。坐失高賢。嗚呼哀哉。建窣堵波。並弘覺
界。一塔橫空。千峰下拜。靈蛻巍巍。永鎮茲土。光明燭天。亘今亘古。典以老癃。不能執繩。遺兒
代巾。躬翦荆蕚。聊借苾芻。以薦杞菊。常寂光中。鑒我虔肅。尙饗

雲居山志卷之二十

事畧

江西南康府建昌縣敕建雲居山真如禪寺。重興住持比丘洪斷立。余舊住萬佛寺。嘗閱內典。知江西之有雲居。迺諸祖得法之名藍。唐元和間其自來矣。及詢其蹟。湮沒無聞。覓從雲水。屬南康之修江。余一聆則舍京師之萬佛。居荒麓之歐峯。掩關三載。辛歷百端。已而墾劈荆基。誅茆縛屋。安插徒衆。勞勞北上。往復者三。蒙發內帑。營建招提。請頒龍藏。續置庄租。余固殘朽。復沐上宣切雲居先賢。繩繩傳法。國朝以來。住持不常。余以管見。敢紹元規。就將各處續置庄產。分撥徒衆。祇存本山關內關外山塘菴莊。併常住什物等項。盡付十方大眾。永爲招提。其十方選擇十位。每年一衆當家。十人如缺。再補十位。中間不得度蓄徒屬。另餐飲食。接培已知。私泛人情。干犯名分。好惡偏邪。或外現慈容。內懷奸妬。皆非比丘之法。其間倘有此輩。許九人依律三勸。三勸不聽。以清規揀糧。差戶役。依期上納。接待往來。隨時茶飯。庫藏隨緣。俟賢增補。佛天洞鑑。爲萬古叢林矣。

雲居寺住持僧常慧率徒姪老幼等四十餘衆。爲茲刹歷唐宋來祖師輩出。宣法闡宗。千百餘年。我明成化年間。遞傳庄菴尙有四十餘所。僧房五百餘間。猗歟盛哉。逮乎嘉靖末年。沙門零落。山田盡爲豪占。殿堂煨燼。基址黍苗。萬曆初有髮僧戴明賢發大勇猛。與居豪結訟。稍復片地。棲息十年。我先師諸緣隨以十九年雲遊此間。覩道場廢墜。惻焉傷懷。乃誅茅建立方丈。掩身三載。矢志恢復。於萬曆二十七年。奉宮旨還京。因謁王資營造菩薩表異。見夢椒房。乃得慈聖陳太后施帑鑄造滲金聖像。莊嚴大藏經典。復勅崇基表刹。以庇經像。永爲護國香火。萬曆四十年宮殿告成。山田罄贖。接待十方主賓。雜處徒子法孫。食足身閒。得以息心念佛。于斯萬年。先師非不樂也。特以計慮徒衆。後來變態難防。將山田拆爲兩股。一付我等眷屬。住坐耕種。一同殿宇。佛像經典。付十方高僧住持。我等外居。不容再預。刊石殿前。垂示後裔。萬曆四十年。復以皇太后旨回住萬佛堂。未及一載。方僧相殘。致訟。奔竄逃伏。香燈銷歇。棟宇虛涼。蒙費太爺愍茲厄數。給示委慧等入寺住持。于今二十餘年。外侮薦至。艱難萬狀。向求高僧付託。以降姑正之魔。以復先師之制。累來頗難其人。今幸顥老和尚擁錫來遊。慧等望見下風。欽仰和尙業行。淳修理懷。淵遠與徒衆暨檀越縉紳耆老等。議求和尙屈知寺任。永奉梵宮。甘心扶持。老幼退住私庄。聽從和尙重新鐘鼓。大闡佛事。去故鼎新。更

制改度。凡我徒衆。不得侵犯常住田界。不得盜斫常住林木。不得倚先人功德。矜求加被。不得借座下聽經鑽單背師。常住山地。不得私建靜室。先時創立者。雖令安堵。亦不許私分疆界。一切葬埋。不得恃有祖塋更生異糞。其入普同塔者。先白常住。循例辦齋。然後舉事。不得私自圖便。擅行安厝。諸有不如約者。聽清規發落。清規不服。經公理論。衆等一心無有異辭。但冀和尚振起頽風。維茲絕紐。金姿玉笈。保護無窮。東行西過。游息不絕。以慰聖母之靈。以暝先師之目。慧等無任頂禮懇切之至。

崇禎十年九月 日立請狀雲居住持僧常慧徒姪祖玉祖興祖旺祖簡祖星祖恩祖聖祖能祖意祖達徒孫道先道果道明道亮道宗道生道修道思道岸道符道經道綸道泰道輝道持道義道學道魁道和道進道英道智道滿道統曾孫法志法相法現法澄法雨法燈法幢法嚴法傳法位法周

諸山大衆慈號悟濱悟淨真果真通本進如和如滿如果如容延安如律
證盟護法檀越熊德陽 十方常住交單

附錄重建雲居山真如寺事略

佛曆二九六五年己卯即民國二十八年。日人侵華。茲山殿宇。焚燒殆盡。僅存銅毘盧佛。釋迦佛。觀音菩薩。監齋像各一尊。住持性福等四人。結蓬而居。零落至此。

癸巳秋七月。雲知雲居法窟久燬。請准當軸。派同志等數人。伴送來山。黯然傷之。乃藏身一破牛欄中。旋衲子聞訊踵至者百數十人。食宿兩難。幸上海簡玉階居士施資。勉以過冬。且奠定修造開田之初基。

甲午春正月。住僧至百餘衆。國內外道友聞訊。相將助資。爰掘土平地。將後山挑低七尺。以土壤補。西邊低凹坑舊寺。坐戌向辰。今改坐辛向乙。築基拋磚豎竿。首建法堂兩層。蓋鐵瓦。上作藏經樓。置礦砂頻伽等藏經。中供毘盧佛。兩邊爲衆宿舍。樓下中築法臺。戒壇。通用。供釋迦佛。掛鴻宗鐘板。於中上殿坐香布薩安。居鑄造大銅鐵鍋五口。大銅鐘報鐘二個。各種法器什物。冬十一月所棲牛欄被焚。新建茅蓬。樓上下廿餘間。牛欄廁所。窯廠。次第落成。自燒磚瓦。儲置木料。

十二月起禪七一期。

乙未春正月。開墾水田百四十餘畝。旱地三十餘畝。秋九月。香積厨五觀堂落成。冬十月。爲山上沙彌傳戒。不期來者數百人。期滿。起禪七一期。

丙申春正月。興建大殿。天王殿。畫駄殿。虛懷樓。雲海樓。報恩堂。西歸堂。夏末落成。

秋七月。性福退居。新住持海燈接座。開講楞嚴經。冬十二月。起禪七兩期。

丁酉春正月。興建客堂。功德堂。鐘鼓樓。韋駄殿。禪堂。如意寮。上客堂。伽藍殿。庫房。方丈。祖堂。雜務工寮。柴房。吳寬性居士發起修築山路。開濬明月湖。架飛虹橋。新塑釋迦佛。藥師佛。彌陀佛。迦葉阿難尊者。文殊普賢。彌勒地藏菩薩。海島五十三參。觀音菩薩。十八羅漢。四天王。伽藍祖師。大小聖像百餘尊。冬十一月完成。其間開河建橋。整治道路。修理古蹟。種茶栽植。滇松。核桃。川楠木。各類菓樹。櫻樹。花木悉備。夏六月住持海燈開講法華經。並爲青年比丘二三十人。成立佛學研究苑。造就僧材。冬十二月。起禪七三期。住僧至二百。衆戊戌詹勵吾居士發起。興建海會塔。規模悉仿南華

山志載。大殿佛座下地宮碑銘。今已招得。毘盧殿大殿佛座故址得古物碑文二處。均係洪斷和尚手藏物。如志中所載。仍以原物復藏二處佛座下。除原物外。毘盧座下。另加入銅彌勒佛一尊。玉章一個。大殿座下。加銅佛一尊。菩薩三尊。玉章一個。琥珀等物各一件。

碗杯羹匙各一件。以資紀念。

數年以來。修建經費。悉賴國內外道友助成。至於齋糧。初賴外助。迨乙未秋。所收稻穀及洋芋。紅薯。勉可自給。稍有不足。仍擬繼續開田墾地。種茶樹。生活庶以無虞。

又自上海請來樟香雕像。丈六。八尺。五尺。二尺。西方三聖像。共四堂。八尺阿彌陀佛像。一尊。六尺彌勒佛。觀音。連善才龍女。地藏聖僧。畫馬。關聖像。各一尊。白玉二尺釋迦佛。一尊。吳寬性送來一尺六寸古銅觀音。一尊。

右錄自癸巳至戊戌六年間。重建事畧。殿宇工程。大部完竣。諸餘房屋。尙待工成。
媿之唐宋建造。則華樸懸殊。較之明清重修。似益周備。此皆賴佛天垂蔭。檀護弘施。以及四衆辛勤之力。雲何與焉。茲以重刊舊志。先附錄於此。

虛雲識